

華陽集

五

叢書集成

初編

主編者
王雲五

商務印書館發行

華陽集
(四)

王珪撰

華陽集卷三十四

序

御製龍圖天章閣觀三聖御書詩序

臣讀詩至小雅之正。見周之盛時。樂賢人之在位。而君道益自尊顯。既飲食之。又有笙簧、鼓舞、幣帛、侑酬之禮。恩勤返復。以盡其歡心。且君能下其臣。則爲臣者未有不感發忠誠。思以歸報乎上。上下相交。四海蒙澤。以致太平。使國家萬壽之福無期極。其詩傳于後代。猶歌而取法。顧匪盛德之事歟。嘉祐七年冬十有二月戊申。皇帝乘暇日。延羣臣觀三聖神翰于龍圖天章閣。玩心文明。藻思濬發。遂賦觀書之詩。又幸寶文閣。親爲飛白書。使左右縱觀。若驚鸞翥鳳。與夫煙雲布濩之象。莫不回薄于筆下。蓋天縱之能。世莫得以曾闕也。因以其書分賜從臣。于是尙方給筆札。臣琦等二十有八人。咸賡宸唱以進。既置酒羣玉殿。上猶慊然有未盡意。越壬子。再召觀方國貢所瑞物。其木石皆有文。實天所以啓宋永命之符。又陳先朝述作之文。載披載繹。以示祖宗稽古之學。而百王之絕儼也。已而復燕羣玉殿。乃大合樂。其初有詔曰。幸天下久無事。今日之樂。期與卿等共之。惟盡醉勿復辭。遂出禁中肴醴。芳花異香。瑰奇未見之物。觴每行。必命醕者至於三四。衣冠愉愉。不知涵濡君德之醉也。臣伏思陛下臨御四十有一年。未始少近宮室。苑

圉、歌鐘、狗馬之娛。一朝游思清閒，君臣相與終日飲酒，而不失其正。雖有周盛時之詩，臣愚竊恐未能遠過也。自昔帝王游觀之盛，固有刻諸金石，以傳于無窮。矧茲希闊之遇哉！臣預游禁林，又塵太史氏之職，恭承明詔，敢拜稽首以揚鴻休。臣謹序。

明天歷序

奉敕撰

歷數之起尚矣。王者尊天養人，制事施法。一本諸歷，今夫歷歲者月之積，月者分之積，又推餘分置閏月，以定四時，蓋堯之遺法也。方堯使四岳歷象日月星辰，而衆功咸熙，後世豈其法盡廢，然而禍災之游臻，將其數之戾耶？夫數于天地之間，終而復始，用之而不窮，非積學不能攷知其術，而節序之所戾，非數窮也。歷之失也，且物銖銖而較之至石，未始不差，況仰察天之三辰，以候歲時寒暑之氣，又推其薄食凌歷風雨雪霜之變，其理至遠也，久而不能無差，其差則事易壞而不可久用也。宋興百年，歷四改矣。曰建隆應天歷，曰太平乾元歷，在咸平曰儀天歷，在天聖曰崇天歷，鴻惟皇帝陛下，承一祖三宗之烈，欽受天命，卽位之始，欲宣攷天地四時之極，以端大本，爲萬世則。据舊歷，氣節加時後天半日，五星之行差半次日，食之候差十刻，乃詔殿中丞、權判司天監、周琮、司天冬官正王炳、監丞王棟、主簿周應祥、周安世、馬傑、靈臺郎楊得言復作新歷。凡三年始上其書，旣而司天中官正舒易簡與諸生石道、李遵、更陳其家學，又詔翰林學士范鎮、諸王府侍講孫思恭、國子監直講劉攽攷定其是非，上推尙書辰弗集於房，而春秋之日

食。參今歷之所候。而易簡暨道等所學。殊疎闊不可用。獨新書爲最密。夫聖人因天地之命以厚生。故歷失必究其微。將以奉順其氣。使雨暘寒燠風之無不時。則六極于是乎銷。而百物于是乎蕃矣。然則歷本之驗在于天。其于生民之道。顧不重歟。且視四時者當察北斗。視四正者當察大辰。視一歲之事者。不在此書乎。凡新歷經三卷。義畧二卷。立成十五卷。隨經備草五卷。乙巳七曜細行一卷。賜其歷名曰明天。

送太子少保致仕李柬之歸西京詩序

奉聖旨撰

朝廷有爵祿車服之寵。以待天下之賢豪。而可貴可富之宜。其趨者不得止也。然而君子未嘗枉道以處焉。故觀其有所擇。則欲進之心廉。思其有所厭。則欲退之情厲。矧年耆而德充。邈然有遺軒冕而去者。雖天子不能以少屈也。龍圖閣直學士、工部尙書、兼侍讀李柬之。在先帝時。數請老以去。今天子卽位。乃繼上書曰。先臣迪相眞宗。仁宗勤勞王家。年七十二而致仕。臣無功名在朝。而年已與先臣等。陛下不使臣去。是使臣重得苟祿之罪。而以辱先臣。上度其不可屈。于是聽以太子少保致仕。凡致仕。閣門無謝辭。翊日。特召對延和殿。旣而賜坐。所以嘉勞之甚厚。其將行也。又特賜餞于資善堂。命講讀官臣王珪、臣李受、臣王獵、臣孫思恭、臣傅卞、臣王廣淵。修起居注臣滕甫、楊繪。預其會。會上凡六遣使存問。賜白金龍茶。及給以優奉。仍出禁中珍器。勸飲者。至于再三。徐又詔曰。先帝梓宮在殯。不欲親爲詩。敕臣等八人皆賦送行詩以進。于是少保亦自進感遇詩一章。維少保大臣子而歷事四朝。清夷端慎。不汨汨于榮利之事。及

老而得謝也。神氣愈和。間嘗與臣相從笑言。臣疑其尙少也。其家居洛陽。有風亭水榭之樂。又子孫中申。乘朱輪紆紫綬者。萃于一門。茲固積茂行而膺全福者已。臣嘗論爲臣之大節。莫如識進退之分。自前世蒙重位。飾虛名。及臨死而不知止者。靡不取危殆。如一有遺榮之舉。當時皆慕完操而誦清風。至後世而猶有聞此。豈夸者常多而達者常鮮歟。上旣賜以八臣所作詩。乃召臣珪爲之序。臣以爲少保之行。得天子之褒如此。其詩將詒諸後而不泯。治平四年五月十一日臣謹序。

送刑部侍郎致仕李受歸廬山詩序

奉聖旨撰

今夫仕宦而不得志。猶或不能謝事以去。況得位而志行。是亦去之之難也。朝廷養廉恥于士大夫。故于其去也。莫不致恩禮以表其所難。其能矯世所競而厲己之所難。幾希其人哉。臣伏思先帝在東宮。舊嘗延忠篤粹夷嘉美之士。以輔于聖學。有若龍圖閣直學士兼侍讀給事中李受。實惟其人。先帝卽位之明年。輒上書言。臣老矣。顧無以裨聖化。願乞骸骨以歸。書至五六上。他日自厚陵泣還。乃復言曰。臣在先帝時。年已七十。不敢竊祿以自安也。數有請於朝。今又加以數年。臣之筋力不能甚矣。惟天子惻哀之。獨念先帝東宮舊臣無幾。而受之篤道潔身。亦閔勞以官職之事。于是聽以尙書刑部侍郎致仕。十月庚戌。召對延和殿。乙卯。詔侍讀臣珪。臣光。臣鎮。侍講臣公著。臣獵。臣思恭。臣卞。修起居注臣繪。飲餞資善堂。上數遣使頒予之良厚。旣又命卽席賦詩以送之。昔漢二疏一朝辭位而去。歸其鄉。道路觀者雖嘆息以爲賢。

然不見當時公卿祖送之詩。前日李東之去自經筵。臣等已嘗爲詩。今復使賦送受之詩。誠以事在人耳。日久則泯。至於所命之詩。則將流于金石之傳。愈新夫然。顧上之所以褒待師儒之禮。何如哉。東之素家洛。受近徙九江。雖世族不同。然其迹出于一時。世之言二李者。不亦遠過二疏之事乎。受且行。自陳感遇之意。亦作詩二章。用繫詩末云。治平四年十月庚申日臣謹序。

左街大相國寺釋迦佛靈牙序

西方有大聖人曰釋迦如來。能以空覺諸著。以真實覺諸妄。以因劫覺諸死生。而世無貴賤無智愚無苦樂咸嚮佛。起恭求所以銷進罪福者。惟恐後之。其于導人之功。固亦閎矣。始佛發大慈悲。徧觀三界六道諸山大海天地含生。究竟寂滅。而爲衆生說涅槃之法。永斷諸有。以是因緣。我今安住常寂滅。是爲大涅槃。佛旣滅矣。天人大衆咸欲佛牙舍利。精進供養。而不可盡得。其後千餘年。佛牙乃至東土者五。今在西京者三。在東京者二。在大相國寺法華院者其一也。初唐高宗顯慶中。道宣律師居長安西明寺。忽一夕足跌庭下。有異人者捧而登曰。吾五方天使也。以師有妙行。與北方毘沙門多聞長子那吒偕來衛師。道宣因問佛所宣言教。那吒自言。我嘗見佛。當佛滅時。帝釋下取佛牙。有二捷疾蔽身于茶毘處。亦得佛二牙。今以一奉師。況師持靜密戒。卽心爲境。乃是親見如來。那吒去。道宣寶之。衆莫得聞。後授其徒文綱。葬長安崇聖寺塔下。至代宗出之。會昌中復還西明。宣宗時有檀越張義均者。別建塔於崇聖寺以安之。凡

都人有祈嘉應。屢見昭宗幸洛陽。奉牙置天宮寺。涉五代之亂。亦晦其緣。藝祖受命。以道宣所傳。得之天神。且疑非真佛牙。遣使取自洛。以烈火鍛之。定果之色。了然不動。因而製願文。太宗又驗以火。爲製伽陀文。于是更大相國寺灌頂院爲法華院。建重閣院中。以奉佛牙。兩街承詔。以義學沙門智照大師慧溫者主之。真宗嘗供養於開寶寺靈感塔下。乃瞻拜之暮。神光交發。亦作偈以嘆其事。仁宗覺性自然。大信三寶。始以梵儀寶華迎至禁中。且發祖宗御封。而灌以海上薔薇之水。忽于甘露穴中。得舍利一。其五色照人。帝親貯之瑠璃餅中。乃複製願文。旣又作贊。逾月始還寺。以七寶莊嚴金蓋三重。藉以上妙白氍。覆以瓔珞龍鳳之衣。慶歷中。會久不雨。帝又奉而禱之。須臾雨降。復作金殿四門以象天宮。于是時萬衆莫不作禮而觀焉。夫以金剛不壞之身。具三十二相。八十種好。雖示寂于一時。然其真化之性。隨機應現。徧虛空界而不可思議。故知生非爲生。住非爲住。滅非爲滅也。今微塵中不知佛說解脫之因。而淪于苦際。可勝言哉。若乃觀佛牙之存。庶以邪見斷而善根起也。有苾芻若神智初昭應者。一日歛衽而言曰。我佛如是殊勝。而自昔文學之士。乃無述焉。愚以謂五牙之來。而道宣之所寶者尤異。伏思一祖三宗。所以崇信之甚篤。因刻文以示諸無窮之傳。治平二年二月乙巳。臣謹序。

啓

謝直集賢院啓

伏奉宸恩授前件官職者。給尙書之筆。誤被于試言。趨承明之廬。驟容于番直。冒寵優甚。拊躬慙然。竊以建儒林之官。開祕書之府。固嘗會聚寂寥。不昭之典。延致魁梧卓犖。非常之倫。以辯論古今義理之原。而啓發國家文章之事。深維在昔。常意斯文。而自歷周之衰。孤秦爲之焚棄。涉唐復起。五代仍于亂離。蓋事物寢微。不可終敝。聖賢更作于時。一新。惟太宗解苛矯之餘。履文明之治。乃憲東壁圖書。盡藏其中。乃徹西昆英豪。悉叢于上。教化淵源之所出。禮樂揖讓之所司。天章發于無垠。王業爛于所覩。負攬高誼。作休盛期。肆于貞庭。沛舉能事。上方嚮意文學。稽古典章。惟是天祿石渠侍從之臣。皇墳帝典大常之道。退則紬繹勞於諮詢。故儒術之益崇。而上眷之曲厚。雖未嘗親刀篋之務。貫金革之行。而進用常出于士先。功名亦絕於武右。匪資俊異。曷稱寵求。如珪者稟生孤蒙。涉道淺鮮。少無馳騁辭章之氣。以動于俊游。長無耿介節義之雄。以迫乎時好。徒以槩攬方策。粗知治道之原。嗣守鉉鑠。不忘父兄之作。逢辰熙盛。樂道粹純。偶濫菑川之推。幾冠平津之等。一會都于淮海。半符留于京師。無職事之遑居。有謗譏之交中。斥屏星之舊。幾去避於使威。矜佩刀之奇。或枉嘉其公器。因勞而厭俗。未老而驚衰。比鴈門之終更。裁茂陵之自脫。屬風露之疾。寢留于江湖。而旦暮之心。常馳于省闈。連蹇自信。罷駑不支。間外邸之來趨。久高門之未省。奏公車之牘。分從報罷之歸。賦平樂之題。私有類倡之悔。敢謂宗公過採。主澤誤沾。待以異倫。擢之踰等。易草莽之疎賤。親日月之光華。入預禁嚴。盡窺祕奧。躋道山之藏。雖懷陟岵之傷。獻儒館之歌。又繼吹

墳之樂。而況儲宮德義之傳。蓋重于老成。虎觀經術之疑。實該于學問。乃容曲士。以副兼材。將何以剖判乎藝文。磨礱乎事業。進肩國器。取重時名。望出意涯。榮兼幸會。茲蓋伏遇某官、躬致主之策。勤好賢之心。惟方重以鎮天下之浮。惟謙裕以導天下之壅。引國大體。爲時至公。故洪鈞一陶。物不偏茂。廣廈叢倚。材無少遺。施及無庸。玷于茲舉。方當陶風化之厚。蹈名教之歸。矯其所未中。策其所未至。敢以異辯而情先訓。媿安而尸厥官。堅伯魚之心。一期聖主之遇。顧豫子之報。敢忘國士之知。區區之愚。力底于是。

謝進士及第啓

三月二十二日。皇帝御崇政殿放榜。伏蒙聖恩。賜進士及第。仍當日釋褐者。廷對在前。唱名居右。顧己才之甚淺。拜君命之誠優。望有所踰。媿無以避。竊以君道有紀。則英賢遂游。天時不綱。則文雅有闕。故漢繼三代。儒盛而益衰。秦墜六經。士賤而若棄。視古風迹。沿世污隆。亦有雖懷材而不得時。旣逢辰而不見用。邈然相失。寂爾無聞。此名士所以勉力而趨。英主所以虛心而待。要適其會。以成厥功。茲事良難。須聖而作。我真人之守命。王中天而立基。永爲典章。一正統類。民氣清淨。以召太和之風。帝業焜煌。以享無窮之美。然而王室居四海之大。宸居攬萬幾之煩。謀慮旣深。權綱至重。貴待衆哲。以昌永圖。乃下歲舉之音。益有才升之望。首自中府。施及外方。凡洎爲儒。靡不欣命。至于祐社稷而樹大業。守封疆而發遠謀。繫民之安危。與國之休戚。皆選此路。實重于時。宜得異倫。以稱上意。伏念珪。肖貌非粹。業文至疎。問非一師。雖及

夏侯之學。身兼數器。終匪薛宣之能。無結駟之華。難歷千而取貴。有西郊之樂。幾屏居而言歸。徒以家緣清芬。幼服明訓。俎豆之事。況魯人之嘗聞。聖哲之書。亦漢士之所好。未嘗忘儒素之緒。豈敢忽歲時之陰。以至天下精禋之交。國家表裏之體。間以持論。居嘗用心。閭巷棲遲而自如。風雨勤勞而不顧。日以益勵。期于有成。矧睿神之獨臨。方俊豪之交會。四門皆闢。有紹舜廷之風。六科並張。不減唐家之訓。乃迹前代。斯爲盛時。此而不圖。後將何振。始由舊里。濫居人之首推。旋登太常。藉羣英而並進。法座嚴密。中庭肅清。謂天感以德。聖人所以專奉。謂德主于順。王者所以圖興。詔爲目題。聳于衆聽。屬在甚愚之識。曷究大義之歸。僂俛僅成。怔忡俟退。豈圖程覆之至。復玷采收之明。倡士譽之上游。並天倫之榮綴。竊時嘉寵。副上勤求。自惟菲才。不勝厚幸。此蓋伏遇某官、厚兼容之度。躬與進之風。多銓品于人倫。喜獎訓于士類。致此甄擢。亦被庸虛。敢不飭己之勤。奉公以潔。無百謫之愧。以敗于官塗。有一心之勤。少裨于王事。上答生成之賜。次酬教育之恩。過此以還。未知所措。

謝知制誥啓

伏奉宸恩。授前件官充職者。載右史之筆。初冒于清光。典四禁之文。遽更于近職。寵非材稱。幸出意涯。竊思帝廟堂之尊。富家國之盛。而能鼓舞天下之動。神明天下之幾。非典謨文章。號令風采。恐未易講寥廓之治。追醞釀之風。蓋在古二帝之遺書。而大訓之所基本。在天太微之西掖。而元命之所淵微。有如起兩

都之隆。致開元之懋。其間詔書之始下。政事之所施。固多高文大冊之傳。嘉謀讜議之益。使王言溫潤。而主澤汪洋。當時得人。後世載美。有赫昌會。於皇彌文。上有帷幄宗工鉅臣。以經綸風化之源。下有蘭臺鴻濡碩學。以闡劇精祲之際。況名命之所出。而禁嚴之所司。匪肩異倫。實點華序。如珪者。姿稟沈霽。器能枵疎。學承之迂。闇于古今治亂之適。識滯于用。藐無賢知。馳騁之奇。偶濫偕於計吏。幾躡先於詞級。往裨劇治。趨駕屏星之車。還預雋遊。誤對高門之地。未及承明之鑒。已擢司會之繁。一涉丹墀。得識天下之能事。更持紫橐。媿無史臣之多聞。敢意睠獎之靡遺。乃擢瑣涼于非次。給北宮之札。才奉試言之榮。答淮南之章。俄參視草之寵。重念出書林之直。有先人手澤之存。卽綸闈之趨。仍伯氏詔文之舊。豈容單陋。寢竊高華。茲蓋伏會蒼官。以材猷粹純。肇文雅之望。以風誼高博。主名教之歸。啓迪當世之事功。樂育四海之豪駿。如大庭之旅萬玉。不以礧礧而卽捐。如匠石之區衆材。不以梗楠而後巧。致繆茲舉。以矜無庸。敢不佩飭訓辭。參祈體論。矯其一切之習。策所未至之難。慎漢制之頒。期盡追于三代。揚堯言之善。使益誦于四方。或犬馬未衰。冀涓塵有補。庶切君恩之報。敢忘己日之私。愚心區區。未識所措。

華陽集卷三十五

神道碑

國子博士追封成國程公坦神道碑

國子博士致仕、程公之既葬也。其子宣徽南院使、安武軍節度使、檢校太傅、判延州、戡使人以告予曰。我先君不幸。材居于位而墓碑之未立。後世將泯而無聞。朝夕以是爲懼。而不敢寧。敢請以銘。予得其世序之所以來。又迹其所潛者厚而不克大發于時。偉夫程氏之有後也。爲之銘。惟程氏自重黎以來。世其職不墜。涉三代至于秦漢之間。蓋不絕聞。公之先出廣平。近世始徙許州之陽翟。遂爲陽翟人。曾祖遂。避世不仕。祖守瓌。仕周爲臨濮縣令。贈太師中書令。父思義。少通經術。而藩鎮屢辟不至。贈太師中書令兼尙書令。母劉氏。追封魏國太夫人。公諱坦。字坦然。治春秋三家學。淳化三年。賜本科及第。補郢州司戶參軍。再調河中府河西縣尉。歷遂州長江、泰州興化二縣令。杭州錄司參軍。舒州團練判官。又爲泉州觀察推官。應天府留守推官。故相張文節公知留守事。被召還朝。薦公爲大理寺丞。知河南府福昌縣。徙益州廣都。又知齊州禹城。未幾。請監許州長葛縣酒稅。再遷殿中丞。遂請老于陽翟。明年會天子覃恩。遷國子博士。景祐二年十一月辛卯。以疾卒于家。享年七十七。南院太傅。實公之仲子也。時守秭歸郡。始聞公疾。卽

懇斬解郡。及承訃道中，乃茹哀徒跣而歸。後三年，公夫人王氏亦卒。公世葬陽翟縣之麥秀鄉，其將葬公也，卜其大墓之左不吉，卜其兆域之南則惟食，遂以康定元年正月甲申葬公于後卜之原。以夫人祔焉。公初爲掾郢州，會民有執盜者三人，法當死。州趣獄上，公疑其自誣，輒留更訊之。果得真盜者，自是雖他郡有疑獄，監司屢屬公處之。多所平審。在河西方，朝廷治兵靈武，而文移急于星火，又賊騎數出內侵，公領數縣芻糧，從間道往餽塞下，皆先期以辦。在興化，招流庸，自占者數千家。在福昌，屬京師冬無冰，詔伐冰嵩山下，時近春氣愜，冰不就。縣人憂其責，公往禱龍潭之涯，而一夕冰合，視之皆隱伏奇譎，而不可狀。衆以謂公精誠之致焉。在禹城，又招流庸數千家，括隱田萬五千畝。公自國子博士累贈吏部侍郎，其爲人衍衍然，不妄笑言，居官不苟求名譽，而多陰施在人。雖連蹇四十餘年，未始有過謫。夫爲善者苟不耀自躬，則遺諸後世，蕃昌舄奕而不可止。惟公之仲子天禧中禮部第進士，爲天下第一，遂登甲科，歷臺諫，爲侍從之臣，其典重藩尤有聲。其爲參知政事，乃贈公太子少師，爲樞密副使，又贈太子太師，爲宣徽南院使，又贈太師中書令，爲安武軍節度使，又贈兼尙書令，遂有封成國，且程氏之分。雖盛于廣平、中山，而世不常顯。今公子與故相國中山程文簡公前後提旄鉞，俱鎮延州，其勲名昭聞，俱爲國偉臣。自國朝以來，顯有二程。嗚呼，公可謂有子矣。公夫人王氏，封越國太夫人，子男五人，長曰減，試將作監主簿，次卽戡也。次曰肇，綿州鹽泉縣尉。次曰戴，河南府永寧縣主簿。次曰義，鄭州觀察度支使。女五人，長適進士孫起。

次適尙書兵部員外郎、天章閣待制、兼侍讀孫甫。次適太常博士袁穆。次適尙書駕部郎中張昞。次適國子博士崔公孺。孫男十三人。曰莊。尙書虞部員外郎。曰蘊。蚤卒。曰英。蔡州司戶參軍。曰荀。虞部員外郎。曰安國。蚤卒。曰萬。大理丞。曰堯。曰倩。皆將作監主簿。餘幼。曾孫男七人。銘曰。士修于家。不苟以進。公進自初。弗矯弗競。亦既有年。豈不欲施。雖屈于用。其終無墮。公濬弗章。時則有後。允顯其人。在帝左右。曷以贈公。大啓其封。尙書中書一品一崇。始艱終榮。是謂受祉。公雖云亡。其聞不已。葬也誰卜。不遠先塋。更千萬年。毋毀我銘。

夏文莊公竦神道碑

皇祐三年秋。武寧軍節度使、檢校太師、兼侍中、判河陽、鄭國公。以疾請歸于京師。天子飭太醫馳視。又以肩輿往迓之。而公疾寢劇矣。旣就第。未幾。以薨。聞。乘輿臨其喪。視公形容槁瘁。嗟悼者久之。贈太師、中書令。諡曰文莊。輟視朝二日。五年七月辛酉。葬公于許州陽翟縣三封鄉洪長之原。旣葬。詔史臣珪論次公之世系。與夫行事。以刻其墓碑。臣珪嘗讀黃帝以來姓氏之書。蓋夏出姒氏。其後世乃弗顯。至漢大司徒勤始顯于永初之間。由漢涉唐。至于五代。益復不顯。公諱竦。字子喬。姓夏氏。其先九江人。曾祖昱。避世不仕。祖奐。獻書僞唐。爲晉陵尉。仕不得志。退居于家。考承皓。太平興國初。上平晉策。太宗召見。壯其說。補右侍禁。隸大名節下。一日寇騎突境上。夜從間道發兵。還與寇遇。力戰以沒。贈崇儀使。自公之顯。曾祖而下。

皆贈太師中書令、尙書令、封晉、齊、魏、三國公。曾祖妣陳氏，封周國太夫人。祖妣黃氏，燕國太夫人。妣盛氏，越國太夫人。初，魏公死，事朝廷錄孤，以公爲潤州丹陽縣主簿。景德四年，登賢良方正，能直言極諫，科擢光祿寺丞、通判台州。遷著作佐郎，召還，遷祕書丞，直集賢院，同編修國史，判三司都磨勘司。遷右正言，車駕幸亳，爲東京留守，推官。仁宗封慶國公，初選文學之士，以傳道經義。宰臣旦屢以公言于眞宗，遂命勸學資善堂。未幾，同修起居注，爲玉清昭應宮判官，兼領景靈宮會靈觀事。遷尙書禮部員外郎，知制誥。國史成，遷戶部員外郎。是時參知政事丁謂請大治城西礮場，醜金水作后土祠，以擬汾陰睢上。三司使林特欲于上林中爲複道，壞元武門以屬玉清。江淮發運使李溥又欲致海上鉅石于會靈池中，爲三神山。跨閣道以幾遇神仙之屬。方羣臣爭言符瑞，公獨抗疏謂其事闊遠，非所以承天意。遂皆寢。景靈宮成，遷禮部郎中。天禧初，坐閨門之故，左遷職方員外郎。知黃州。後二年，復其禮部郎中。徙鄧州。又徙襄州。屬歲大饑，百姓流亡，盜賊相乘。公旣發公廩，又募富人出粟十餘萬斛以賑救之。其全活者四十六萬餘口。巡撫使姜遵上其事，賜書褒諭。後民思其惠，以其所賜詔書作金石刻焉。仁宗卽位，遷戶部郎中。又徙壽安、洪、三州。洪之風俗，右鬼尙巫。所居設壇場，陳旗幟，依神以卜禍福。病者輒屏去，親愛死于飢渴，則規罔寡孤，惟其意所出。公索其部中，凡得千九百餘家。妖符、怪籙、神衣、鬼帽、鐘、角、刀、笏之類，以萬計。悉令燔毀之。乃言漢晉張角、孫恩之亂，不可不察。朝廷爲下詔更立重法。自江浙以南，悉禁絕之。天聖三年，丁越國太

夫人憂。是時章獻太后臨朝。以公東宮舊僚。又復其知制誥。欲服喪。不許。爲景靈宮判官。判集賢院。奉使契丹。公以魏國之沒敵難。又母喪未除。義不得行。乃抗章力辭之。明年。以左司郎中召入翰林。爲學士。同勾當三班院。尋兼侍讀學士。知審官院。又兼龍圖閣學士。遂拜右諫議大夫。密樞副使。又明年。遷給事中。右府主進紕武吏。而大臣多闕略。吏得因緣爲姦。公乃集攷前後賞罰之所當者。列爲諸房定例。而吏不得欺矣。朝廷與契丹約和二十餘年。北地久不習武事。公謂邊備不可弛。乃屢陳所以守禦之策。又明年。拜參知政事。祥源觀使。于是請復六科。又請復百官轉對。置理檢使。已而爲宰相所忌。復以爲樞密副使。累遷尙書左丞。太后上仙。兩府大臣皆罷。公爲禮部尙書。知襄州。未行。改潁州。景祐元年。徙青州。明年。徙應天府。兼南京留守。後二年。以戶部尙書入爲三司使。元昊反。陝西用兵。乃拜公奉寧軍節度使。知永興軍。康定元年。改忠武軍節度使。知涇州。明年。拜宣徽南院使。兼陝西四路經略安撫招討等使。還判永興軍。又詔進屯鄜州。始公西行。天子遣使問所以攻討之策。公乃言。太平興國中。李繼遷以窮蹙之兵。屢寇朔方。太宗嘗命李繼隆等五路並出。旋亦無功而還。眞宗不欲罷關中之民。惟戒邊吏嚴斥堠以備之。今元昊略有河外之地。貿易華戎。顧其勢相萬于繼遷也。雖然。其欲僭竊名號者。不過要市朝廷耳。天下久不見兵革。一旦遽議深討。臣未知其完計也。願下令諸將。敵卽入寇。急入收保。毋得與戰。彼旣絕中原賜予。又喪其緣邊和市。可坐待其斃也。是時議者咸以公言爲不然。于是罷分節制判河中府。慶歷二年。徙

蔡州。始朝廷銳意興師。及劉平、葛懷敏繼以輕賊失軍。天子悔不用公言。又申思、今宰相臣琦使還陝西。嘗言公所以制邊之狀。于是召爲樞密使。議者猶詆公怯于兵。今而用之。則邊將之志墮矣。帝不得已。聽罷之。鎮公厭煩言。乃上還節旄。願得益徙閒郡。遂以爲吏部尙書、知亳州。明年加資政殿大學士。又明年朝廷貸元昊之罪。而西邊罷兵。仁宗終以公言爲是。復拜宣徽南院使、河陽三城節度使、判并州。又明年拜同中書門下平章事。又明年召入爲宰相。制下外廷矣。而議者詆公終不已。乃復以爲樞密使。進爵英國公。仁宗親作飛白文行忠信字。及乘險字。以賜之。且言爲時謗傷者甚衆。而朕獨知卿也。又明年出判河南府。兼西京留守。皇祐元年加兼侍中。赴三城。用祀明堂恩。改武寧軍節度使、徐州大都督府長史。徙封鄭國公。明年會夏秋雨不已。河水大溢。公親行隄上。已而得疾。其薨蓋九月乙酉也。享年六十七。公少好學。自經史百氏陰陽律歷之書。無所不學。其學必究古今治亂天人災變之原。其爲文章。閎衍瓌麗。殆非學者之所能至。凡朝廷有大典冊。屢以屬之。其譽滿天下。雖出臨軍。入幹機務。未嘗輒廢書也。祥符中。郡國多獻古鼎鐘盤敦之器。而其上多科斗文字。公乃學爲古文奇字。至偃臥以指畫侵膚。其勤若此。所治有風迹。爲民立伍保之法。而盜賊不敢發閭里。又善遇士卒。其疾病飲食。自拊視之。在陝西。嘗上十策。若結熟羌。增弓手。練強弩。併小寨。絕互市之類。皆當時施用之。公自以材器高。未嘗過許人。故士大夫遙生憚疑。而少已附者。公居亦防畏。不敢以貴執自安也。臣珪伏思先帝臨御之日久。其選用材賢。可謂

至矣。公始以文學輔東宮。及帝躬親政事。屢倚以爲宰臣。惜其數離譏訾。卒不從容廟堂。預圖太平之功。非命也耶。始樞密使田況嘗從公幕府。及公薨。以謂公有王佐之蘊而不及施。信矣夫。雖然。出入榮華四十餘年。可謂盛矣。所著文集百餘卷。公娶楊氏。封榮國夫人。子男一人。安期。爲龍圖閣學士。右諫議大夫。女二人。長封仁壽郡君。適尙書駕部員外郎賈守訥。次適光祿寺丞賈延年。孫二人。長伯生。國子博士。次伯卿。太常寺太祝。銘曰。

夏出姒氏。自帝錫命。其後分封。以國爲姓。爰自三代。涉漢東京。厥緒可攷。顯維一人。又千餘年。曠不世食。嶷嶷惟公。實荒鄭國。始以孤童。謁來京師。乃賜之策。大放厥辭。於皇仁宗。英照四方。攬收羣豪。寤寐弗忘。帝曰汝咨。東宮舊臣。左右予躬。道德循循。乃服大僚。顯允文武。豈無嘉謀。告于帝所。西方用兵。戰屢不克。天子悔之。莫如公畫。位隆隙開。公豈不畏。卒遭讒言。不相乎內。凡今在位。孰遇如公。尙復公嗟。靡志之從。刻碑高原。萬祀無止。其誰銘之。有臣太史。

狄武襄公青神道碑

至和三年八月。上以樞密使、護國軍節度使、檢校太尉、河中尹、天水狄公。拜中書門下平章事。出判陳州。明年三月。感疾于州。未幾以薨。聞。天子盡然。輟視朝二日。發哀苑中。贈中書令。太常諫行。諡曰武襄。旣葬于汾之西河。有詔史臣以刻其墓隧之碑。臣謹按。狄始周成王封少子于狄城。因以爲氏。其後代居天水。

至梁文惠公乃大顯于有唐。其子孫或徙汾晉間。公實西河人。贈太傅曰應之。于公爲曾王父。是生眞。贈太師太師。生普。贈中書令。其配曰堯國太夫人侯氏。公其次子也。諱青。字漢臣。生而風骨奇偉。善騎射。少好將帥之節。里閭俠少多從之。初游京師。遂補拱聖籍中。寶元之初。元昊叛河西。兵出數無功。公自散直爲延州指揮使。延帥知公敢行。故常使當賊鋒。凡數歲。出大里。清化。榆林。歸娘嶺。東女之崖。木匱山。渾州。川。白草。南安。安遠等戰。大小二十有五。中流矢者八。斬首捕敵萬有餘。獲馬。牛。羊。橐駝。鎧仗。符印。車。鎗。重。器物以數萬計。嘗破賊金湯城。至于乾谷三堆杏林原。遂略宥州之境。殲其醜族。燔其積聚數萬。廬舍數千。收其帳二千三百。生口五千七百。又城橋子谷。築招安。豐林。新寨。大郎等堡。皆扼賊要害。使不能闕邊。以功亟遷至秦州刺史。涇原路兵馬都部署。經略招討副使。上欲召見公。會寇薄平涼。因命圖形以進。由是天下知公名。公提涇原之師。威震羌夷。旣而曩霄復稱臣。西陲少事矣。迺以公爲捧日。天武。四廂。都指揮使。徙鎮定路兵馬部署。遷侍衛親軍。步軍。馬軍。殿前都虞侯。歷惠州團練使。眉州防禦使。保大軍節度觀察留後。遷步軍。馬軍。副都指揮使。遂領彰化軍節度使。知延州。一日。天子顧將帥之臣。無踰公者。乃召爲樞密副使。加檢校司空。皇祐四年。廣源州蠻酋儂智高僭竊服號。以盛夏舉兵陷邕州。濟舟而東。又陷沿江九郡。進圍廣州。力屈不能下。還據于邕。所過吏民多被害。江湘之南。人心爲之蕭然。公于是抗章請行。又因侍上間。自言臣結髮起行伍。顧無以報國。今遠夷跳梁。不足爲陛下憂。願將歲兵數千。當羈叛蠻。

之頸。致之闕下。上壯其言。遂改宣徽南院使。宣撫荆湖南北路。經制廣南盜賊事。知檢校司徒。上親餞于垂拱。所以臨遣之意甚厚。先是蔣偕、張忠等繼以輕敵失軍。士卒莫有戰鬪志。明年正月。自桂林次賓州。會廣西鈐轄陳曙以步卒八千潰于崑崙關。公卽按曙以不應令。并殿直袁用等三十一人。咸以軍法誅之。衆莫不惴恐。旣而頓甲軍中。又下令且調十日之糧。或莫能測。賊使人覘吾軍而還。黎明。遂合三將之兵以行。乃絕崑崙。出歸仁鋪。先自爲陣。賊果失守險。遂悉其衆逆王師以戰。前鋒孫節搏賊死山中。賊氣乘确。吾軍公親執旗鼓。麾騎兵縱左右翼出。賊非意。賊大敗。復馳騎追之。斬捕二千二百級。僞署黃師宓、儂志忠等五十七人沒于陣。智高夜縱火城中而遁。明日破賊入城。獲金貝之物以鉅萬。畜數千。悉分其麾下。招復老壯七千二百零。嘗爲賊所脅者皆慰遣之以歸。又斂羣屍。築京觀于城之北隅。初有衣金龍之衣。又金飾神龍于楯。仆其傍。或言智高已死亂兵中。有欲爲公急作奏者。公曰。安知其非詐也。寧失智高。敢誣朝廷以貪功耶。二月。班師。遂曲赦五嶺。又布德音。至于江湖之南。公還爲樞密副使。進位檢校太尉。河中尹。俄拜樞密使。賜第城南一區。子悉優以官。公固謝曰。賴陛下神靈。出師大捷。皆諸校力戰之功也。臣之諸子。非有勤勞。何敢拜君命。上固以寵之。在樞密四年。自以遭時奮用。乃夙夜一心。進圖國事。雖權幸不可撓以法。上累訪以邊幾。嘗從容陳所以攻守之計。天子深然之。晚以盛滿爲戒。思避時柄。遽終于陳州。享年五十。公爲人慷慨。尙節義。有大慮。慎密寡言。外剛銳而內寬。其計事必審中幾會而後發。其

行師必正部伍營。陳明賞罰。雖敵猝犯之。無一士敢後先者。故嘗以少擊衆。而所向無不靡。與士同寒飢。勞苦。而又分功與人。未嘗自言。安遠之戰。方被創甚。寇且至。卽挺身以前。衆莫不爭爲用。嘗獨被髮面銅具。馳突賊圍中。見者爲之辟易。今丞相韓公琦。故資政殿學士范公仲淹。同秉武節。經略西邊。公時爲裨將。殊爲二公見器。仲淹又嘗以左氏春秋授公。以謂爲將者不可不知書。匹夫之勇。無足尙也。公于是自春秋戰國。至于秦漢以來。成敗之迹。概而能通。公爲涇源招討。起居舍人尹洙知渭州。因與公善。洙學通古今。嘗與公談用兵之術。稱曰。雖古名將。殆無以過。其後洙以貶死。爲周旋其家事。惟恐不及。其徙真定道。過故鄉。謁縣。先下車趨至令庭。遂燕故老于縣下。里中榮之。公事親孝。遭中書令之喪。雖衽金革之事。而哀戚過人。方秉樞于朝。奉堯國太夫人膝下。舉觴于堂。問又天子賜珍其家。極榮養矣。征南之日。戒內外不以聞。懼遺其親憂。始行至邕。會瘴露之氣。昏鬱中人。或謂賊流毒水中。且士飲者多死。忽一夕泉湧于郊。汲之甘冽。遂濟其軍。此非誠所感耶。公薨之初。詔衛公匱歸殯京師。其葬也。寵以鼓吹旌輅。送于都城之西。又敕所過郡。治道共具。發材官輕車。至于河西。卜用嘉祐四年二月甲申之吉。是歲以祫饗恩。加贈兼尙書令。臣嘗伏讀兵法曰。以治待亂。以逸待勞。此善用兵者也。又攷前史之載。將而持重有謀者。其出塵不有功。如武襄之西定靈夏。南平嶠外。未嘗不擇形勝。整師徒。先計而後戰。遂摧兇陷敵。名動殊俗。爲國虎臣。善夫。臣洙以謂有古名將之略。豈誣也哉。公娶魏氏。封定國夫人。六男。長曰諒。殿班奉職。蚤卒。

次曰咨。西上閣門副使。次曰詠。內殿崇班。閣門祇候。次曰諫。內殿崇班。次曰說。東頭供奉官。次曰諫。內殿崇班。說諫蚤卒。二女許嫁而卒。孫曰璋。左侍禁。曰璫。尙幼。銘曰。汾晉之氣。蒙于崆峒。有如其人。武襄之雄。始來京師。感慨從軍。以節自發。孰莫不聞。元昊蓄姦。歸節塞下。西邊用兵。露甲在野。公出大里。至于杏林。奇謀縱橫。以讐戎心。上顧將帥。威名無如。來汝陪予。秉國之樞。盜起南荒。乘邊弛防。陷邕圍廣。妖氛以猖。公于上前。憤然請討。賊失崑崙。膏血原草。還服在廷。越茲累年。夙夜迺事。匪圖弗宣。將相出藩。年甫五十。公不復還。天子爲泣。生莫與榮。沒莫與哀。旂常之載。其績有來。有勤其初。有大其後。攷德于詩。以質不朽。

龐莊敏公籍神道碑

嘉祐八年三月丙午。太子太保致仕。龐公薨于其家。是時先帝方寢疾。乘輿不及歸奠。而震嗟者久之。于是其孤以公之功狀。上于太常。而博士李育乃謚公曰莊敏。六月壬申。葬公于雍丘縣之谷林山。明年。會修仁宗實錄。其孤又請于史官王珪曰。我先公位丞相。于朝蓋顯矣。其葬也。諫官司馬光實爲之銘。今墓隧之碑未立。願得史官所書以刻之。以信其後人。余遂攷次公之族氏。官封。與夫行事之始終。復爲之銘。其序曰。惟龐氏之先。自周文王之子畢公高之後。別食于龐。因以爲氏。近世或家車平。又徙成武。遂爲成武人。公諱籍。字醕之。曾祖贈太師中書令。諱武。祖追封秦國公。諱文進。考國子博士。追封魏國公。諱格。皆贈

太師中書令兼尙書令曾祖妣越國太夫人何氏。祖妣楚國太夫人陳氏。妣燕國太夫人邢氏。公大中祥符八年舉進士及第。爲黃州司理參軍。再調江州軍事判官。知開封府。薛田舉公爲兵曹參軍。薛奎代田。又舉公爲法曹。改大理寺丞。知襄邑縣。預修天聖敕。爲刑部詳覆官。歷羣牧判官。累遷尙書屯田員外郎。出治秀州。入爲殿中侍御史。初章獻太后臨朝。命有司定其出入儀物。著內東門儀制三卷。及章獻上仙。而章惠太后欲踵垂簾故事。公亟奏請焚之。其後章惠卒不敢出預政事。尋爲開封府判官。尙美人方有寵。遣內侍韓從禮下教旨。公上言。陛下初顓聽斷。而美人僭恣撓法。不亦上累聖德耶。于是仁宗怒杖從禮。并責美人。遷祠部員外郎。廣南東路轉運使。初龍圖閣學士范諷放縱不拘禮法。公爲御史時。已嘗奏劾之。及之官。益疏諷過失。會諷請辯。乃詔置獄于南京。已而責授諷鄂州行軍司馬。亦左遷公爲太常博士。知臨江軍。數月。徙福建轉運使。復其官如故。頃之以侍御史入爲三司戶部判官。仁宗謂執政曰。龐某其止是職耶。數日改刑部員外郎。兼御史知雜事。判大理寺。糾察在京刑獄。知審官院。爲天章閣待制。陝西體量安撫。歷知汝同二州。趙元昊反。舉兵圍延州。總管劉平遇戰于北川口。監軍黃德和望敵退走。平遂爲賊所害。德和懼使人紿言。平實降賊。朝廷以兵圍平之第。且收繫其子弟。詔殿中侍御史文彥博馳往河中府案其獄。旣又命公并訊之。公至。具得其狀以聞。于是朝廷要斬德和。而劉氏子弟咸拔用之。除陝西都轉運使。慶歷元年。拜龍圖閣直學士。知延州。再遷吏部郎中。明年改延州觀察使。辭不拜。進左諫

議大夫爲陝西四路緣邊都總管兼經略招討等使。仍知延州。是時元昊數寇邊。公下令諸將毋得輕出兵。其欲出兵必召問其所以可勝之計。然後遣之。故其出未嘗不有功。凡築十一城以扼其要害。又其下多美地薦草。募民耕之。歲得穀以省大費。一日元昊遣親信李文貴以書來。願納款塞下。公曰彼固多詐。未可以信也。因留不遣。會朝廷欲貸元昊之罪。而詔公招徠之。公以爲元昊屢勝王師。今若遽馳介以往。恐其氣益驕。于是召文貴謂曰。國家之撫四夷靡有不至也。今元昊方命不恭。以毒我邊民。且自視其區區之地。乃敢與中國爭衡耶。若天子赫然大怒。舉師西向。而加誅之。將安爲計哉。夫慮不至于久遠。而徼一時之利者。豈智也歟。其歸語王熟計之。踰月文貴復來。然其言未肯去僭號。天子旣厭西兵。復詔公曰。元昊若稱臣。餘一切勿拒之。公曰。假之僭號。則安肯復臣耶。執以爲不可及。是時修復涇原。恐虜益復入寇。久之乃復書曰。所陳非邊臣所聞。明年元昊遣伊州刺史賀從勛來。自稱男邦面。令國烏珠曩霄上書。父大宋皇帝。公使謂曰。天子臣妾四夷。今不稱臣。不敢以聞朝廷。從勛曰。大王願以子事父。猶臣事君也。使得至京師。天子不許歸而更議之。公乃上言。西邊用兵以來。元昊喪其和市。國中愁困。今其辭稍屈。必有悔過自新之意。可遣使與之約也。于是詔著作郎邵民佐與其使並往。旣而元昊果稱臣。西邊罷兵矣。公遂入爲樞密副使。八年改參知政事。皇祐元年。以尙書工部侍郎爲樞密使。公始召還。以謂方用兵時。邊壤煩苦。關中蕭然。請減緣邊之兵。還食內地。議者以爲不可。公卒減兵二十餘萬。至是又以天下之力。

困于養兵。況兵衆而不可用。方其無事。請以法加汰之。議者又以爲不可。公卒汰兵八萬餘人。二年。加戶部侍郎。三年。拜同中書門下平章事。昭文館大學士。監修國史。公爲相。不敢以毫髮私人。端明殿學士程戡除知益州。仁宗使公諭之曰。善撫遠人。還當以二府處之。公曰。二府惟天子許之。臣不敢以言。其後遂召戡爲參知政事。而程卒不知也。廣原州蠻儂智高舉兵陷邕州。又下沿江九郡。進圍廣州累月。還據邕。所過多被害。而張忠、蔣偕等繼以輕敵失軍。仁宗問誰可將者。公言樞密副使狄青。昔在臣麾下。沈勇有策慮。可屬以南方事。明日。青奏事殿中。遂以爲宣徽使。宣撫荆湖南北路。經制廣南盜賊事。或言青起行伍。難使自專其謀。當更擇文臣以副之。公曰。曷者偏師之出。號令之不一。進退之無法。以故數不利。今命大將。若使文臣副之。則威令復不得行。豈不視前日之敗也。公復請下詔嶺南。一皆受青節制。青旣至。斬別將一人之不用命者。于是軍中皆恐畏。未幾果破賊而還。仁宗欲以青爲樞密院使。同中書門下平章事。公曰。昔曹彬下江南。太祖謂曰。西有汾晉之師。北有幽薊之難。欲用卿爲使相。則誰復爲朕立功耶。今寵青太過。後益有勝青功者。陛下何以賞之哉。于是復以青爲樞密副使。加檢校太尉、河中尹、入內侍省都知、王守忠。以畏謹得幸。求爲節度使。公曰。昔王繼恩平兩川。宰相以其有大功。欲優拜之。太宗怒以爲宦者不可使預政事。乃召學士錢若水議立宣政使以授之。今守忠無功。以爲節度使。後復有求爲宣徽使者。奈何。帝乃爲止。公在位久。而無他宰相。故謗言屢以及公。會道士趙清貺者。公之外親。嘗詐爲人求

官有小吏告之。公卽捕繫開封府。旣而窮得其姦狀。初言者指公私于人。及流清貶。海上又言公縱法行事。朝廷雖知公被誣。而言者不已。遂罷相。知鄆州。尋加觀文殿大學士。前此契丹嘗遣使來求御容。仁宗顧左右皆默然不敢對。因曰。能斷大事。孰有如龐某者。至和二年。除昭德軍節度使。知并州。明年以災異詔中外言得失。公密疏曰。太子天下本。今陛下春秋固方盛。然太子不豫。建使四方無所係心。願擇宗室之宜爲嗣者。蚤決之。羣情旣安。則天異可塞矣。臣歷位將相。恐先犬馬無以報。雖冒萬死而不悔也。敵人盜耕屈野河田。朝廷恐益復侵邊。遣使更定其地。旣而召敵人不至。公遂禁邊毋與爲和市。敵人怨之。日夜聚兵境上。公又戒毋得輒舉師。久之。敵且去。命通判并州司馬光詣麟州。與知州武戡計事。戡乃請築城三堡于屈野之西。使敵不敢耕故地。光還。公雖許之。而堡實未築也。已而敵兵輒復聚。管勾麟府兵馬郭恩走馬承受公事。黃道元乃與戡擅率兵至忽里堆。欲出其不意以擊之。會伏發。恩、道元皆戰沒。而戡僅以身免。未幾。敵送道元歸。詔御史鞠乃言與戡等行視堡地。因爲敵所掩。公坐是罷節度使。復爲觀文殿大學士。知青州。于是司馬光上書曰。擅議築堡。臣光實陳之。今戡等輕出亡師。傷國威重。罪在臣光。公聞亦上奏自咎。皆不報。徙知定州。公在并時。年已七十矣。欲謝事于朝。而以得罪迺不敢。及過京師。遂上疏曰。臣疲老不足以任邊事。願乞骸骨以歸。詔不許。遷尙書左丞。辭不拜。至定一年。復請老。召還。又數自陳憫愍。天子不得已。聽以太子太保致仕。後三年。公薨。享年七十六。今天子追贈公司空兼侍中。公爲人

明智有餘。果于臨事。少好學。及老而家居。終日窮覽詩書而不知倦也。天性精于法令。常曰。大臣當遵畏天子法。其敢自爲重輕耶。獨嚴于治軍。其下如有犯。必以便宜從事。或至于誅磔而無所容。然善視其居處飲食。故士卒知所畏而樂以出死力。其遇僚吏從容。使得盡所長。其薦于朝。皆天下賢士大夫。與司馬光尤相厚也。所著文集五十卷。公先娶邊氏。樞密直學士肅之女。封嘉興縣君。繼劉氏。供備庫使永崇之女。累封彭國夫人。子男五人。元魯登進士第。爲大理寺丞。蚤卒。元英太常博士。元常大理寺丞。元中太子右贊善大夫。元直大理寺丞。女七人。其封安康郡君。適冀州度支使陳琪。其封德安縣君。適都官員外郎宋充國。其封仁壽縣君。適屯田員外郎程嗣隆。其封永康縣君。繼適宋充國。其封德安縣君。適大理寺丞。館閣校勘趙彥若。餘未行。銘曰。

龐氏之先。實畢公裔。爲成武人。自公三世。成武之顯。公所自發。其發伊何。文武維烈。孰暴其武。萬兵以西。頓甲來歸。妥如嬰兒。孰施其文。亦旣入輔。風雨節時。樂其衆甫。逮公去位。天異載仍。天子曰咨。丐言予聽。公曰大器。維承之艱。豫建太子。萬世其安。公過京師。公曰臣老。天子謂公。公力尙少。其往爲予。更撫予場。豈無威名。以奠疆域。公休于家。大事數問。公喪未行。忽出審訓。孰不相將。曾莫如公。君臣始終。令問何窮。隧有豐碑。行者下拜。史臣作詩。以示千載。

華陽集卷三十六

神道碑

宋元憲公庠神道碑

治平三年四月辛丑。司空致仕、鄭國公薨于京師。時天子方以裁異避殿。有司誤奏母臨喪。乃作挽辭。二章以哀之。爲廢朝二日。贈公太尉、兼侍中。諡曰元憲。五月丙寅。天子成服于苑中。百官慰殿門下。其年十月己酉。葬公許州陽翟縣之三封原。是日又廢朝。旣葬。御篆其碑曰忠規德範之碑。旣又詔太史臣珪以銘其碑。臣珪方修仁宗皇帝實錄。自契丹再盟。陝西亦罷兵。其後天子益鄉文學。興禮樂之事。當是之時。觀公一用經術以相仁宗。而天下俗吏之務不至于朝廷。顧其功豈不茂哉。夫創業之相。名易彰。守成之相。迹難見。在漢丙魏。嘗有聲于孝宣之世。然推其術。不過能以故事而奉行之。亦未有蹕絕見施在民者。惟公始終之行事。實邁前人。而又得天子所褒如此。不刻之金石。則無以顯大于後世。臣幸得執史筆。奉明詔。其敢以孤學自辭。謹按公諱庠。字公序。開封雍丘人。自其高祖紳。嘗爲唐御史中丞。其後三世仕不顯。曾祖駢。爲漢兗州乾封縣令。祖耀。爲周壽州霍丘縣令。父玘。端拱二年。以明經及第。治獄有陰德。終荆南節度推官。自公顯。曾祖而下。皆贈開府儀同三司、太師、中書令、兼尙書令、封齊、楚、秦、三國公。曾祖妣王

氏繼丁氏。祖妣賈氏。妣王氏。繼高氏。鍾氏。朱氏。封齊、魏、楚、梁、漢、晉、秦、燕八國太夫人。公寔鍾夫人所生。少篤學。遭父喪。寓其家安州。夏竦爲州。一見公所爲文。大器之。仁宗在亮陰。詔禮部貢舉。公與其弟祁皆奏名廷中。已而擢公爲第一。亦置祁甲科。于是天下學者以宋氏兄弟爲師法。天聖二年。釋褐。爲大理評事。同判襄州。召刪定本朝令。遂試學士院。除太子中允。直史館。判登聞鼓院。爲三司戶部判官。丁母憂。服除。遷太常丞。判戶部勾院。同修起居注。遷左正言。會郭皇后廢。以諫官伏閣爭。不可得。坐罰金。尋同知禮部貢舉。天下士至私慶。而材者皆自以爲有得。已而拔收髦雋。比異時爲多。乃知制誥。判登聞檢院。又攷試賢良方正科。公言。朝廷取異士。當令有司設幕。供以飲食。不可與武科同試。皆從其言。知審刑院。會知蘄州。王蒙正誣知蘄水縣。林宗言。臯殊死。公曰。蒙正本富人子。且倚后家。所爲多不法。可使其志得逞乎。更請御史訊其獄。而道逢蒙正遣人齎寶賂入京師。御史并收按之。返使坐法廢去。又密州富民王澥者。私釀酒其家。鄰父率其子發之。澥給奴以爲盜。使盡殺其父子。州以死論奴。公曰。其使殺人者澥也。況奴爲所給乎。時宰相亦欲出澥死。公力爭之。澥乃死。他日裁異數見。宰相惟能開觀寺。謂爲民祈福。公言。裁異之來。所以戒政事。今設樂于庭。又使民縱觀優慢之戲。恐未足以致嘉應也。奏罷之。權判吏部流內銓。歷太常寺、鴻臚寺、國子監、昭文館、進尚書刑部員外郎。其在鴻臚。言四夷朝貢。請圖其人物衣冠。問其道路遠近。與夫風俗好惡之異。藏之有司。明年。除同知樞密院事。宰相以故事。知制誥未有除二府者。卽召入。

翰林爲學士。又明年，遂拜右諫議大夫，參知政事。先是趙元昊反，劉平、石元孫皆以輕敵失軍，因詔中書兼筦樞密院機事。時緣邊諸帥官重者，互領陝西四路，以故號令頗不一。又兵多分屯堡障，公言五大不在邊，五細不在廷，宜使大帥收重兵內地，他帥自當一道，緩急有警，則舉兵四攻之。其議久不決。後卒如公計，方朝廷多故，其下詔令及答蕃書，皆須公所裁。公自以材術得進用，天下事有未便者，數論上前，于是爲宰相所忌。會同榜鄭戩爲樞密副使，葉清臣權三司使，或亦謂不可並據要職者，遂俱罷。公得知揚州，踰年爲資政殿學士，知鄆州兼京東西路安撫使，進給事中。先是盜起京東，迹所連逮者捕繫滿獄，公使一切縱去，後往往得賊區處以告，於是募里諸生數十人，自疏賞格示之，或曰諸生且安用也，公不聽。卒慰遣之，凡捕誅百餘人，盜乃息。諸生皆以賞得官，遂大興郡學，禮師儒，又作詩以風厲之。郡人刻其詩學舍下。慶歷五年，復拜參知政事。後帝召二府、天章閣觀書，出詔曰：問天下利病事，宰相倉猝莫敢對。公獨進曰：臣等皆待罪二府，固已總萬事而共謀之，不當下同諸生對策。必欲答清意所問，願至中書同上對。公旣退，草數千言立奏之，皆施用其言。八年，以檢校太傅、尙書工部侍郎爲樞密使。皇祐元年，拜兵部侍郎、同中書門下平章事，集賢殿大學士。明年，詔有司上明堂圖，又博攷聲律，更定天地、五方、神州、日月、宗廟、百神祭享所用樂。其秋，遂祀明堂，以公爲禮儀使，禮成，加工部尙書。初，公言：比有近幸之人，多緣內降得橫恩，宜因大祭之後，斥絕以新聖政。于是帝別爲手詔，與赦書同降。又言：頃詔文武三品以上官得

立家廟而有司不能明喻上意久之未立非所以美化也願詔禮官更議其制常欲用三司使張堯佐爲使相公執以爲不可旣而數上章願罷帝遂欲用公爲使相公固辭之迺以刑部尙書觀文殿大學士出知河南府兼西京留守司特定大學士雜俸又詔進見皆如宰相儀以戶部尙書徙許州兵部尙書徙河陽過朝京師方帝病少間臣下希聞德音及公來延坐勞問者久之嘉祐三年拜檢校太尉同平章事復爲樞密使兼羣牧制置使祫饗太廟爲儀仗使其年封莒國公間言祖宗收方鎮之權嘗欲畿甸蓄禁兵四十萬今所蓄不精且多外補戍更非彊本之勢又武臣用恩幸者多得任邊要而孤寒者常在東南至老無恩澤公乃作科條均其所入官而恩幸者滋不悅五年公數求去位不許公固請之除河陽三城節度使檢校太尉同平章事判鄭州明年徙相州卽言臣年及七十矣不可以重祿處閒地願乞骸骨以歸乃召公還以老蠲其拜舞公請不已英宗卽位以爲武寧軍節度使徐州大都督府長史加檢校太師徙封鄭國公旣又以爲景靈宮使公嘗有肺疾及奉仁宗諱一慟輒嘔血不止昭陵祔廟後願上印綬英宗每見公不以名且諭以初臨天下未可遽休大臣治平元年出判亳州居數月公請終不已聽以司空致仕享年七十一累階開府儀同三司勳上柱國功臣至更二十四號食邑一萬一千六百戶食實封四千六百戶其爲人端厚清畏進止有法度卽上有所問必據經以對退而未嘗與人言間或薦引士大夫惟恐其聞之不敢掠上恩其接賓客亹亹論文章不自休世皆尊名德而小人亦自遠門下嘗曰殘人矜才

逆詐恃明。吾終身不爲也。公初名郊。在翰林時。有指公姓名。傳以他說者。仁宗以語公。公因請更之。所著書。有掖垣叢志三卷。尊號錄一卷。國語補音三卷。紀年通譜十二卷。又文集合四十卷。夫人胡氏。贈殿中丞銑之之女。封陳國夫人。子男五人。充國。尙書都官郎中。均國。國子博士。其三人早卒。女一人。封壽安縣君。嫁太子右贊善大夫龐元中。孫八人。公與其弟祁尤相友愛。公出入將相久。而祁亦終學士承旨。宋興。弟兄以文學一時顯者。未有如公家。銘曰。

於皇仁宗。受天宜君。相孰有人。鄭公之文。帝曰汝來。予欲攷古。公則有承。不遠堯禹。其施維何。聲容被民。公有經術。毗予一人。誰不出處。公位將相。不顯鄭公。士夫之望。始其告休。公年未至。卒莫我違。以聽就第。乃保宏父。一品之章。聞有咨詢。據經弗忘。公奄不存。隱如皇席。天章爛然。以昭公跡。旣又錫公。篆于碑首。維碑峩峩。在許之右。史臣次之。矢詩不多。以視後人。遂以永歌。

高烈武王瓊神道碑

惟高氏始得姓于齊太公之後。歷秦漢以來。世固多徙而北者。王之先薊門人。方五代擾攘。李景盜據江南。數通使契丹。王之皇祖密國公者。與其子適。將敵命至。而景欲搆患中原。陰使人害密國公。聲言爲汴人所殺。遷其子濠梁。積厚報隆。乃有茲冀國公。知人事之變。舉其族內屬。占數于濠之蒙城。王卽冀國之中子也。諱瓊。字寶臣。少起田里。沈勇有大略。太宗尹京邑。聞其材武。召置帳下。太宗嘗燕罷禁中。太祖命

同升輦。至講武殿。出苑東門。太祖親扶上馬。時王與戴興、王超、李斌、桑贊等五人皆從。太宗醉不能穿馬鎧。王左手按輿。右手代鎧。既出。太祖顧謂王繼恩曰。此數人者。皆將帥之器也。特以控鶴冠帶及束帛賜之。太宗卽位。補御馬直指揮使。遷御龍弓箭直都虞候。太平興國四年。從征太原。押弓弩兩班。合圍攻城。太原平。太宗引兵自幽州還。聞敵兵盛至。留王夜作引龍真樂于御營。遲明。王度車駕已遠。乃謂衆曰。今敵在肘腋。若并力拒之。尚可馳潰圍中。不爾則不得脫。于是衆與王轉戰至行在。而六班率不至。及見王。數加勞存之。太宗欲誅六班。王曰。陛下晨夕兼行。令不密下。主將之罪也。今衛士皆以材勇選從。下太原有功未賞。盡誅之可乎。帝怒遂釋。擢天武軍都指揮使。西州刺史。又爲神衛左廂都指揮使。西州團練使。再幸大名。爲京新城內巡檢。會盧多遜遣吏私通秦王邸。坐失徼巡。降許州馬步軍都指揮使。適有亡命卒聚盜于界中。伺知州臧丙出。將刦庫兵以爲亂。王偵得之。卽白丙選從卒數十人襲賊。至榆林里。賊窮保民舍。王挺身登牆。賊酋號青脚狼者。將注矢射王。王引弓一發。應弦而踣。盡擒餘黨。丙上其事。稍遷御前忠佐馬步軍都軍頭。薊州刺史。會將北伐。以爲樓船戰棹都指揮使。部船千艘趨雄州。城易州。歷天武左右廂都指揮使。薊、富、二州團練使。端拱元年。與范廷召、王超、孔守正同時落權。王出爲單州防禦使。徙貝州兵馬總管。不數月。廷召等復進補軍職。王引領忽忽。內恩所不及。駙馬都尉王承衍鎮貝州。公主間入見上。頗知顧王厚。承衍屢慰勉之。明年遂制授侍衛親軍步軍都指揮使。歸義軍節度使。廷召等皆列

其下王自單州不一年蒙擢至此。而數爲殿前都指揮使戴興所咎。太宗謂興曰。朕自幽州還。便欲除瓊。此命蓋已遲十年已。及爲并代。馬步軍都總管。時潘美亦爲節度使。同在太原。舊制領軍職者班其上。王以美數戰有功。乃自陳原班其次而許之。以保大軍節度使爲鎮州行營都總管。又以彰信軍節度使爲太宗山陵都總管。復之并代。咸平中。契丹內寇。闕氏車帳至狼山大夏口。王方遣偏將王萬海等七人。擇兵異道與敵确。而自據要設伏以邀擊之。俄楊允恭持詔至。趣王出土門。都部署傅潛畏不出戰。旣得罪。乃以王代屯冀州。敵尋解去。明年召還。授殿前都指揮使。上鞭箭陳圖。眞宗賜對便殿。時言者以高陽之戰。范廷召等所領兵頗聞有不用命者。今釋不誅。後何以責死力。眞宗以問王。對曰。前日聖恩釋之。令其衆分隸諸將。一日聞召而欲誅之。方疆場多虞。儻衆懼而變生。臣竊爲國家憂。眞宗遽曰。微卿幾至誤事。王因言殿前諸班。捧日、天武諸軍。皆拱衛之兵。其數日益耗。眞宗曰。三司以邊儲不足。未暇增補也。王曰。臣興國、雍熙中。爲軍廂主。是時諸指揮皆滿五百人以上。若積計所闕軍食。固當有餘。三司曷爲不足。雖以其言爲然。而未能遽行。未幾。後殿選補諸軍班。王請于所絀中更選人以益之。或曰。上意所不欲。王固欲之。且典握禁兵。不懼疑至則身辱乎。王曰。吾以死許國。安復以疑自顧也。會馬軍都指揮使、權步軍司葛霸在告。管軍獨有四廂指揮使劉謙一人。王旣兼領二司。乃言臣老矣。如有負薪之憂。誰爲可任者。先期自殿前而下。各置副都指揮使。及都虞候。常有十人。職近事親。易以第進。又使士卒豫識其威名。緩急

臨戎。上下得以附習。此軍制之大要也。于是施用其言。景德元年。契丹直抵澶州。真宗北幸。駐蹕于韋城。大臣有勸上南巡者。召問王行幄。王惕然曰。且敵之大入。去國遠鬪。勢不可以持久。況羽檄召天下兵。行且至。進則可以決有功。今止軍不發。衆情大惑。誰爲陛下建此策者。真宗曰。將更議于大臣。王曰。天子親御六軍。蒙犯霜露。國之安危。事在轉漏。尙何議也。遂發韋城。次澶州。將抵浮橋。左右猶躊躇未進。王下馬。自扶輦。擁衆渡河。旣而請帝御北城觀兵。漢軍望黃蓋。皆仰呼萬歲。而敵人亦大呼。聲聞數十里。其種酋皆駭視失色。有頃。勁弩伏發。射契丹貴將死。遂奉書請盟。師還。賜燕于行宮。而李繼隆、石保吉、魏咸信、酒酣爭功。王曰。天子神武。一舉而折敵。公等何功之預也。繼隆等愧甚。已而賜黃金三百兩。他日衛士有白廩粟陳腐者。王曰。邊防戰守之兵。暴露寒苦。而所食之粟與鼓同色。若等日旣食大官。月所給又先進樣于上前。豈特諸軍比也。有一言以動吾軍者。斬。于是衆莫敢有言。其後王被疾久不出。輒有遺陳粒于殿下者。中貴人得以聞。人賜精米一斛。王歎曰。安有是耶。遂以疾辭典軍。章數上。拜忠武軍節度使。王素爲宰相。寇準所知。方澶州之行。勸上南巡者。王欽若也。準嘗叱欽若退而心甚恨。三年。準罷相。欽若知樞密院。王疾甚。真宗趣駕欲臨問。欽若乃言。天子問疾。所以寵勳臣。今瓊無破敵之功。不可往。帝勉爲止。其年十二月四日。王薨建寧里第。享年七十二。贈侍中。有司請輟視朝一日。終以王有舊勳。特輟二日。官給喪事。明年正月二十九日。葬開封府開封縣吹臺鄉建邑里。王儀狀英偉。不學古兵法。而臨變中機。奇密如

神典禁兵之日久。顧裨佐不足與計事。特以材自任。方其代傅潛提三路之兵。以數十萬。出入進止。其聽號令若一人。敵故憚王。終歲不敢近塞下。王善騎射。與士卒同食。賜予輒分其麾下。家無所餘。眞宗嘗問卿子幾人。曰。臣子十有四人。臣誠愚不肖。然未嘗不教以知書。于是賜諸經史于其家。每戒諸子。毋曲事要勢。以靳進身。自吾奮節行間。至秉旄鉞。豈因人力哉。又嘗論前後與吾同在宿衛者。孰最有聞。諸子以其所聞者對之。王曰。與蔚昭敏。李斌孰愈。諸子曰。此衆之所非也。王曰。吾嘗與此二人者言。其忠質一心。無銖髮敢欺朝廷。衆之所非。吾是以取也。王少時嘗醉臥田中。父夜往見有神人。擲金甲侍王之側。父竊奇而愛之。父沒。王負父骨十餘年。故其後子孫莫不以忠孝承家。嘉祐八年。王之曾孫女。進冊爲皇后。以故累贈至太師。尙書令兼中書令。秦國公。治平四年。爲皇太后追贈至衛王。王薨七十年矣。其葬也。弗及請諡于有司。熙寧九年。天子篤寶慈之養。而念王之功。乃親攷六家之書。以安民有功。曰烈。折衝禦侮。曰武。特賜諡曰烈武。又以王墓有窆碑而文未刻。乃詔臣珪述王遺休而刻之。旣又賜之篆。曰決策靖難。顯忠基慶之碑。嗚呼。何其盛歟。臣珪伏思。太宗之發燕南。眞宗之渡澶北。當是之時。王智有足過人者。一旦濟國家之難。以休兵靖民。顯名于後世。顧所施豈不閎哉。與夫自昔將帥。搃旗斬馘之事異矣。澤流子孫。與宋無極。殆神理之有相乎。曾祖冕。贈中書令。祖霸。贈尙書令。密國公。父乾。贈尙書令。冀國公。王娶李氏。追封魏國夫人。繼亦李氏。追封楚國夫人。子長曰繼勳。建雄軍節度使。贈康王。次曰繼忠。四方館使。榮

州團練使。次曰繼和。崇儀副使。次曰繼倫。西頭供奉官。次曰繼密。內殿承制。閤門祇候。次曰繼宣。天武捧日。四廂都指揮使。眉州防禦使。次曰繼隆。引進使。陵州團練使。次曰繼元。東上閤門使。嘉州刺史。次曰繼荀。右侍禁。次曰繼芳。供備庫使。忠州刺史。次曰繼顥。左侍禁。次曰繼豐。供備庫使。昌州刺史。次曰繼敏。內殿承制。次曰繼昌。西頭供奉官。皆已卒。女十二人。孫。西京左藏庫副使。遵度等六十三人。曾孫。左班殿直。士先等一百四十五人。四世孫。東頭供奉官。公庠等七十一人。來孫。右班殿直。世祚等十三人。銘曰。紹恢皇基。於赫神宗。憺我神武。繫王之雄。逮事眞宗。決策于河。敵駭枝披。奉書請和。王長六師。闕如虢虎。蒸徒暉暉。疇予敢侮。誰謂人遐。尙有遺烈。至今受祉。亦莫我遏。思齊曾孫。寶有慈極。天子仁孝。化及萬國。上方念王。幽州之功。澶州之畫。其利無窮。迺誅王行。迺銘王勞。作碑確嵒。在浚之郊。陟彼高岡。望王之塋。千載而下。其凜如生。

高穆武王繼勳神道碑

熙寧九年七月壬申。臣珪奏事殿上。皇帝曰。朕奉承聖序。方以天下致養于皇太后。而外家賞賜官爵。未嘗輒有所加。朕每興言禁中。太后數不許。嘗攷國史實錄。見高氏之世次。惟烈武王有子十四人。其長康王。于太后爲大父。歷事三朝。出征入衛。有夙夜之勞。王葬有年矣。而謚未告其第。碑未刻其阡。朕甚悼之。今特賜之謚曰穆武。其爲朕作康穆武王之碑。庸稱所以推崇太后祖考之意。臣珪謹按。王諱繼勳。字紹

先。自冀國公去濠適亳。三世爲蒙城人。王生亳之谷陽。少學兵法。好將帥之節。雍熙三年。以父任爲右班殿直。遷西頭供奉官。王儀狀動人。太宗召問其家世。擢寄班祗候。再遷內殿崇班。爲西京、陝、孟、懷、虢、路都巡檢使。時有羣盜保聚山川。吏久不能捕。王使勇士衷甲飾輜重。誘之轅轅道中。賊皆就擒。由是知名。咸平三年。王均據益州反。以崇儀副使爲益州兵馬都監。提舉諸州軍巡檢事。招安使雷有終以卒五百人授王。攻東郭二門未下。引兵與賊戰。彌牟塞其衆大潰。追擊至嘉州界。生擒賊百餘人。獲僞造黃繖、金塗槍而還。有終益以精卒。復攻二門。下之。賊退保子城。王大建麾幟城上。諸將知已拔城。于是有終進薄天長門。賊更出拒戰。時會莫。王謂有終曰。賊軍鄉罷急。擊之可有功。王乃從數騎往馳賊陳。身被數創。血漬甲縷。馬中矢死。復更馬以戰。入內都知秦翰以兵援賊。知不可拒。還走入城。王開圍縱之。均遂夜遁。翌日。王率有終撫循城中。封府庫。敕所部秋毫無犯。均旣誅。天子賜書褒諭。於是以定蜀功。進崇儀使。方王拔城。適有中使密傳詔曰。今賊嬰城自守。而久未下。外暴官軍。內弊百姓。顧其策安決。若縱之。使跳去。彼烏合之衆。安能久伏林莽乎。及均敗。正如聖略所出。居無何。賊黨楊承海謝才晟復收餘衆。保巖谷中。數招貸之不出。又以爲綿漢劍門路都巡檢使。王乃募里中惡少年。輒伺知賊動靜。一日徒步領輕兵馳歷阻險。徑賊所匿處。賊不謂王之至此也。方解衣自如。莫知計所出。王手格殺數人。餘麾衆盡縛之。蜀爲之無盜。王在蜀有威名。號神將。徙峽路兵馬鈐轄。還朝。陳用兵出入奇正之要。眞宗以爲能。改洛苑使。并代路

鈐鏑。景德元年，契丹犯河北，分兵犯河東。王至岢嵐軍，遇敵五萬衆，陳于草城川。王與知軍賈宗登山，上望敵軍，謂宗曰：「敵雖衆而鼓譟不成列，將無人也。」我領騎兵三千，雖不足與戰，候敵南去，當臨隘出奇以要擊之。彼前不得戰，退不得還，子可悉衆左右乘之，必大亂。已而王果得所欲，追殺至寒光嶺，斬首及自相騰轢以死者萬餘人，焚車帳，獲馬、牛、橐駝、器械蓋數萬計。天子復賜書褒諭，遷弓箭庫使、榮州刺史。是歲，朝廷與契丹約和。烈武王大有功于澶淵，明年爲麟府路鈐鏑，河外環列亭障，而宿兵多，轉餉給軍，間爲敵所鈔。王移軍扼險要，以斷敵關，而軍食滋不乏。會契丹新遣使朝京師，以知瀛州主雖以武功進，而天資達于政事，始至州，凡所設施，嚴而不煩。老吏縮手不敢肆，屬歲大饑，穀價翔起，卽召諸里富人謂曰：「今半境之人將轉而入之溝壑，若等家固多積粟，能發而濟賑之，若發濟州將之命，于是皆爭出粟。王亦以其直予之。」蒙活者萬餘人。明年歲物豐美，有甘棠連理者四本，郡人相與詣闕上其圖，誦王德政，求刻石。王奏止之。歷內藏庫使、宮苑使，奉使契丹。其國人見王爲人英偉，且知故烈武王之子，莫不加憚之。至不敢仰視。還知定州，徙延州、冀州，又徙貝州。乾興元年，復知瀛州，徙雄州。是歲，契丹坐冬燕京，大縱獵，涿易之野。忽候騎報敵將大入，緣邊皆飭爲備。王獨示之以無事。徐曰：「敵歲賴漢金緡，當內計利害，無敢輕出兵。已而果然。」渤海之畔賊者羣剽兩界中，傳信相驚恐。王因戒邊吏毋得輒往捕，第驅之令遠去。故終王所臨，寨下無生事。又歷東西上閣門使、昭隴、二州團練使，遂除捧日、天武、四廂都指揮使、連州防禦使。

又知瀛州。于是吏民無幼艾。皆鼓舞王之旌下。曰。不意三見我公之臨也。徙渭州。在渭三年。客有獻計者。曰。河南之人思漢久。以王之善用兵。千載之功可就也。王曰。我持守方隅。幸而無犬吠之警。乃敢爲邊生患耶。輒就遣之。更步軍馬殿前都虞候。拜步軍都指揮使。邕州觀察使。入宿衛。踰年。願復守邊。爲鎮定路馬步軍都總管。威武軍節度觀察留後。天聖十年。制授馬軍副都指揮使。保順軍節度使。明年。移節昭信軍。爲章獻明肅太后山陵。章懿太后園陵都總管。又明年。以年老上章乞骸骨。不許。他日召見便殿。給一子扶。俾勿拜。自陳少起兵間。未嘗以身自愛。今年老被病。敢苟生以顧祿乎。願陛下愛憐之。于是聽罷典軍。以建雄軍節度使。知滑州。王雖老。猶遇事精明。方河怒。嚙隄。王一夕坐隄上。調撻薪興築。而河怒爲止。滑人每過其隄而思之。王年七十六。是歲景祐二年。以七月二十七日薨。州之正寢。仁宗恫悼之。爲輟視朝一日。贈太尉。馳使護喪西還。其年十月二日。塋開封府開封縣吹臺鄉建邑之原。王忠愍有智略。臨機不輕發。尤善御軍。得士卒死力。故以少擊衆。未嘗不有功。其治民期盡人情之曲折。而略于用刑。今猶愛思之初。典禁兵。捧制書泣下。謂諸子曰。爾祖有大功朝廷。典此職幾二十年矣。未始有過失。我何功之有。爾曹念所以報國。惟有忠孝一節爾。家故宗族蕃。王則推心愛睦之。其賜冠昏喪祭無不及。曾祖霸。贈尙書令。密國公。祖乾。贈尙書令。冀國公。父瓊。贈太師。尙書令。兼中書令。衛王烈武其諡也。母李氏。魏國夫人。元配康氏。唐國夫人。繼室郭氏。陳國夫人。王氏。周國夫人。子男六人。長遵度。故西京左藏庫副使。次遵範。

故右侍禁閣門祇候。次遵甫。故北作坊副使。贈太師尙書令兼中書令、武功郡王。皇太后之父也。次遵約。故文思副使。次遵憲。故供備庫副使。次遵揖。故左班殿直孫、右班殿直士先等十六人。曾孫、右侍禁、公景等二十四人。四世孫、右班殿直、世祚等六人。臣珪旣述王碑。而工未就。乃八月庚戌。皇太后敕中使趣其文蚤上。且聞天子有詔賜碑。銘曰。克勤敏功。鍾慶之碑。臣珪曰。高氏之興。自烈武王有幽澶之功。至王西定蜀。北戰寒光嶺。爲國捍患。亦未嘗妄殺。惟陰施之及人者深。故天發有來。右我聖后。保翼天子。以母臨天下。則其所以追念王之前勞。而褒大之。豈與夫兩京外家恩澤富貴之擬哉。王之子孫。維孝維忠。蟬聯曼衍。而不可窮。今之爲世家言者。高氏盛矣。銘曰。

蒙城之高。世則崛起。銜訓自王。奮豈不偉。薊蜀燹賊。禾黍被野。四方旣平。澤及牛馬。豹尾神旗。以長六軍。歷臨八州。有惠在民。豈無虎臣。爲國爪牙。嶷嶷維王。能世其家。王發多祥。聿及神保。神罔不懷。使王壽考。誕鍾聖孫。以母天下。思媚周姜。京室以化。后未勝衣。顧王猶在。身履至尊。終念王愛。帝親母家。一門三王。子孫祁祁。申錫無疆。誰言恩腴。莫非外戚。人孰望王。世載乃績。述宣王碑。天子有命。萬紀猶新。用宏茲慶。

華陽集卷三十七

誌銘

賈文元公昌朝墓誌銘

治平二年七月戊寅。觀公殿大學士、尙書左僕射、魏公薨于京師。始公得疾甚。英宗命中貴人挾太醫晝夜調護。所以念之甚厚。及訃聞。是日休吏羣司。乘輿趣臨其喪。爲之泣下。乃詔輟視朝二日。贈司空兼侍中。其賻物加等。將斂。又賜龍腦水銀以納其匱中。八月甲寅。上成服于苑中。于是其家條具功狀上于太常。諡曰文元。熙寧元年八月庚申。葬于許州陽翟縣大儒鄉元老里之原。公諱昌朝。字子明。姓賈氏。其先漢長沙王太傅。誼之後。至唐僕射魏國公耽。復以儒學相德宗。而世爲滄州南皮人。後徙真定之獲鹿。曾祖緯。晉中書舍人。追封魯國公。祖璉。太子左贊善大夫。追封齊國公。考注。祕書省著作佐郎。追封晉國公。皆贈太師。中書令。尙書令。曾祖妣崔氏。封吳國太夫人。繼栗氏。封韓國太夫人。祖妣胡氏。封周國太夫人。妣史氏。封燕國太夫人。自晉國公始去獲鹿而葬于開封。今爲開封人。初。晉國公一夕夢。使者奉貂冠玉簡于大箱中。拜而受之。以告燕國夫人。明日公乃生。公少孤。母日教誨之。自經史圖緯。訓詁之書。無所不學。天禧元年。眞宗祈穀于郊。獻書車駕前。賜同進士出身。補常州晉陵縣主簿。引對便殿。以爲國子監說

書郎除江州德化縣令。孫宣公初判監，命學官各講一經，獨稱公所講有師法。一日往謁宣公，宣公遣人示唐相路隨、韋處厚傳，公讀已。宣公乃出見，公曰：「後當以經術進如二公，願少勉之。」天聖元年，兼潁州郡王院伴讀，遷大理寺丞，以殿中丞知常州宜興縣，徙知龔州。以母老辭，得監在京廣濟倉，翰林學士徐奭權知開封府，舉公知東明縣，遷太常博士。是時宣公且老，數辭講禁中，乃薦公爲代，召試中書，而參知政事陳文惠公與公有親嫌，言公年少，未可入侍經筵。宣公復言：「先朝用晏殊、宋綬，知制誥皆年未三十，朝廷用人可悉限以年耶？」然文惠終抑之，徙通判綿州。又以母老，得監在京永濟倉。明道元年，遷尙書屯田員外郎，復爲國子監說書。方章獻皇太后稱制，詔避彭城郡王名，公言：「在禮母之諱不出宮中，今天下爲太后諱其父名，非所以尊宗廟。」初不報。及太后上僊，乃用公言罷。景祐元年，擢崇政殿說書，俄加直集賢院，判尙書禮部。天子方嚮文學，每授經之際，多詢質疑難，公因請以聖問所及政教道義之言，令講讀官悉綴錄之。以上史館，于是作邇英、延義二閣，注記。三年秋，太平興國寺災，而議欲復修，公言：「比年京師觀寺屢災，此天佐興王者，故數下災異，以誠告之。願陛下側身念愆，以思答天之實。」于是遂止不修。再遷司封員外郎，天章閣侍讀，判太府寺，爲史館修撰。天子每祠南郊，必先謁景靈宮，乃齋太廟，公言躬享景靈宮，初用唐朝獻太清宮故事，事出一時，不足以爲法，請須郊祠還，然後行謁謝之禮。下議有司不合，乃寢。趙元昊叛，延州總管劉平敗于北川，或言平實降賊，朝廷以兵圍平之第，公言：「王繼忠陷賊中，先帝遇其

家反厚。及契丹約和。繼忠預有力。今計平豈遽降。而先收戮其家。使平果存。亦不得還矣。卽詔弛圍兵。旣而果得平戰沒之狀。乃厚恤其孤。遷禮部郎中。康定元年三月丙子。大風晝冥。詔罷春燕。公言。今災變屢見。初莫不恐懼。已則泰然。謂無事。竊攷災異之所從。固不虛發。願陛下修飭五事。以當天心。雖罷春燕。恐未足以塞災異也。居數月。權知制誥。權判吏部流內銓。爲館伴契丹使。河北旱蝗。爲體量安撫使。旣還。條所以制邊之策甚備。其言擇守宰。習鄉兵。治塘泊。紓徭役。繕甲壘之類。皆當時施用之。除龍圖閣直學士。兼侍講。權知開封府。有禁衛卒告軍中斂率緡錢。本屬以其事移府。衆皆伏府門。惴恐不自安。公止詰其告者。不實坐之。餘置不問。仁宗大然之。爲南郊頓遞橋道使。時西疆未寧。詔公護行在。以察姦匪。知開封府。不侍齋祠。自公始。慶歷元年。遷右諫議大夫。權御史中丞。充理檢使。侍講如故。自唐羣臣見謝辭。皆過天子正衙。五代草創。過衙乃在其後。公始釐正之。未幾。詔公與三司官吏減省浮費。前此公上疏言。國家用度素廣。而民力不足。日者屢詔有司省節浮費。未聞卓然施行。今陝西用兵。而無先事之備。竊爲國計憂之。願較景德以來。訖于景祐。財用出入之數。約祖宗舊制。其不急者。一切省之。至是。內自宮掖。外及權貴。而下歲省用凡數百萬。駙馬都尉。柴宗慶前在鄭州。縱其下擾民。及遣使問狀。而託疾不卽應。更請出爲郡。公劾奏。宗慶託國肺腑。而所爲不法。復使爲郡。恐益爲民患。于是詔留宗慶京師。侍講林瑀上會元紀。且言。推帝王卽位。必遇辟卦。而眞宗乃得卿卦。公奏。瑀所學不經。不宜備顧問。遂絀之。契丹遣使求關。

南之地。且議和親。復爲館伴使。公言和親辱國。而尺地不可許。議者又欲以金繒啗契丹。而使平夏州。公言吐蕃尙結贊欲助唐復京師。而宣公數諫止之。後得諜者。乃朱泚賂吐蕃欲使陰爲之援。今契丹乘元昊叛。有求于我。未必遽肯出兵。就使兵出。而小有勝。何以塞其貪驚之心。時方命公使契丹。于是力辭其行。又言近歲恩倖子弟。非有橫草之功。而坐取武爵。乘邊隅無事。猶以自容。一旦西方用兵。以千萬卒之命。爲庸人驅之死地。豈不可憤哉。願思所以修內治外之術。以銷難未然。復陳備邊六事。帝嘉納之。三年。遂參知政事。明年以檢校太傅。尙書工部侍郎。爲樞密使。又明年拜同中書門下平章事。集賢殿大學士。兼樞密使。纔兩月。拜昭文館大學士。監修國史。提舉編修唐書。陝西旣罷兵。公遂還樞密使。因言近歲國馬耗。而河西蕃部馬不至。請樞密使兼羣牧制置使。如先朝舊制。從之。會詔有司議章獻。章懿。章惠。三后升祔之禮。令中書門下攷詳其事。而禮官或援古不同。公乃酌羣議而奏曰。恭以章獻皇后。母儀天下。章懿皇后。誕育聖躬。宜如祥符升祔元德皇后故事。配食眞宗廟室。以稱陛下追孝之意。章惠皇后。于陛下有慈保之恩。義須別祠。伏請享奉慈廟如故。于是命公攝太尉。奉二主行升祔之禮。已而將下德音。內出密封。中外文武官皆遷官。諸軍皆特支。公獨匿其事。卽奏以爲不可。雖同列莫與聞者。明日。惟在京諸軍與特支。又詔二府特遷官。公又以爲不可。乃已。七年春大旱。公引漢災異册免三公故事。願上丞相印。意甚確。遂拜武勝軍節度使。檢校太傅。同中書門下平章事。判大名府。兼北京留守司事。河北安撫使。公旣

辭。賜燕國太夫人銀飾肩輿。士大夫以爲榮。貝州妖卒王則叛。初。則約連河北京東數州之兵。欲南斷浮橋。以據大名。事未及發。會有白衣遮公馬首。自言少遊跪泉山。能言國家休咎之事。公疑而詰之。乃得所挾書。實貝州叛逆也。其黨知事覺。于是嬰城自守。公命高陽關路總管王信。大名府路鈐轄郝質。眞定府路鈐轄孟元。將六部兵二萬。趣城下。並遣穴城匠作車洞。距闔以攻賊。公亦屢請行。朝廷賴公威名。在大名不許。及破賊。以功爲山南東道節度使。檢校太師。進封安國公。其年日官言太陰犯畢距星。又掩其大星。公因言畢昂之間爲天街。其陰外國也。其陽中國也。顧其警必在季秋之分。因攷歷代所占。凡十二事。上之。會歲饑。民大疫。公爲置病方給養之。全活九十餘萬。契丹募亡卒之勇伉者。得五百餘人。號投來南軍。驅以戰西羌。邊法雖歸亦殊死。公乃檄邊郡。凡投還者一切貸貫。後有還者更與遷補。契丹聞之。遂除其軍不用。邊民之貧者多避賦繇。以其地質敵人。因而寢爲敵所侵。公爲設法。聽旁近戶之有力者贖之。歲餘悉復其地。契丹使來。每道公境。必斂服自飭。且戒其徒御毋得有所犯。公嘗言河自橫隴之決。分流德、棣、恩、滄數州。而歲爲害滋甚。按九河旣湮。惟行漯川之道。歷代雖徙決不當。然不越濮鄆之北。魏博之東。今其道歷朝城由蒲臺入海者。此禹漢遺功也。請復河故道不報。明年河決商胡。水環大名。公乃繪漯川、商胡爲一圖。復條其利害以聞。詔遣三司副使鄭驤行視其地。還言功大不可就。乃止。皇祐元年。以燕國太夫人春秋高。願徙鄭州。及入覲。乃以爲祥源觀察使。公不敢以將相留京師。屢請還節。除觀文殿大

學士、尙書右僕射、判都省。再提舉編修唐書。其冬以右僕射復除山南東道節度使、檢校太師、兼侍中、判鄭州。凡六上章乞罷僕射兼侍中。復拜同中書門下平章事。詔公子四人皆遷官。固辭之。明年丁母憂。會大雨。奉喪徒行數百里。詔屢起之。公懇斬終喪。給以宰相俸之半。辭之。給以僕射俸。又辭之。于是賜黃金三百兩。服除。判許州。仁宗召公邇英閣。問易之乾卦。旣講陳之。翌日又爲手奏曰。夫乾者。天剛健之德。當天下久盛之時。柔不可以濟。然亢而過剛。又不能久。惟聖人外以剛健決事。內以謙恭應物。不敢自矜。爲天下首。乃獲吉也。帝面出手詔以寵答之。仍以所陳卦義藏之史館。又言漢唐都雍。置輔郡以內翼京師。國朝都汴。而近京諸郡皆屬它道制度。不稱王畿。請析京東之曹州。京西之陳、許、滑、鄭州。并開封府總四十二縣。置爲京畿。遂興行之。公將行。命侍讀學士以下餞于資善堂。五年徙判大名府。復爲河北安撫使。是時博士李仲昌建議開六塔河。而水怒溢。隄陬不能禁。敗民廬舍。不可勝計。公復請疏河故道。且言故道士沃饒。多爲權右占耕。使者妄言功大不可就。于是又詔河北都轉運使、董沔行視之。言可就。然朝廷終不報。嘉祐元年。進封許國公。未幾加兼侍中。再任大名。尋拜樞密使。辭侍中。三年。以鎮安軍節度使、右僕射、依前檢校太師、兼侍中爲景靈使。其年復出判許州。七年以保平軍節度使、陝州大都督府長史。復徙大名。爲本路安撫使。英宗卽位。拜鳳翔節度使、左僕射。鳳翔尹進封魏國公。治平元年。自言臣老矣。不任事。願得徙閒郡。且還鳳翔節度兼侍中。詔不許。明年春。復徙許州。及入覲。上以先帝大臣。益尊遇之。公

亦從容言天下事甚衆。因固請還鳳翔節度兼侍中。卒不許。時京西大疫。特詔公候秋迺行。公既被病召。諸子謂曰。勢且革矣。尙欲尸重祿耶。于是復請。乃復以爲觀文殿大學士。判尙書都省。踰月公薨。享年六十八。公爲人外端重而中裕。雖燕居未始見愠喜。然于臨事。其色不可奪。少好學。至顯貴未嘗一日廢書。不觀其于古今治亂。天人災祥之學。無不該貫。故指政言事。切而不迂。其爲政樂易而不苛。前後累鎮許。魏。民皆見思。圖其像學舍而生祠之。爲文粹衍有法度。字畫尤婉奇。公在外。仁宗嘗特遣使。賜三朝御書。凡百八十七軸。其歷崇政殿說書。天章閣侍講。觀文殿大學士。皆仁宗爲公特異之。初奉詔刊修廣韻。爲集韻。因請修禮部韻。略其窄韻。凡十有三。聽學者附近用之。又請修唐書。及復禮記鄭氏所注月令。以李林甫所解唐月令別行。著本朝時令十二卷。羣經旨辨十卷。春秋要論十卷。通紀八十卷。奏議三十卷。文集三十卷。公初娶王氏。尙書兵部郎中集賢殿修撰軫之女。封莒國夫人。再娶陳氏。武信軍節度使康肅公堯咨之女。封魏國夫人。後公二十九月而薨。六男子。章終太常博士。集賢校理。圭尙書比部員外郎。田終尙書駕部員外郎。青尙書司門員外郎。齊太子右贊善大夫。炎太常寺太祝。三女子。長適尙書比部員外郎程嗣弼。封壽安縣君。次適太子右贊善大夫宋惠國。封崇德縣君。次適尙書都官員外郎龐元英。封壽光縣君。孫男十八人。公祚。公路。公定。公弼。並光祿丞。公度。大理評事。公裕。公盛。公述。公望。並太常寺太祝。公孺。太常寺奉禮郎。公靖。太廟齋郎。公秩。公密。公詠。並未仕。公正。公亮。公迴。公嚮。早卒。曾孫男一人。始

公葬晉公于開封。以其地下汙。將改卜于許。而公薨。今遷晉公而偕葬之。以成公志。云銘曰。維賈氏先。出傳長沙。有唐魏公。又移厥家。自公之考。始去獲鹿。公又食魏。不遐以續。公昔尙少。其瀋中閤。獻書路旁。迺發厥聲。始爲學官。終日默如。逮其授經。聽者羣趨。卒用所學。入講殿中。帝曰。汝來有發予聰。遂相仁宗。左右經術。豈無衆訾。其勢不屈。公于出處。以靖以夷。魏許之政。而民思之。再筦樞衡。越歲又遷。維是嘉謀。有來上前。天清日華。聖子有作。魏公來朝。猶陳舊學。間不見公。遽不能起。乘輿卽臨。泫然出涕。公位將相。不爲不榮。矧曰黃髮。道德之英。曾誰如公。篤其終初。以示萬世。維實維孚。

唐質肅公介墓誌銘

熙寧元年正月。制以權三司使。給事中唐公爲參知政事。明年三月。遽寢疾不朝。上遣太醫日夜視公疾。四月乙未。幸其第臨問。公寢劇不能言。上泫然出涕曰。能復爲朕起乎。明日公薨。乘輿復臨奠。哭之慟。廢朝二日。贈禮部尙書。其家上狀于太常。而博士安燾議以公正而不阿。剛而能斷。請諡曰質肅。旣而判尙書都省。司馬光與其屬一百五十有七人。皆請如其議。四年二月辛酉。葬江陵龍山之東原。前此其孤以余職在太史。使人來京師。求銘以納其墓中。且余觀公之所以進。所以黜。其節皆有足以動後人。故爲序而銘之。公諱介。字子方。其先晉昌人。唐末避亂于餘杭。自其祖始徙家江陵。今爲江陵人。公年甫十三。父卒。官漳州。家貧。州人有欲賻助之。公皆辭不受。及歸江陵。閉戶讀書者七年。其爲學務窮聖賢大原。不以

辭律自羈束也。天聖八年進士及第。爲鼎州武陵尉。又爲岳州沅江令。州民李氏距有貲。吏數以事動之。既不厭所求。迺言其家歲殺人祠鬼。會知州事孟合喜刻深。悉捕繫李氏。家無少長。榜笞久莫伏。以公治縣有能名。命更訊之。公按劾無他狀。合怒。以其事聞朝廷。詔遣殿中侍御史方偕徙其獄于澧州。已而不異。公所劾。其後州吏皆坐罪去。偕以活死者得官。公終不自言也。改武康軍節度推官。知夔州奉節縣。方陝西用兵。詔舉三路知縣。公用薦者得遷著作佐郎。徙莫州任丘縣。自契丹約和。遣使往來歲不絕。凡誅索百出。驛吏比多破產而去。公嘗坐驛門上。戒曰。自今非當所餽物。一切毋得供。有輒壞什器者。執之必以法。繇是過公境者。無敢有所擾。緣邊塘水夏秋害民田。中人楊懷敏用事。欲取縣西十一村之地以瀦漲水。吏畏執不敢言。公爲募丁夫自高陽築隄以障之。至今以爲利。丁光國太夫人憂。服除。以祕書丞知相州安陽縣。徙通判德州。河決商胡。大爲河北患。前宰相賈魏公鎮大名。上潔川圖請復河故道。朝廷適遣使行視其地。衆莫敢輒議。公獨抗言曰。故道之堙久矣。尙可復耶。聽者皆蹴然。轉運使崔嶧以庫帛配民。而過估之。公卽移書安撫司曰。河北仍年被水災。民困不聊。轉運使不爲之卹。然則爲上存民者不在安撫使乎。嶧聞怒。按其留牒不卽下。公終不從。嶧亦不能果行。遷太常博士。又徙通判廣信軍。召爲監察御史裏行。改尙書主客員外郎。殿中侍御史裏行。賜五品服。內侍盧昭序造龍鳳車于啓聖院。內出珠玉爲之飾。公言太宗神御在啓聖院。不可慢。況爲後宮綺靡之器哉。帝趣令毀去。三司使張堯佐一日除宣

徽節度、景靈、羣牧、四使。公與諫官包拯等七人力爭上前。既又請御史中丞留百官班。卒奪堯佐宣徽、景靈二使。頃之復除宣徽使。公獨爭之不可得。求全臺上殿不許。自求貶亦不報。于是劾奏宰相。并言諫官附會事。其言無所避。帝怒。急召二府以其章示之。公猶立殿上不去。樞密副使梁適叱公下殿。卽貶春州別駕。明日改英州。又明日罷宰相。遂諫官。當是之時。公卿大夫莫不相顧驚動。天下之人識與不識。皆咨嗟稱詠而不能自己。公雖斥。其名遂重于一時。踰年授檢校水部員外郎、全州團練副使、監郴州酒稅。復祕書丞、主客員外郎、通判潭州。又復殿中侍御史裏行。知復州。道改殿中侍御史。充言事御史。帝特遣內侍齋告勅賜之。公至不以一語自明。帝曰。卿被謫以來。未嘗以私書至京師。可謂不易所守矣。公第頓首謝。他日因對曰。臣言不行。將固爭。爭之重。以累陛下德。以言職辭。乃以爲工部員外郎。直集賢院。權開封府判官。出知揚州。賜三品服。徙江東轉運使。御史裏行。吳中復上言。公方正有守。不宜久在外。時文潞公復爲宰相。因奏曰。唐某之疏。臣事固多中。初以貶太重而未得蒙顯擢。宜復召用之。止改戶部員外郎。河東轉運使。西人盜耕河西田。而知麟州武戡謀築堡以限其侵地。會西人兵猝至。官兵皆戰歿。旣罷太原帥。以公權領帥事。于於大發兵境上。以張軍勢。且戒邊吏毋得與互市。西人數窘。果遣人來。願得更定封土。實出公策。歷淮南、江浙、荆湖。制置發運使。三司度支副使。遂除天章閣待制。知諫院。同提舉萬壽觀。同詳定禮儀。奉使契丹還。進禮部郎中。權發遣開封府事。嘗援天禧故事。請增置臺諫員。以廣言路。又言。比

詔諸路監司薦舉人而多得文法小吏。無以裨盛化。請令中書、門下、慎擇端良敦樸之士。毋令與儉薄者並進。乃稱明詔。凡內降恩澤。事不關中書。此皆婦人女子甘言悲辭之託。以亂聖德。宜早抑絕之。宮禁嬪御賜予之費。多先朝時十數倍。且日加無窮。亦當有所損減。堯國公主夜開皇城門。昔漢光武帝出獵。還從中東門入。明日貶中東門候。蓋宮門之禁。以備非常。今公主所過。內外宮殿門主吏。宜重劾罪以聞。夫賞罰不可私于人。孫沔、呂溱前坐縱侈不法。而皆過貸之。若爾在下者。恐未易懲也。天下刺配人日益蕃。至死不得赦。在例則不然。可量所犯輕而數更赦者。聽自便。庶幾廣上恩。仍令有司更議刺配法。帝多開納之。會御史中丞言宰相宰相方就第待罪。御史中丞輒自去官號。召不出。公乃與臺諫官連章請辨是非。既黜御史中丞。公亦自請外。迺以知荆南。知門下封駁事。何郯封還所下勅。未幾。又論新除樞密副使不當進。其事久不決。公論列不已。卒罷新樞密副使。出公知洪州。翰林學士胡宿等七人皆上書願留公。不可得。明年拜龍圖閣直學士。河北都轉運使。英宗卽位。遷吏部郎中。以樞密直學士徙高陽關路安撫使。知瀛州。召爲右諫議大夫。權御史中丞理檢使。英宗面諭曰。卿在先朝有直聲。今出自朕選。非繇左右言也。公曰。臣無狀。蒙陛下過聽。臣竊思自昔欲治之主。亦非求絕世驚俗之術。要在順人情而已。祖宗之遺德餘烈。在人耳目。固未遠。願陛下覽已成之業。以爲鑒。收羣慮之策。以爲知。則天下不勝蒙福。居數月。又以爲龍圖閣學士。河東路經略安撫使。知太原府。初代州岢嵐軍敵騎時入鈔邊。公則大合諸將兵盡

驅之使遠去。毀敵所置堡寨。西人寇大順城。環慶路檄出兵以牽制賊勢。公曰。敵小人。一方固自可支。若此道遽出兵。又生一邊患不息也。公在太原三年。嘗戒邊吏務從容持重。毋得輕出兵。故終公之去。塞下無少事。今天子嗣位。遷給事中。權三司使。罷京師增官屋僦錢。復汴河漕舟。以轉江湖之粟。其與言政事。議論益有所感發。上或以某事爲是。公輒曰。非。進退天下士大夫。皆直言其可否。不避怨。不立恩。其年上欲親祀南郊。議者或以居喪爲不可。上未知其所從。以問大臣。公對曰。古者天子諒闇之禮。與下不同。況郊有定歲。其可以卑而廢尊。及下議兩制。莫不如其言。公天資剛直。其在言路久。名敢言。自非有益于朝廷。亦未嘗言。其爲政。則寬靜而有體。位顯矣。奉養猶若平素時。始公薨。上至其家。見畫象不類公。卽命中使取禁中舊傳本賜其家。素見重如此。享年六十。曾祖諱仁恭。贈太子太保。妣盛氏。追封英國太夫人。祖諱渭。贈太子太傅。妣夏侯氏。追封崇國太夫人。父諱拱。贈太子太師。妣二崔氏。追封嘉光二國太夫人。娶楊氏。封京兆郡夫人。正家有賢德。五男子。淑問。殿中丞。監察御史裏行。義問。大理評事。待問。早卒。嘉問。之問。並太常寺太祝。二女子。以歸淮南轉運使。屯田郎中謝景溫。衛尉寺丞王泰。六孫男子。懋。太常寺奉禮郎。愿。恕。意。愚。並祕書省校書郎。馮。未仕。銘曰。

唐初晉昌。晚徙于荆。代雖繼食。未侈厥聲。有聲輝皇。實公自發。其蓄有來。公發莫遏。凡位在下。難見節義。公獨嶄嶄。言駭衆視。誰薦諸朝。行御史中。以卑犯顏。萬死不容。繇天子明。卒起荒陋。歷凌阻夷。豈不一守。

迺貳政事。其心益丹。天子曰可。公曰未安。進退賢否。不問黨讎。人莫我私。我德不求。誰其中止。猶未大施。帝心念公。趣駕再之。既見公象。曾莫公及。出圖殿中。嶷若廷立。其孰如公。譽榮初終。葬豈云遠。祖考是從。南望章華。左雲土夢。公名不亡。萬世之重。

邵安簡公亢墓誌銘

公諱亢。字興宗。丹陽人。幼聰發過人。方十歲時。已能日誦書五千言。其爲賦詩縱豪。自鄉里先生。見皆驚偉之。兩試進士于開封府。皆誤用韻。弗中。然而有司攷其文皆第一也。范文正公舉應賢良方正科。時布衣被召者十四人。既試祕閣。獨得公一人。及試崇政殿。除建康軍節度推官。會有欲中傷宰相者。迺密言公與之連姻。命遂中格。人莫知所以然。蓋宰相張士遜子娶邵氏。邵偶與公同姓爾。宰相既不能自辨。公亦無言而去。趙元昊反。兵出數不利。于是詔求方略之士。公以爲用兵在于擇將。今天下久不知戰。而所擇多儒臣。未必能應變。武人又老而得至長一軍。詎能身先矢石間哉。起故家恩倖子弟。彼安識攻守之計。況將與卒業不相附。又無堅甲利兵之禦。此不待兩軍相當。而勝敗之機固已形矣。進康定兵說十篇上之。又召試祕閣。授潁州團練推官。晏元憲公出守。事一以屬公。民稅舊移輸于陳蔡。轉運使欲覆折緡錢而加取之。公言民之移輸。勞費已甚。今仍歲水旱。而加取于民。不亦重困乎。事迺止。入爲國子監直講。歷光祿大理寺丞。館閣校勘。同知太常禮院。張貴妃薨。下有司議立陵廟。禁樂京師一月。公累疏論之。

遂弛樂亦不立陵廟。同判吏部南曹。改太子中允。仁宗皇帝繼嗣未立。公以爲國之外患在邊敵。然禦之之術。不過羈縻勿絕而已。內患則繫社稷之安危。不可不蚤定。昔漢文帝入繼之年。未立后。先立子。蓋所以定大本消禍源也。於是集漢以來帝系承襲之迹。上興亡譜論十卷。俄丁母憂。願還一官以追封其母。朝廷許之。封其母孝感縣太君。服除。再以爲太子中允。公固辭。除集賢校理。判登聞鼓院。爲羣牧判官。賜五品服。權開封府推官。徙提點府界諸縣鎮公事。比有放火者。一不獲。則主吏皆坐罪。民自薨其所居。欲以中吏。公請自今非延及旁家者。雖失捕得勿坐。已而火亦息。又爲開封府判官。府吏馬遷。馬清者。素狡獪。人憚其能動事。號二馬。公遽迹其姦狀。而遠竄之。爲三司度支判官。接伴契丹賀乾元節使。旣至德清軍。會仁宗上仙。有欲卻之者。又欲其至國門而去。議未決。公言。不若令奉國書置樞前。因使得見上。以安遠人心。詔從公言。其年遂使契丹。治平二年。爲潁王府翊善。直史館。同判司農寺。英宗召對羣玉殿。訪以當世治務之要。謂公曰。學士眞國器也。明日見宰相。其言亦如此。累遷祠部員外郎。同修起居注。兼判尙書禮部。嘗言陛下初政。欲治天下。必自正家始。今皇子授室。願于古婚禮不可廢。公主下嫁。不可殺舅姑之尊。以屈人倫之序。帝深納之。今上在潛邸。一日自禁中還。道帝語曰。以翊善端直朴厚。已輟爲諫官矣。卽爲公頓首謝。公欲辭不獲。授知制誥。知諫院。賜三品服。公曰。夫進諫之匪難。而言從事施之爲難。今言者闕于事情。未必欲其言之行。徒自要名譽而去。願于上何補哉。決不敢爲此也。繇是公數言無不從。今

上爲皇太子兼太子右庶子及卽位以爲龍圖閣直學士兵部員外郎同知禮部貢舉又嘗言殿前都虞候竇舜卿親連樞臣不可使典禁衛簽書樞密院事郭達材望輕不可使宣撫陝西時御史中丞王陶彈宰相外朝不立班參知政事吳奎反劾陶曰者陰陽不和實由陶所致上令陶與翰林學士司馬光兩易之而奎輒指手詔爲內批留三日不下公疏曰御史中丞職在彈劾陰陽不和咎由執政而奎所言顛倒失大臣體且陛下新聽政命出輒廢何以令天下上怒遂罷奎參知政事益眷公深以樞密直學士知開封府公遇事敏密吏操辭牘至前皆親閱之至于反覆人或以爲勞公曰決是非于須臾爾初雖勞後迺省也籍里閭惡少年與吏之廢停者一有所犯皆遷處畿下鬪訟爲之衰止府號難治而易以毀上公多得民所譽而稱之未幾爲英宗山陵頓遞使甫還拜樞密副使右諫議大夫會种諤以兵取綏州又橫山部落思內附遽欲招來之西人怨漢深乃誘殺知保安軍楊定拒詔使境上朝廷命大臣欲行西討公曰方天下財力殫屈未可以用兵宜且諭邊臣無過生事因撫存其人民若不從命然後兵出益有名旣而諒祚死其子紖送殺楊定李文貴來請復和或欲乘此更取塞門之地公復曰苟得之則可不然徒沮傷威命非策之得也果如公所料公雖蒙上知然論事與時多不合又言者間以傷公迺引疾辭位累詔不許迨祠南郊旣竣事又辭以資政殿學士給事中罷知越州上卽遣使就第所以勞存之良厚徙鄴州奏除山陵所假都水監腐爛材木免民破產之患增築湖河堤爲石澁節水以溉城中歲省科民槌薪數百

萬。又徙鄆州。兼京東西路安撫使。鄆衣冠之聚也。自倖車幕府。丞掾令尉皆其子弟。待歲月以相承。事至不敢發。民不勝其患。會有桑息錢以折取民產者。公亟以法外繩之。諸族自戢。熙甯五年春。上過東宮。邈然思舊臣。特遷禮部侍郎。又徙亳州。上嘗遣內侍馮宗道諭公。將復用。而公疾作。纔五日而終。享年六十一。初奏公疾。敕太醫馳視。既發而訃至。上閱傷之不勝。輟視朝一日。特將幣牢以致祭。贈吏部尚書。諡安簡。錄遺之恩加于典外。公始以羈孤自拔。及歷事三朝。位二府。顯矣。其爲人忠碩方靖。莊外而敏中。與人不苟合。爲治恕以明。故其去常見思其議論文章。堂皇溫雅。一時臺閣聞人。蓋有所不及。少歷躋瘴。及貴盛。始終無少易。祿入多以賙宗族。其終家無以歸。上爲治大第里中。所著文集一百卷。藏于家。公熙甯七年十二月二十五日終。明年十一月二十六日葬潤州丹陽縣上德鄉耿崗原。曾祖諱勳。贈太子太保。妣諸葛氏。追封安定郡太夫人。祖諱遇。贈太子太傅。妣湯氏。追封太甯郡夫人。繼湯氏。追封咸甯郡太夫人。考諱餘。贈太師。妣劉氏。追封建安郡太夫人。娶晉陵彊氏。封丹陽郡夫人。前公卒。子男二人。壘。祕書省校書郎。鰭。太常寺太祝。女二人。琬。適大理寺檢法官。太常寺奉禮郎葛奉世。琰。適楚州淮陰縣尉許安石。孫男一人。縉。將作監主簿。予少遇公于江湖之上。其後入朝與公游。蓋嘗聞平生之言。今公子以公治命屬予銘。予雖久不爲文。尙能爲公銘。銘曰。

公起江湖。礪礪瓌奇。竭來京師。聲發駸駸。迺敢論兵。其辭大放。孰不公聞。國器之望。公從東朝。左右道德。

大明朝升萬物下飾。公于此時進止雍雍。有謀有猷。天子是從。帝曰汝來。其輔予政。筦于樞兵。敵莫阻命。公雖在外。曷止予慕。尙冀公還。公卒不顧。公喪東歸。灑以御觴。其贈伊何。尙書之章。山之嶢嶢。水之滔滔。公歸何之。帝思是勞。

梁莊肅公適墓誌銘

公諱適。字仲賢。世鄆人。父爲翰林學士。卒時。公爲最少。未及仕。他日因類其父所爲制。詔奏議。并自所爲文上之。眞宗覽而嘆曰。梁某有子矣。卽除祕書省正字。天聖初。知開封府功曹參軍。故宰相呂夷簡知府事。時器公材。以薦諸朝。知蘇州崑山縣。知梧州。五嶺自僞命時。折民稅已重。其後轉運使以調用不足。又復折之。公言用殆不能輸。遂詔勿復折。至今以便民。還勾當在京諸司糧料院。累遷大理寺丞。通判泰州。廢港口待賢二埭。先是漕渠患水高。故置埭以節水。然歲渡舟多壞。而公私不以爲便。公因大發夫濬渠而廢之。明道二年。天下饑。淮南尤甚。公募大姓輸米。作淖糜以濟民。蒙活者數萬人。以太子中舍。監在京廣衍倉。景祐中。進士及第。換中允。知淮陽軍。京東歲常豫支錢市帛七十萬。後三司益至二百萬。公謂其法本以惠下貧。而抑兼并。今取多則傷農。況取之未能正。朝廷爲減其數如初。其年南郊。赦書錄朱全忠之後。公曰。全忠叛臣也。何足以爲勸。仁宗是其言。記姓名禁中。召爲審刑院詳議官。梓州妖人白彥歡。能依鬼神作法以詛人。至有死者。獄上請讞。皆以不見傷爲疑。公曰。殺人以刃或可拒。殺人以詛則其可免。

乎。卒以重辟論。會有異禽翔端門上。旣又下庭中。于是左右大臣莫不以爲瑞。公曰。野鳥來處宮庭。此何瑞也。間因得對。仁宗數以所上言稱之。御史中丞薦公材堪御史。中書以法未應除。明日欲用爲諫官。中書又以爲言。帝不懌。再遷太常博士。提點京東路刑獄。爲開封府推官。遂改右正言。諫院供職。管勾國子監。奉使契丹。新除樞密副使。任中師與公有親嫌。公辭爲諫官。乃以直史館判太府寺。同修起居注。經制陝西糧草。與知慶州范仲淹同議邊機十餘事上之。其言攻守之計甚長。還知諫院。前後嘗言。知樞密院夏守斌。經略陝西無功而還。不可復典機密。龍圖閣直學士張存辭知延州不行。更求他善郡。畏避不任。事宜卽見斥。入內都知岑守中坐賄貶光州。求削籍留京師。撓法不可許。鄜延路鈴轄黃德和望賊退走。陷二大將。宜卽誅塞下。河東欲卻降羌藏材族千餘人。夫勢窮歸我。卻之足甘寇心。脫納而撫之。後或得爲用。比來邊儲不充。欲施告緡令于天下。百姓紛然不自安。宜早停其議。北京大建宮闕。徒費無益。當有所裁節。祖宗時皆殿試進士。得人不爲少。今特殿試從南省奏名。則恩不在陛下。而在有司。且如舊制。便皆從公言。又嘗與御史中丞賈昌朝較景德以來迄于康定財用出入之數。內自宮掖。外及權貴而下。歲省浮費數百萬。慶歷二年。擢知制誥。判昭文館。知審刑院。契丹遣劉六符來報元昊欲納款。朝廷命公復聘契丹。已而元昊果令賀從勉。賫表至境上。又命公使延州。遂定元昊復臣之禮。入爲起居舍人。權判吏部流內銓。權發遣開封府事。判太常寺兼禮儀事。頃之願治郡。得知兗州。弛本州所產鹽禁。歲省鉗釵者

不可勝計。萊蕪鹽鐵，舊嘗十八冶，今所存惟三冶。戶猶破產而逃。公募有力者使主治，十年予一官。于是冶無破戶，而歲有羨鐵百餘萬。爲龍圖閣直學士，知河陽。又爲樞密直學士，鄜延路經略使。知延州。元昊旣稱臣，公遂徙重兵內地，復安定、黑水、園林三堡，置榷場于保安鎮，戎軍招還金明屬戶三千餘帳。元昊曰：「前所掠蕃漢生口，有誓詔兩不復還矣。」遣人屢索之。然而公卒不遣，告歸至鄆治葬事。過都，除翰林學士，尋改翰林侍讀學士，知澶州。又爲秦鳳路經略使，知秦州。斥近邊土田，募弓箭手自占，減戍兵東還。其非要害處堡障悉併廢之。又省西事以來益置官百餘員，更以一當十大銅鐵錢以當三，民間不復敢盜鑄，而物價以平。歷尙書禮部、吏部郎中，復知審刑院，爲同羣牧使，與翰林侍讀學士宋祁共定法寺所用斷例，務在重輕平。法例不得以高下。皇祐元年，拜樞密副使、左諫議大夫、明堂覃恩，進給事中。張堯佐自三司使除宣徽、河陽節度、景靈羣牧四使，臺諫官連上封不報。又力爭上前紛紜不能已。上諭令中書戒厲大臣，不敢言。公獨進曰：「臺諫官蓋自有言責，其言雖過，在陛下所容。然寵堯佐太厚，亦非所以全后妃之家。」遂奪堯佐宣徽。景靈二使取戒厲乃不行。廣源州蠻儂智高舉兵犯邕州，又犯沿江九州，進圍廣州。官軍數戰不利。上欲遣使招安，會廣州得賊將黃師宓僞榜，且言智高願得邕桂七州節度使。初欲予之。公曰：「若爾，二廣恐非朝廷所有。」臣不敢與聞。因命樞密副使狄青爲宣撫使，以經制南事。及賊平，上顧輔臣曰：「嚮非用梁適言，南方安危未可知也。」御史裏行唐介旣彈宰相，更欲援致舊臣。上怒，急召二府付介。

所留章介猶立殿上不去。公曰：宰相豈御史當薦耶？叱介下殿。殿中莫不愕顧。明年，參知政事，契丹又遣使來云：國書中所稱大宋、大契丹，似非兄弟之國。今輒易曰南朝、北朝矣。詔中書樞密院共議之。公曰：此易屈爾，當答之。宋蓋本朝受命之士，契丹亦彼國號，今無故曷爲自去也？其年，賀正使來，復稱大契丹如故。五年，拜尚書禮部侍郎、同中書門下平章事，集賢殿大學士，入內都知，王守忠以老疾，方求爲眞節度使。公謂它宰相曰：內臣無除眞刺史者，況眞節度乎？仁宗念東宮舊臣，獨守忠在，已許之。公執以爲不可。帝意未決。公復曰：臣今日備位宰相，明日除一內臣爲節度使，臣雖死有餘責矣。乃得不除。張貴妃薨，小殮于皇儀殿。公曰：皇儀不可治妃喪，然宰相陳執中不能正其事，又欲以公爲園陵使。公曰：嬪御無園陵之制，始定葬于奉先寺。公旣與執中內不合，言者得以乘間傷公，公亦數自請罷。乃以本官知鄭州。纔數日，以觀文殿大學士復爲秦州。時初建古渭寨，距州獨遠，間爲蕃戶所寇抄，及益兵拒守，而他蕃多驚疑。公至則具牛酒，召其大族撫定之。罷所益兵，而蕃漢終公之去安然自居。公兩在秦，民爲立生祠。歲滿求內徙，遷尚書左丞、知永興。西人盜耕屈野、河西田數十頃，朝廷欲更定封界，乃拜公定國軍節度使、檢校太傅、河東路經略使、知并州。盡復西人所侵地。仁宗遣使嘉勞之。未幾，暴得風眩，求罷。易忠武軍節度使、檢校太尉、知河陽。英宗初，易昭德軍節度使，加檢校太師。公被疾不已，請曹州。又徙兗。數上節，有司復以爲觀文殿大學士、禮部尚書。旣又乞骸骨，遂以太子太保致仕。今上卽位，遷太子太傅。熙寧元年，天子親

祠南郊。詔公入祠。公以疾不能至。上懷之不勝。賜襲衣金帶。明年十二月十八日薨于鄆州遵化坊之里第。享年七十。訃聞。輟視朝二日。上發哀苑中。百寮慰崇政殿門下。贈司空兼侍中。諡莊肅。四年九月三日。薨。須城縣登庸鄉執政里。公少英拔。自初立朝。凜然已有大臣之風。及歷二府。位宰相。凡大議論。辭氣愉愉。待計而已決。蓋決而不可奪。所至下條教嚴而不苛。犯者亦不少容。威行施之以恩。故其去多見思。在邊尤有威名。羌戎爲之遠去。嘗爲仁宗杜貴妃之寵。正內治之事。晚數勸立皇太子。以定天下大計。其言世多聞。所著文集三十卷。曾祖諱惟忠。祖諱文度。考諱顥。皆贈太師中書令尙書令。追封夏、魏、周、三國公。曾祖妣衛氏。祖妣鄒氏。妣閻氏。封商、韓、唐、三國太夫人。兄罔。祥符中進士第一人及第。最有名。娶任氏。封越國夫人。七男。彥昌。職方員外郎。彥明。都官郎中。彥回。屯田郎中。彥通。彥開。國子博士。彥昇。殿中丞。彥深。光祿寺丞。三女。以嫁都官員外郎張竚。試祕書省校書郎王佑。光祿寺丞程伯孫。孫男二十二。子駿。子玉。光祿寺丞。子美。子厚。子野。大理評事。子雄。子諒。子建。子直。子誨。子憲。子恕。太常寺太祝。子顯。西頭供奉官。子晉。將作監主簿。子挺。太廟齋郎。子問。子鐸。子空。子約。子履。子博。子敏。曾孫男三。希祖。恭祖。光祖。銘曰。公世有文。自周寶發。匪文發之。而子又傑。巘巘維公。敢前不疑。一心險夷。卒成無墮。公之秉鈞。風雨和豫。行道之人。式歌且舞。事有未安。予何敢泰。以規以制。惟義所在。公臨方垂。神旗豹尾。風揮電旋。萬旅一指。維公勞勤。匪內則外。亦有寵名。文武之對。於皇仁宗。始終知公。出入將相。一時之隆。方其告休。公則未老。

邈然去歸。高風是蹈。崇崇園丘。孰陪在祀。有懷公來。公卒不至。葬公何阡。執政故里。公名之長。以遺萬世。

王懿敏公素墓誌銘

公諱素。字仲儀。故宰相王文正公之子。其先大名莘人也。曾祖魯國公諱徹。祖晉國公諱祐。考魏國公諱旦。皆贈太師尚書令兼中書令。曾祖妣秦國夫人田氏。祖妣徐國夫人任氏。秦國夫人邊氏。妣榮國夫人趙氏。維公考實相眞宗于景德祥符之間。當是之時。天下衣食滋殖。百官各任其職。而兵革不加于四夷。可謂賢相矣。方其薨。公猶未官。朝廷錄孤。以爲太常寺太祝。遷大理評事。同勾當太府寺斗秤務。天聖五年。召試學士院。賜進士出身。又召試。得通判潁州。更懷州。許州。累遷太常博士。又召試。得五品服。且宰相子。比皆用試。得帖館職。公獨以大臣親嫌。故抑之。以尚書屯田員外郎知濮州。運使欲加賦瀕河之田。公言。日者河決本道。而民困于失職。今大河新還。流者猶未盡復。可益以重斂乎。于是詔自濮七州。毋得令民過出租。以都官員外郎知宣州。御史中丞孔道輔薦以爲侍御史。道輔出。亦出公知鄂州。罷配民計口售鹽。鄂人德之。以職方員外郎知宿州。慶歷二年。改兵部員外郎。知諫院。同判國子監。仁宗方留精政事。思聞朝廷得失。御筆親除諫官。而歐陽修、蔡襄、余靖與公相次進用。公起少年。蒙上所知。輒遇事感發。嘗言。凡朝廷欲有所更。其初不出于士大夫之論。則中書不敢以自行。願陛下收威福之權。明利害之分。事如無可疑。毋須下議兩制。徒爲紛紛也。禮部取士。不詢采行實。顧文辭漫漶。不足以應務。請郡國置學。擇

明師使通知經術。稍近三代里選之法。自景德以來。較今內外無名之費數倍于前。請置官三司。量一歲所入。其用非急者。皆省去之。會皇子生。議欲因赦。百官進官。大賞賚諸軍。公又言。方元昊叛。契丹數有所求。縣官財用不足。宜留金繒以佐邊費。謹官爵以賞戰勞。其議爲公止。仁宗間御天章閣。出手詔問兩府大臣。所以興治革弊之方。公又大疏時政姑息十餘事。皆人所難言者。未以非知之艱。行之惟艱爲戒。它日曲召諫官歐陽修與公等四人面諭曰。卿等皆朕所自擇。數論事無所避。特皆賜服章。非繇宰相言也。于是賜公三品服。除天章閣待制。淮南都轉運按察使。時初置按察。諸路皆以苛爲明。獨公爲不苛人。然貪吏蓋有自投去者。罷覆折二稅羨緡數十萬。朝廷因以戒諸路。以刑部郎中爲涇原路經略安撫使。知渭州。未幾坐嘗屬河東轉運使。劉京市材木。制下御史臺。京自以已坐得罪。而公所市無私明。猶降公知華州。旣而言者又以謂公與監察御史裏行。閤詢爲連姻。方置劾時。不以其事聞。旣奪詢裏行。亦落公職。知江州。未行。改汝州。更潞州。丁太夫人袁氏憂。服除。知兗州。復以天章閣待制。知渭州。卽除龍圖閣直學士。兵部郎中。還判三班院。以樞密直學士權知開封府。至和二年秋。大雨壞蔡河水入都城中。密詔馬軍都指揮使范恪障朱雀門。公違詔止之。曰。方上不豫。軍民廬舍多覆壓。奈何障門。更以動衆耶。公于時晝夜檢訪姦穰。都下爲之肅然。嘗建請置使院判官主熟事。置八廂官決輕罪。置發放司勾朱官以檢稽違。後多見施行。以龍圖閣學士爲定州路安撫使。知定州。以翰林侍讀學士知成都府。先是牙校歲輸酒坊。

錢以供廚傳之費。前後日加豐而不知約。故輸者亦加困而不能勝。公爲一切裁約之。省其費過半。鐵錢惟行于兩川。歲加鑄無止。故錢輕而貨重。商旅不能通行。公爲罷鑄十年。而物價差以平。利州路饑。公遣發廩賑救。民得無流徙。詔適下而公奏至。上數稱嘉之。公爲政在使人情。蜀人錄公所行爲王公異斷。復知開封府。爲羣牧使。知許州。歷諫議大夫。給事中。尙書工部侍郎。英宗初。再遷兵部侍郎。治平元年秋。敵寇靜邊寨。權涇原帥。陳述古與副總管劉几議進兵。不合。敵寢圍童家堡。天子西憂。以端明殿學士又知渭州。旣入見。英宗諭曰。朕知學士久。今邊陲有警。顧朝廷誰可屬者。其勉爲朕行。于是番酋故老皆歡呼。越境望公之來。比公馳至。則敵解圍去矣。公屢帥涇原。馭將卒有恩。無不得其歡心。又善料敵情。故塞下戍常少。而積粟至十餘年。嘗廣渭之西南城。濬隍三周。屬羌間以土地來獻。公悉募置弓箭手。其行陣出入之法。身自督教之。其居舊皆穿土爲室。寇至老幼多焚死。公爲築八堡。使其居足以自保。而父子皆感泣曰。誓不敢忘我公之德。所部東西兩路巡檢。皆分領弓箭手。不得以自便。公曰。此豈前日募民兵意耶。悉使散耕田里。遇有警則發之。故其涵養士氣。名爲勇悍。他路莫能及。公一日燕堂隍。邊民悉驚走入城。諸將曰。使姦人亦從而入。必將舉而內應。不若拒之弗內。公曰。若拒之。東去。勢必搖關中。當且納之。固知敵不敢犯我。此必有姦言動之者。乃下令曰。敢復有言敵至者。斬。有頃。候騎從西來。其傳果妄也。諸將皆服。莫如公所料。改澶州觀察使。爲眞定府路安撫使。知成德軍。今天子卽位。移青州觀察使。復以爲端明。

殿學士遷尙書左丞爲河東四路經略安撫使知太原府會汾河大溢公曰若壞平晉遂將灌州城乃命先具舟楫築堤以扞城一夕水果至人得無恐至今人每遇公所作堤而留歎之晉荐饑公勸大姓出粟活殍者十餘萬人及公去州人迺馬首環泣終日不得前又改徐州觀察使辭不拜知通進銀臺司兼門下封駁事以疾求補外留兼提舉醴泉觀又知汝州歲餘乃言臣被病久顧不能任君事願還政于朝遂加工部尙書致仕職如故故事致仕雖三公無帶職者朝廷方施用新法公首以學士就第時人榮之公少感慨有大志人不敢以貴游子弟遇之及顯在朝敢言天下事數擊姦佞上前其言不屈于勢權然瘡于薦士雖武夫處士常急于引拔與人交周旋無不至不藏怨于人凡所與游皆一時豪賢稍稍去至公卿者多出公後慶歷中朝廷患政事因循日久二三大臣因與共謀盡更前之所爲而間至于不次用人于是論者皆指以爲朋黨及大臣去者人莫敢以爲言公嘗獨言富弼韓琦范仲淹皆有重望宜復召用處之以不疑仁宗嘗命公悉上爲御史諫官時所言事留觀殿中公晚之涇原英宗許以大用公還在道大臣入問上疾數問王某幾日當至間又趣令入見公至會英宗大漸又俛而去國也公在渭與蜀尤有愛于民皆圖公像而生祠之公歷撫三路歲且久未嘗一朝用兵夫厭難于機先與收功于後其孰爲愈哉公亦不自有也熙寧六年三月甲寅告公薨輟視朝一日有司諡公曰懿敏其年五月庚申葬公開封縣新里大邊村文正公原下娶李氏禮部尙書維之女同安郡夫人又滕氏給事中涉之女安康郡夫人

又張氏太傅士遜之女、永嘉郡夫人子、男五人、厚進士及第、早卒、固大理評事、凝祕書省正字、常、粵、將作監主簿、女二人、適將作監丞李謹、文居中所著文集二十卷、余與今參知政事、馮公當世少從公游、及公薨、余自次公平生所爲作之銘、而當世爲公書、旣又樞密相文潞公爲篆公之銘、蓋皆不待公子之所求、然則觀公之于人、亦其至哉、余雖不能文、得附見于後世、以信其人、庶幾公爲不忘焉、銘曰、

允文真宗、魏公經之、列公配食、後人是貽、公發匪馮、遇也尙少、進擊姦回、其孰不撓、三遷逶長、往御貔虎、一旅不驚、終公之去、公去幾何、寇猖在野、造幾折謀、皆出公下、治平之初、必進謂公、儀儀來還、孰謂不逢、公猶有施、公則思止、尙書端明、顧豈不煒、公言猶新、刻詩在珉、作之謂誰、惟時三人、

華陽集卷三十八

誌銘

趙康靖公槩墓誌銘

公諱槩字叔平。姓趙氏。宋虞城人。其先自造父受封。歷春秋以來。蓋不絕世。其自河北徙而爲虞城之趙。七世弗顯。至公始大顯于時。公少而孤。力學有文行。爲交遊所器重。戚綸、黃宗旦皆一時聞人。謂公他日必決殊科。天聖五年。遂第三人及第。授將作監丞、通判海州。初名公禋。其後夢神人持名簿視其上有金書趙槩字。遂更今名。後又夢通判汝州。旣釋褐。乃得海州。蓋篆文汝與海相近。及代還。召試學士院。除著作郎、集賢校理。公昔遊學淮楚間。嘗依知漣水軍鄧餘慶館下。餘慶受賕狼籍。公度其必敗。急謝去。未幾。餘慶遂坐法流遠方。至是公得知漣水軍。故人葺公舊館爲豹隱堂。朝賢自兩禁而下。凡三十餘人。皆賦詩于石。徙通州。入爲開封府推官。賜五品服。嘗奏事殿中。上令中貴人傳宣中書。改直集賢院。宰相格不下。知洪州。事久不舉。而節度推官鄭陶常持郡短長。公至。則收陶下吏。窮治其不法。坐免去。又著作佐郎監州倉饒奭喜生事。挾郡人胡順之密告歸化。卒得廩米陳惡。將爲亂。公曰。諸營未嘗得新米。歸化卒皆配隸人。可獨得乎。二人者愀然曰。事至將奈何。公卒不聽。會有歸化卒自戍所逃歸。夜入里人家爲盜。公

遽命斬于市。一郡爲之股栗。城西南隅當大江之衝。水歲爲民患。公斷石作隄。長二百丈。其夏水暴至。幾與城平。會隄就。水乃卻。至今以爲利。轉運使欲言朝廷禦水狀。公力止之。累遷尙書刑部員外郎。同知宗正寺。知青州。遂改直集賢院。坐失舉張誥奪官。宰相念公貧不能自給。起監密州酒稅。徙楚州糧料院。上祠南郊。還其官職如故。徙知滁州。山東羣盜騷淮南。以公在青州有民愛。飭其徒毋得犯公境。公方發兵要擊之。賊已遠去。召修起居注。知宗正寺。同修玉牒。久之。除歐陽修同修注。朝廷遂欲驟用修。而議未決。公聞乃請郡自便。以爲天章閣待制。賜三品服。糾察在京刑獄。遷兵部員外郎。遂知制誥。勾當三班院。上又祠郊。公得任子爲京官。又當加階封。公請移封母爲郡太君。宰相謂公次遷學士。則母得擬封矣。公曰。母春秋高。懼寵榮之不逮也。改知審官院判祕閣。與高若訥同判流內銓。若訥言往嘗知貢舉。聞母病而不得出。幾不能自容。公自以明年當知貢舉。乃復求外便親。得知蘓州。遷刑部郎中。踰年。丁母憂。服除。召入翰林爲學士。知貢舉。皇祐三年。館伴契丹乏使。遂報聘契丹。席上請賦信誓如山河詩。公詩成。契丹主親酌玉杯勸公飲。以素摺疊扇授其近臣劉六符。寫公詩自置袖中。使還。加侍讀學士。歷右司郎中。中書舍人。提舉在京諸司庫務。以龍圖閣學士禮部侍郎知鄆州。徙南京留守。拜御史中丞。乃上言天下承平日久。中外狃于媮薄。宜有以懲艾之。上爲戒飭百官。詔爲樞密副使。又以爲參知政事。方是時。皇嗣未立。天下以爲憂。仁宗始命英宗領宗正。公言宗正非所以爲重。願立爲皇子。仁宗聽其言。而立之。英宗卽位。

遷戶部侍郎。既又遷吏部侍郎。今上初遷左丞。公年七十矣。卽以老求去位數。上不許。間復請。乃以爲觀文殿學士。吏部尙書。知徐州。其請不已。以太子少師致仕。居睢陽。後十五年元豐六年正月十五日薨于永安坊里第。年八十六。輟視朝一日。贈太子太師。謚康靖。前作遺範戒子孫。其年四月二十二日葬虞城縣天巡鄉。公爲人閎厚端靜。約己而愛人。平居喜愠未嘗形于色。聞人善若自得。其有所未至。亦將勉使及之。雖在事寡于言。然陰以濟物不爲少。初張誥賊敗竄海上。公亦坐累久無聊。然憐誥終不易。歲時遣人間關往返而軫濟之。族人之單貧者。不問戚疎。皆月賙以俸錢。其久而未葬者。皆斂而葬之。方歐陽修臘公爲知制誥。人皆爲歉然。及修坐事起詔獄。其勢顧可憚。公獨立營上前。後修亦以老歸潁州。公自睢陽嘗往見之。時端明殿學士呂公著知潁州。三人者屢置酒高會。有獻酬之曲。流于樂府。晚愛錢塘湖山之秀。往遊之。終歲而歸。公受兩朝之遺。自謝事去。上四行大禮。每召公陪祠。皆以疾不能至。他日疾間。一嘗至京師。亦不能入見。上命中貴人傳宣撫問。公頓首謝命。二府亦至館所存勞之。嘗集古今諫諍事上。諫林百二十卷。詔答曰。士大夫得謝而去者。率以聲問不至朝廷爲高。朕忽得所奏書。因知有志愛君之士。雖退休山林。未嘗一日忘也。其置諸坐隅。閒用究觀。蓋有取焉。公所著有應制集三十卷。別集五十卷。及集注老子。續注維摩經。曾祖著。後唐國子監博士。贈太師中書令。妣劉氏。楚國太夫人。祖惠。宋州楚丘縣令。贈太師中書令。韓國公。妣李氏。燕國太夫人。父幹。尙書駕部員外郎。贈太師中書令兼尙書令。魯國

公妣張氏魯國太夫人。繼高氏唐國太夫人。娶李氏汝陰郡夫人。子男四人。榮緒殿中丞。敦緒將作監主簿。皆蚤卒。元緒宣德郎公緒校書郎女二人。以嫁光祿寺丞王力臣。朝散大夫程嗣恭。孫男四人。嗣徽通直郎嗣真宣義郎嗣賢。試校書郎嗣光。猶未命。曾孫男六人。韡太廟齋郎。餘未名。予從公游舊矣。迹公終身之所行。豈詩所謂豈弟君子者歟。前七年公嘗以書遺予求銘誌墓中。是時公健。尙如少時。予報曰。死生安可期。未必不反以爲託也。公薨。其子元緒念公言而屬予銘。銘曰。

造父受封。厥世蓋遠。虞城之趙。實始公顯。其顯維何。神告金符。名發湯湯。顯孰公如。乃歷高華。君子豈弟。作德不綵。神所勞矣。公建大事。笑言怡怡。繫公所受。兩朝之遺。旣茂爾功。公則弗居。七十之年。禮安敢踰。公之乞身。屢卻復至。終斬以歸。天下鮮儷。大祠郊宮。帝曰汝來。公卒不能。夫豈不懷。公旣壽考。寵祿亦隆。維始維終。德音無窮。誰謂人遐。尙有遺戒。子孫保之。百世是賴。

翰林侍讀學士贈左諫議大夫呂公公綽墓誌銘

翰林侍讀學士東平呂公。諱公綽。丞相文靖許國公長子也。少補廣文諸生。遂任爲本監主簿。累遷將作監丞。知開封府陳留縣。代還。賜五品服。讀書于崇文院。遷大理丞。天聖中。朝廷清明。天下晏然。少事上方。向儒學。招選茂異。以興禮文之盛。公于此時。屢獻所爲文章。得召試學士院。時內出集上書囊爲殿帷賦。因託古以諷。上覽見稱。除直集賢院。公辭不受。改校理。汎恩遷太子中充。文靖當國。公力遠貴勢。久處間。

曹文靖出藩淮陽。上命以前所授職授之。兼判國子監。文靖還秉政。公懇辭。斬補外。得知鄭州。遷太常丞。秩滿。判吏部南曹。尙書刑部。文靖再鎮許昌。迺判三司理欠司。遷太常博士。遭秦國夫人憂。服除。判太常寺。預修崇文總錄。特加工部員外郎三司判官。文靖復相。換太常寺。遷刑部員外郎。慶歷三年。除史館修撰。是歲。文靖告老。以太尉就第。猶領國史。公援李宗諤避親故事。益辭。上嘉之。賜金紫。糾察在京刑獄。未幾。文靖薨。除兵部員外郎。復充勳職。公流涕辭還。不受。明年。遂以前所授之命。卽家在所賜之第。終制。復判太常寺。兼提舉修祭器。召試政事府。擢知制誥。歷審官院。流內銓三班院。復判尙書刑部。以龍圖閣直學士知永興軍。以樞密直學士知秦州。迭帥兩路。明堂大饗。遷刑部郎中。召還。以龍圖閣學士權知開封府。歲餘。屢請罷。以翰林侍讀學士集賢殿修撰知審刑院。判太常寺。頃之。改龍圖閣直學士知徐州。尋復爲侍讀學士。徙河陽。過都。留侍經席。至和二年十月。遷右司郎中。未拜命。疾革。是月十四日。以訃聞。賜其誥于家。年五十七。特贈左諫議大夫。錄孤。賻物加等。公爲人沈介篤雅。少時已能感悟。卓然有遠致。初爲陳留。言畿內久雨傷稼。縣官不收民租。而蠶事不登。則未嘗寬布帛之斂。今繭絲失時。不可得。願以緡折。縑從民便。其識事彊敏。雖久吏弗如。康定初。元昊叛河西。國家比歲調發。海內蕭然。煩費矣。公言。民者國之根本也。今天下軍需之所急。及他無名之算。不知幾萬億。是皆浚民之膏澤也。豈長計哉。乃詔近臣與三司更議。審其有以寬民者。均節之。其不急者。一切罷去。公四典太常。尤明於禮學。自三代沿革國朝典

章之盛。靡不該達。請復太醫院。設令丞府史如天官醫師職。以救民疾病。鈞容直傳中指假旌纛羽籥等。爲優笑之助。公曰。先王盛德之樂也。執以爲不可。自是優人不敢以太常禮服爲戲。郊廟祭器。敝久不修。而法度又不合古。請以時更造。間歲天子出嘉實。敕有司薦廟。必先詔禮官議中式而後行。公乃引月令。天子四時嘗新。所以薦羞之具。悉以圖上。歲行六十一祠。禘祫二祭。其薦裸興俯。玉帛彝器。菁茅醢醢。鍾石歌奏。皆有儀式。會成一秩。名曰郊祀總儀。今遵行之。國家饗天地及祖宗日月百神之靈。以至五方山林川澤墳衍之類。咸有樽罍之數。自古以五齊三酒分實其中。又加明水。明酒以達陰陽之潔氣。今有司徒設樽罍。而酌用一樽爲獻。甚非所以禮神之意。公遂建議依周制實齊酒。以分行酌數。沿有唐遺法。求方鑑取明水。嘗論祖宗配郊。當正位作主。以明同尊天地。又謂古者婦人無諡。自漢晉以來。皇后多因帝諡爲稱。國家順禧翼宣四帝。暨太祖太宗皇后。悉同廟諡。獨章聖皇帝五后節惠曰莊。與諡典不合。願易名爲章。追正前失。明年。天子遂詣廟行改諡禮。問何人建明。左右以公名對。公時居憂。天子惻然思之。卒拜公爲兵部員外郎。史館修撰。公糾察刑獄。言獄者人之大命。異時民抵重辟。獄具未報。爲典獄吏潛寘堊死獄中。先朝初置糾察。卽專摘茲姦。今狴牢局密。上下蒙蓋。情無繇知。當疏購條使令自陳。則姦黨壞落。又京師諸獄吏未嘗推選。皆無行剽攻羣不逞之人。今不可盡斥。可先鋤其迹尤著者。後有所補。悉募人保證。收其良能而用之。并爲制祿廩使畏法。差自重。三司遠年逋責。有自天禧以來。尙淹繫妻孥。窮究

所負。公承詔多爲蠲除之。虎翼卒劉慶告變。下吏案驗。乃慶始謀。衆不從。反訐以誣衆。且覬幸得賞。公言京師衛兵多。使姦人得計。則無以安衆心。卒論慶法。鄭人舊本無學。公始興之。又丐田爲糧。以給諸生。其後鄭人繼入策進士科。而學者寢廣。公嘗行春坐隴上。詢民間苦。或言近歲籍牛爲產。民懼役重弗畜。故田疇多荒。乃嘆曰。先朝不征農器。正爲此爾。遽表除之。在西掖會天子坐迎陽門。召近臣對策。上從容謂公曰。緣所問外。有安危得失。于今所宜究慮者。條一二以聞。公因言郡國數地震。乃陰乘陽時。則有下謀上者。願陛下慎之。未幾。果有殿廬竊發之變。在長安言關陝之西。自軍興以來。民力大困。今瘡痍未完。誠不宜他斂。願少寬河榷之費。秦鳳本道土兵。其技能攻守。與戍卒之習異。公敕使分隸將領。各勵所長。故其威聲張。部分明。常若寇至。前此邊將爭遣人深入覘敵。而利其貨貲。卒不得虛實。已乃妄言洶洶。鼓賊聲勢。衆頗患之。公乃自設耳目。網絡張布。揣知敵情。每裁處邊奏。別白精審。至出入應變。機會之速。雖左右不得聞。古渭州諸羌。以地來獻。公曰。國家威懷萬里。顧利尋尺之地耶。急報謝之。後有納其說。卒生邊患。夏人入天都山。斬材木具轉鬪。稍逼亭障。公戒守者益持重。嚴烽火。遠斥堠。以須其至。夏人亦不敢犯。涇原蕃酋頻年抄邊。一旦乞內隸。公曰。此酋數犯約。非嚮慕禮化者。譬若鷹隼。飽則襲人。不可留也。乃諭以禍福。斥去。戎人皆慙伏。西人習騎戰。而弓箭手多闕馬。緩急不足用。公夙曉諸寨。均其戶爲三等。十丁爲一社。至秋成時。令勸募出金帛。益市馬以分給之。聞者爭出應令。是歲得馬數千匹。後習以爲常。開封

府有營婦。夫戍未還。夜盜入斷腕。主名不立。都人誼言駭異。且逾久未獲。公以謂非其夫仇。不宜快意戕害至此。亟遣馳詰其夫。果獲同營韓元者。具姦狀伏誅。都下稱爲神明。久之。有言執政事上。委平獄疑。而言者并以侵公。公初不自辨。上以公嘗請徐。乃出知徐州。及陛辭日。會其事白甚。卒無纖介。上遂欲留公。不遣。公頓首謝曰。陛下幸察臣之心。臣死無恨。豈以臣重去職哉。上乃諭宰相。令具證左付公。明不以爲累。至徐州。屬歲旱大饑。不及聞上。卽日發倉廩賑窮乏。全活者甚衆。是歲孟夏朔日蝕。上責躬慮刑。霈德音天下。公捧詔嘆曰。陛下聖德甚厚。宜無過舉。以招變異。或者以蠻蜴母子不早就刀鋸。乃象之官。假息於須臾。使二廣之冤。積而爲沴。以干純陽之精。書奏立誅之。還朝。會春夏久不雨。民狼顧失望。公入奏事。上問所以變復之術。公陳前代王者親錄冤獄。其精誠所交。必有甘雨之應。上曰。卽如卿言。方朕之誕月也。天下聞之。必謂朕自要福。宜少須。後至五月朔。上遂御便殿決繫囚。未畢而雨澍。天子益器經術之言。公素不爲皦厲行。常畏懼滿溢。兢兢如弗容。其在朝廷。信道行已。不以志譽撓其心。推誠待人。表裏單盡。平居無他嗜好。惟以書史日自娛。前後典劇藩。務先信恩。其抵冒弗率。則以法重繩之。平生好論議。必推原事情。究心隱微。要之切于時病。又善爲訓辭。其重輕有體。時論予之。公旣日益顯。如侍從之職。皆文靖所嘗歷者。仲氏龍圖。同時雍容近班。又相繼尹畿甸。天下之人。談衣冠之盛者。必以呂氏爲世家。公殊孝友。每任子必先諸族。公捐館而諸孫猶有未命者。公字仲裕。其先開封人。曾祖某。贈太師尙書令兼中書。

令祁國公曾祖妣李氏。追封越國太夫人。祖某。贈太師尚書令兼中書令魏國公。祖妣王氏。追封榮國太夫人。父某。守太尉致仕。許國公贈太師尚書令兼中書令諡文靖。妣馬氏。秦國夫人。追封齊國太夫人。公娶上官氏。賢明慈順。兵部員外郎似之女。封京兆郡君。子六人。長希傑。太常博士。次未名。並亡。希道。屯田員外郎。端粹才令。次亡。次希俊。太常寺太祝。次希亞。祕書省正字。女二人。長適淮南轉運使刑部員外郎集賢校理李中師。次適太常博士程嗣恭。孫五人。嘉問。之問。延問。太常寺太祝。君問。昭問。將作監主簿。公累階朝散大夫。勳護軍。爵開國伯。邑食八百戶。文集二十卷。藏于家。公考終之歲。以十月朔謁告拜文靖墓下。旣悲慟。召寺僧指地之北偏曰。余其歸此。或竊怪之。公曰。死生不有數耶。明年某月某日。遂葬公于鄭州新鄭縣懷忠鄉神崧里。從文靖之塋。乃先指之壬吉。果符其言。嗚呼。可謂達矣。銘曰。呂氏之先。其本自姜。四嶽之後。固大而昌。於顯文穆。實相太宗。文靖繼武。三拜上公。卓然有子。維公是似。巖巖雋鋒。時國之器。服官于朝。辨論有條。天子曰賢。可寘近僚。四遷學士。五殿大邦。黻衣繡裳。有爛于堂。圃田之西。溱水之東。高岡隆隆。文靖之宮。公歸其中。在地之壬。匪後實遷。蓋公之言。

翰林侍讀學士賈君黯墓誌銘

治平二年十月戊子。翰林侍讀學士長樂賈君卒于京師。先君病且革。天子遣使挾太醫。日夜臨視之。君卒不能起。贈尚書禮部侍郎。又賜黃金其家。明年正月辛酉。葬于鄧州穰縣冠軍里。將葬。其孤士彥以君

功狀來求刻文而納于墓中。太原王珪爲之序。成都范鎮爲之銘。序曰。按賈氏其先周康王時。唐叔少子公明封于賈。遂以爲氏。其後始顯于漢魏之間。而望出長樂者。世最大。君諱黯。字直儒。世居真定之獲鹿。自君之曾祖始徙于穰下。今爲穰下人。君少警悟。方七八歲時。見其所作詩而驚偉之。慶歷六年。中進士第。爲天下第一。除將作監丞。通判襄州事。代還。召試學士院。拜著作郎。直集賢院。判尙書刑部。祀明堂。覃恩遷右正言。君年少。方進用。遇事感慨。數上言朝廷。仁宗識君手書。常嗟賞之。御史中丞王舉正留百官班。將以事見上。尙書郎杜樞獨出班問所以留班狀。久之。貶樞監稅衡州。蓋樞嘗駁開封府張彥方獄。而事連權貴。人皆知以此得罪也。而莫敢言。君爲力言之。其後諫官御史皆爭事上前。不能止。因詔臺諫官。自今須繇閣門。白中書俟旨。然後得上殿。君又言曰。羣臣獨得與上論事。惟諫官御史爾。今旣不得時見上。萬一有非常。上何繇得聞耶。固請如舊制。從之。尋遷三司判官。同修起居注。奉使契丹還。遷右司諫。至和元年。擢知制誥。權判吏部。流內銓有晉州推官李亢。嘗入粟得官。後以罪引去。他日應舉及第。當改官。始自言其嘗以罪去也。君曰。士之罔冒。其罪可置乎。遂奏罷之。福州推官劉抃在銓。俟引對。而自以爲曉星氣。挾此以遊公卿之門。君乃奏以爲靈臺郎。于是士人之知術數者。不敢以自名。君初修起居注。見天子退朝。御邇英。咨訪治道。而史官不得預聞。至是因修起居注。入預經筵。遂爲定制。嘉祐元年。君以父春秋高。請知陳州。尋改許州。明年。遷尙書兵部員外郎。徙襄州。屬父疾。歸南陽。至家而疾篤。君亦自移疾。委

郡事佐官而去。卽日上書自劾。臺諫官以君輒去郡爲言。降知郢州。已而離父憂服除。君以前嘗謫郡。不敢入朝。詔趣還之。勾當三班院。明年召入爲翰林學士。判昭文館。以疾復請郡。乃除翰林侍讀學士。戶部郎中知鄧州。未行。復以爲翰林學士。知審官院。先是朝廷以京朝官每三歲輒自言求遷官。非所以敦養廉恥。于是詔當遷者有司爲舉行之。而朝士之近名者。輒或辭磨勘。至數移督之。不得止。君謂嚮者使其自言。而士之不求進者。宜有以旌異之。今無復自陳之嫌。則士大夫何以辭不願磨勘也。是亦矯妄之人。徼取恬退之譽。陰圖進擢之望。皆無益風化。且攷課之法。豈特以歲月遷。亦將稽其殿而黜之。請凡磨勘者有司不復督。中書爲籍記之。其後雖甚久。皆毋得輒遷。朝廷從君言。于是僞辭磨勘者不復至矣。七年遷左司郎中。知開封府。君御下方嚴。所至莫不憚之。府吏舊七百人。而諸嘗以罪去而復敘者。皆籍外補之。蓋嘗數百人。君乃奏爲條其得復敘者。須候籍中闕乃稍補之。又府吏之給事他官者。更七次則一遷。于是他官之請者。歲不可勝數。至有一事累請而爲兩役者。君又奏爲條其從事。其從事之所難者。始得爲次數。餘悉罷之。于是府吏取君所決十餘事緣飾而倡言之。御史亦以是繩君。仁宗見執政問賈某所爲私乎。對曰。無有私也。然而言者不已。遂易君同提舉在京諸司庫務。今天子卽位。遷中書舍人。受詔撰仁宗實錄。更羣牧使。治平二年。拜給事中。權御史中丞。充理檢使。上方親政事。君數見其言無所避。上嘗謂君曰。朕欲用人而未識其可者。對曰。天下豈嘗乏人耶。在陛下所用爾。乃陳任人之法五事。一曰知人。

之明。二曰養育以漸。三曰林不求備。四曰以類薦舉。五曰擇取自代。天子嘉納之。是時某尙德寧公主。君言曰。國朝公主下嫁。皆以祖爲父。以父爲兄。非所以正人倫之道也。願詔諸公主下嫁如唐故事。令盡其見舅姑之禮。有司議。濮王稱皇伯而不名。朝廷下其議三省。君勸上從。有司議未報。八月。京師大雨。水。君時以寢疾復兩上疏。以爲簡宗廟。逆天時。則水不潤下。濮王議宜以時早決。以塞變。踰月。君疾未已。願罷御史中丞。乃除翰林侍讀學士。知陳州。纔數日而卒。享年四十四。曾祖延隱。太子右監門率府副率。祖昭遜。內殿崇班。閣門祇候。父汶。著作佐郎。致仕。贈少府監。母陳氏。繼母史氏。陳初歸。其宗父戒君他日能自顯。則往迎之。君卒。迎陳母歸。封仁壽郡太君。史封唐安郡太君。凡四娶。馬氏。任氏。周氏。皆早亡。最後娶薛氏。今封延安郡君。二男子。長元素。蚤亡。次士彥。太常寺太祝。五女子。君所著文集三十卷。尤長于議論云。銘曰。

世言直孺舉進士第一。不十餘年踐兩禁爲得志。而不知直孺之事兩朝。開陳補益如此。嗚呼。使天假之年。盡其所蘊。則其澤之于天下。可勝旣耶。

朝奉郎守尙書屯田郎中致仕上騎都尉賜緋魚袋蒲君 慎密墓誌銘

尙書屯田郎中蒲君慎密者。字叔榮。世爲果州人。三世累晦不仕。果遠人少學。君獨好學。有志行。爲鄉閭所稱。景祐五年。擢進士第。爲涇州保定慶成軍榮河開封府長垣縣主簿。陟萬州南浦縣令。改祕書省著

作佐郎。知京兆府醴泉縣、福州閩縣、徐州沛縣。監在京事材場。通判安州。歷祕書太常博士、尙書屯田都官、職方員外郎。爲屯田郎中。遂致仕。熙寧五年七月十八日。以疾卒于京師。享年六十一。君爲人廉慎。自持。其于官尤敏辨。而不煩。方其在保定。會元昊叛。西方用兵。而州縣部送芻糧多失期。坐斥。君乃言去邊近。積粟多。凡若干處。請盡以輸邊。徐自內地轉以補軍乏。轉運使用其言。邊計大給。大將葛懷敏驅所獲馬以萬計。君以縣僻無畜牧處。而馬露則多死。乃就山勸民出所積材而償以直。不踰月。作廐五百楹。人不以爲擾。在南浦。嘗權莅州幕。廷尉駁州獄之失出死者。君以爲法者天下共守。今罪于法不當死。不爭。則不可。州將曰。可與廷尉爭耶。君愈執不奪。及詔下他司議。而卒得不入死。州將始愧服。在閩縣有亡命吳才者。聚徒方山。數出剽劫。爲民患。君一日廉知其處。擇精卒數十人。夜馳赴之。縱火四發。賊運槩突圍。就擒者五人。于是境內不復有盜。君所至有能名。若三司使蔡襄、韓絳、翰林學士范鎮、元絳、端明殿學士張方平、王拱辰、龍圖閣學士陳薦、李中師。皆嘗薦君材于朝。其內外監司張師顏等。又三十餘章。君可謂材矣。然宦學不達。年未至而引去。顧其抗情安命。與夫老而不知自止者。不亦異哉。八年七月十三日癸酉。葬華州鄭縣孝悌鄉田村社。曾祖承蘊。祖仁讚。父士廉。贈尙書都官郎中。娶李氏。河北提點刑獄內殿承制閣門祇候守信之女。封僊居縣君。子男二人。希孟。右班殿直。希閔。太廟齋郎。女二人。長適光祿寺丞王仲京。次適太廟齋郎張公著。孫男女三人。銘曰。

蒲世蜀遠。果窮又紆。世晦弗食。君食自初。所臨敢前。聞者衆薦。亦既有聞。誰謂不顯。進雖云難。君亦易退。六十之齡。其志已遂。山之嵯嵯。水之滔滔。表名在朝。茲爲不沒。

提點京東諸路州軍刑獄公事兼諸路勸農事朝散大夫行尙書祠部員外郎充祕閣校理上輕車

都尉借紫晁君仲衍墓誌銘

皇祐五年六月。詔以祠部員外郎祕閣校理知懷州晁君仲衍提刑京東。八月。銜命之官。道病。日寢革。是月二十四日。終于廣濟軍。享年四十二。君之仲氏國子博士仲蔚官鄭州。聞訃慟絕。馳來京師。迎君之喪。與其孤端彥。以其年十一月一日丙寅葬君于鄭州新鄭縣旌賢鄉賈村。從先正文莊公之原。先期端彥請銘于余曰。我先君有聞于時。將因子文以信後世之傳。余旣悲君仕不顯以沒。又嘗聞其平生之言。顧不得辭云。君字子長。其先澶之清豐人。後徙彭城。今家開封之昭德坊。曾王父母贈太師中書令諱佺。康資永三國太夫人耿氏。繼孫氏。傅氏。王父母太子少傅致仕贈太師中書令諱文元。諱迴。慶國太夫人張氏。考妣資政殿學士給事中。贈吏部尙書諡文莊。諱宗慤。安康郡太夫人王氏。安康余之先姑也。君資識敏悟。方總角時。已自如成人。蚤夜抱書冊。諷誦。父母愛憐之。又閱其素弱。意不欲其苦之也。君亦陽從遊。息夜潛起取燭。或徹旦不寐。益務記覽。工辭章。明道中。舉禮部。嘗中選矣。而屬期喪。其後恩俾與廷試。而又以期喪。意卒不得遂。尋召試西掖。賜進士第。慶歷初。君通籍于朝。適天子宴皇屬太清樓。觀燈翠芳亭。

撫州進金山等。皆一時盛事。君作爲歌頌以獻。凡三錫詔美之。君侍祠南郊。復奏頌極于褒讚。上顧謂輔臣呂文靖等。稱歎殊甚。繼進文三十軸。後召試禁林。充祕閣校理。君旣久官中都。乞補於外。乃抗疏得懷守。前守無狀。日湛燕私。寬縱弛事。吏目因緣作姦。懷人苦之。君乘前之敝。專厲風節。誅鋤豪強。衆不敢犯。法郡境有沁水。創礮磴。借水勢。歲破麥數千斛。以給權酷。先是掾吏苦出納道勞。輒議均麥于民。率衆力以供。咸吁嗟不敢訴郡。君下車。亟召掾吏曰。太守所以便民也。今掾吏顧勞民自便耶。乃出教趣使復水利。未幾。轉運使移州。以民租折供。繒萬計。已而又欲以他斂。君言歲饑民不可重困。使者宜有以貸。轉運使不聽。君愈持之。卒寬民輸之半。州俗素樸。不喜儒。君一日視學宮。閤然若無人焉者。因歎曰。郡去京師不遠。幸得漸風化之厚。而學墮不觀。是豈不足教耶。乃移書抵諸生。躬自教勅。朝夕使聞絃誦。繇是翕然鄉風。懷人德君深。逮君之去也。父老遮道上攀車。不忍君去。俄而聞君喪。懷人無長少莫不泫然流涕。君初以祖任將作監主簿。七遷祠部員外郎。始監金耀門文書庫。又監京麴院。權判尙書祠部。同判太常禮院。兼判尙書刑部。出知懷州。就除京東提點刑獄。累階朝散大夫。勳上輕車都尉。賜五品服。君在禮院日。以天下行營中有號武定者。瀆章聖廟諡。請得以易之。天子驚可其奏。京師有貓鼠同戲。君援唐崔祐甫故事。請飭邊將以嚴武律。間歲。天子欲獵近郊。有司豫治道。設供帳。久之。詔蹕未行。君建白。幸上早出畋。有詔罷幸。君練達國朝典舊。薦紳先生往往有從而質之者。君爲人端粹。惟嗜學。未嘗一日去書。故博識。

無不該貫。著文集二十卷。丞相章公得象。晏公殊尤見獎許。其牋記多出君之文。爲汴陽雜說一卷。其言切于規喻。又以唐白傅所撰事類集傳者寢舛。乃參攷經史。一以刊是之。仍據舊目補攷撫新。別爲三十卷。曰事類後集。又爲兩晉文類五十卷。康定中文莊使陝西。君時侍行。馬上自成一編。曰侍雍雜編。晚在山陽。與侍讀錢公明逸篇章寄酬。閒則命僚友終日賡唱。凡數十百首。辭敏而體醇。屯田員外郎王復見而作序。曰河內唱和集。又觀司馬遷、班固、范曄宗所論。其中或有可疑者。因摘其失。折衷其義。作史論三卷。方治懷歲滿。趣辦裝計。日東去。而代者踰期。復取太史書采類其文章。凡兩浹日。次成二十卷。曰史記文通。其書悉藏于家。君天性孝篤。自文莊之薨。纔數歲。繼遭安康之艱。創鉅痛深。屏處一室。六年未嘗茹葷。君大族也。事諸長上必恭厚。昆弟以愛。賙羣從以恩。與朋友以信。凡歲時吉凶問遺。罔不如禮。家居甚于寒素。嘗預宴貴人大第。出舞女筦絃鏗鏘。舉白擊鮮歡甚。君竊歎曰。是豈吾所以爲樂也。其一意好學如此。君感疾比劇。中固不亂。謂其子端彥曰。夫脩短窮達。不有命耶。言訖而逝。非知命也歟。君三世繼直書殿。士大夫談衣冠之盛。維君之門。君娶集賢院修撰贈諫議大夫王公軫之女。封興安縣君。賢明柔穆。有閨梱之範。子六人。三未名而夭。次曰端彥。太常寺太祝。曰端方。曰端稟。雋厲修飭。皆承家之器。二女並幼。初文莊踐顯數十年。每任子必均諸族。其後以故大臣恩比錄孤者七人。獨君仲氏遷一官。餘悉霑內外親故。今諸孫有未命者。亦君所以成先志云。銘曰。

美昭德之世隆。君將獨侈先代之崇。學以粹于古。而行以端厥躬。吁嗟才不究用而命不融。茫乎孰質其善惡之公。

朝請大夫守司農少卿贈兵部侍郎上柱國賜紫金魚袋薛公季卿墓誌銘

公諱季卿。字公遜。其先汾陰人。漢御史大夫廣德之後也。十代祖道衡仕隋。爲內史侍郎。又七世曰茂修者。生競競。公之曾王父也。屬唐季之亂。徙于蜀。生允中。事蜀爲名臣。入朝歷都官郎中。兼大理少卿。公之王父也。刑部尙書贈太尉諱映。諡文恭。公之父也。祥符初。公以父任爲將作監主簿。累遷衛尉寺丞。仁宗卽位。改大理寺丞。賜五品服。監在京皮角場廣積倉。又監許州鄆城曹州酒稅。以太子中舍知邵武軍歸化縣。會藉田恩。遷殿中丞。丁太夫人憂。服除。以國子博士知真州六合縣。縣濱大江。民多逐魚鹽之利。利不勝。則聚而爲盜。鄉閭患之。公爲嚴捕賞之格。前後盡獲其徒。終公之去。無敢爲盜者。知越州蕭山縣。屬歲饑。民大疫。蓋流離道路者十室而九。公曰。邑當字民。反坐以視其死耶。卽白郡守發官廩以賑之。郡守畏令不敢發。乃以白監司。曰。今民瘁甚矣。願得發而後聞朝廷。猶或可濟。監司許之。于是蒙活者甚衆。歷水部司門庫部員外郎。通判亳州。徙宣州。賜三品服。以太守不奉法。坐累降監開封府太康縣稅務。又歷水部司門庫部郎中。復通判黃州。就更司農少卿。召還。權判殿中省。丁所生憂。執喪哀甚。以嘉祐五年六月乙酉終于京師榆林之第。享年六十有四。朝廷官其一子。公大臣子。性不樂浮華。能以儉純自高。其視

名利恥務苟進。平居不妄語言。雖家人亦未嘗見喜愠色。遇人以禮。愈久而愈可親。故人多以長者稱之。珪公之甥也。故能道公平生之所爲如此。公以子在朝。累贈兵部侍郎。娶李氏。封平原縣君。先公十三年卒。熙寧七年四月丁酉。葬公開封府開封縣丁岡村。子六人。長曰維。尙書水部郎中。次曰綜。皆早卒。次曰經。錄事參軍。次曰紘。試將作監主簿。曰繹。曰絢。未仕。女二人。一早卒。一尙幼。孫十五人。銘曰。薛自汾陰。晚徙于蜀。不遐有人。以世爵祿。偉矣文恭。德名之隆。公少已飭。訓迪自躬。公之在事。恥于苟得。進退愉愉。不矜以力。雖未大亨。公則有後。維其受祉。百世是茂。

朝奉郎守殿中丞知越州諸暨縣事騎都尉賜緋魚袋鄭君民度墓誌銘

君諱民度。字仲祥。吳郡人。少以父任爲祕書省正字。累遷殿中丞。歷監杭州龍山稅。饒州永平監。知越州諸暨縣。其性端靜。有操識。而不以事自累。其與人語世事。初若不能極辨。然默處其是非。人固有不能至者。家多藏書。晝夜讀之。未嘗釋。每感慨欲自奮拔。以聲名見世。數薦有司。不中第。及爲縣吏。材若素出。暨于越爲大縣。生齒常滿十萬戶。君始至。與人約曰。縣前後所以不治者。皆姦豪撓之。今而有亂吾治者。必以其狀報州而遷其鄉。于是有犯者遷之。姦豪莫不屏息。又縣之上戶。皆賦役于州。視他州爲最重。至有破產而不能供其費。民常苦之。君爲較其貲之厚薄。而均其役之重輕。蓋蒙紓其役者十四五。邑人爲立生祠。是時朝廷方行天下縣令攷課之法。而監司以君爲第一。未及賞而君卒。享年四十一。曾祖延紹。贈

太子太傅。祖文遂。贈太師中書令。父戡。宣徽北院使。奉國軍節度使。贈太尉。諡文肅。母丹陽郡夫人李氏。始娶隴西李氏。再娶南陽葉氏。子男四人。曰佃。曰億。皆光祿寺丞。曰倬。曰价。未仕。女六人。長適太常寺丞馬昌國。餘尙幼。君以熙寧二年正月丁酉卒。其年七月壬午。葬吳郡薦福山文肅公之墓次。始君計來。佃方爲畿下官。奔過京師。予往見之。佃曰。我先子之志。將大有施于時。而不克就。今葬有期矣。非得天下可信之文。傳其名後世。則無以蓋先子之大恨。予誠哀君大臣子。獨能刻志于學。使得時遂行。固騰凌徜徉而不可止。然而其用止于是。豈其分耶。爲之銘曰。鄭爲顯門。子孫濯濯。况君多聞。實後之覺。蘊釀閎深。文將大發。匪特有文。亦躬自絜。凡曰有政。夫惟利民。在暨之迹。顧豈不循。年之不遐。祿之不多。我懷其人。吁其奈何。

太常少卿直昭文館知鄭州寇公平墓誌銘

治平二年十二月庚戌。太常少卿直昭文館知鄭州上谷寇公感疾終于州之正寢。明年二月甲寅。葬于許州之荆山。以從其先塋也。寇氏出上谷。公之遠祖始徙大名之莘縣。遭石晉之亂。徙幽州。端拱中。太宗北征契丹。公之大父挈其族以歸。得除官流內銓。爲萊州卽墨令。因家膠水。而三世不遷。公少孤。依外家以逮于成人。故參知政事蔡文忠公。公之舅也。視公如己子。而公外祖母楚國太夫人尤愛憐之。天聖五年。以文忠公恩爲試將作監主簿。除沂州沂水縣主簿。未幾。棄官歸。爲學。舉進士。景祐元年及第。除試祕

書省校書郎。知深州靜安縣。未行。改開封府倉曹參軍。長吏皆薦之。遷著作佐郎。簽書淮康軍節度判官。徙通判宿州。丁母憂。時文忠公已捐館舍。楚國太夫人春秋高。公奉養朝夕。惟恐其不至。服除。以祕書丞通判徐州。民苦輸鐵于官。至破產矣。猶責之不已。公請以十之三均旁郡之戶。至今便之。轉運使沈邈奏公最爲第一。得權知淮康軍。遷太常博士。及邈還朝。又薦公于上前。言他日任以事。始至淮陽。會獄有繫囚當死。公疑其未得實而更訊之。果爲吏所誣。囚且釋。吏僅得減死。衆皆相勅不敢以毫髮欺公。一日有告軍變者。公旣密得其名。乃陽以爲妄言使去。明日大閱于鞠場。因盡擒之。是歲盜羣起而軍壁頽廢。民不安其居。公爲調農隙而完築之。于是里人欲立生祠于岨山之陽。公不許。召充羣牧判官。賜五品服。歷判三司開折司。遷尙書戶部員外郎。奉使契丹。還爲京東轉運使。先是流民以男女傭于富室者。遇歲豐欲贖之。不可得。公勅其部中悉取以還其家。又罪人之隸海島者。過百人則不得其所。公謂朝廷旣貸其生而返離非命。非所以助上恩。乃重爲立法。其後更赦多得生還者。徙淮南轉運使。再遷兵部員外郎。眞州長蘆寺瀕大江。章獻太后時。歲度僧者七人。令置小舟上下以捄沈覆之患。歲久事輒廢。而度人猶如故。公使籍其所活五人以上。始得度人如舊式。泗州流屍積上下者不勝數。公爲請歲給三百千悉埋之。知州朱處仁爲金石刻以紀焉。入爲三司戶部判官。更度支勾院。遷工部郎中。時契丹使來。詔特選以爲伴送使。公嘗言北事于上前。仁宗壯其言。他日召羣臣迎陽門觀書。帝目送者久之。及出。知徐州。賜三品

服。左右或以爲非例。帝曰。此特出朕意也。頃之。淮陽戍兵殺巡檢以叛。鄰州皆警。公亟傳檄海上。使舟楫遠去。又募勇敢士。授以方略。令傳官軍以行。旣而賊果領衆東遁。至海。不見舟而還。遂掩獲之。賜書褒諭。再遷兵部郎中。加直昭文館。徙知潞州。今天子卽位。加太常少卿。仁宗山陵。調用百出。公不以一毫擾民。在潞歲累登。他州之流冗至者相屬。公爲調發官廩以賑之。所活數萬人。又徙滑州。因得覲京師。爲上陳天下利害事甚衆。又徙鄭州以終。享年六十二。公諱平。字均輔。爲人樂易而不爲激訐之行。尤篤于朋舊。其貧不能婚葬者。婚葬之。其政大抵先學校以勸勵風俗。簡于簿書期會。而几案無留事。故其去人必見思。慶歷中。嘗上政本書五十篇。治平初。又上陳宜書三十篇。若寬天下力役。定士子令。汰冗官。教宗室。市邊馬。復鄉兵。多施用其言。又自述平生感遇事。作考祥集。采其所見聞有足以自警者。作警異志。公雅爲今樞密副使吳公長文。翰林學士承旨張公安道所器。公亦善自薦士。其後多取尊顯。而獨滯于爲郡。志不大展。其命也夫。曾祖顯贊。避亂不仕。祖日用。終卽墨令。父肅。以行義見推鄉閭。贈官至光祿卿。母蔡氏。泰興縣太君。懿行爲內外族之冠。娶李氏。安昌縣君。順淑有婦德。子男四人。昌齡。進士及第。試祕書省校書郎。昌圖。太廟室長。昌朝。太廟齋郎。昌言。蚤卒。女六人。適殿中丞張頰。將作監主簿郭紳。太常寺太祝王欽臣。任保之。殿中丞蘇充。太常寺奉禮郎韓敦復。孫男四人。安國。定國。充國。彥國。銘曰。寇始北遷。以義來輔。膠水之間。公考有裕。恂恂維公。文忠之甥。力政以學。豈不有聲。彤幘駢駢。兩驂如舞。

民樂且閒。四州是撫。昔與公遊。多貴于時。公終在外。而迹透遲。光原之豐。維龜又食。公安萬年。其竈無易。

朝奉郎尙書虞部員外郎監鳳翔府上清太平宮兼兵馬都監護軍李君丕旦墓誌銘

君諱丕旦。字晦之。其先隴西成紀人。後徙京兆之萬年。因家焉。曾祖轍。贈左諫議大夫。祖益。贈吏部尙書。父士衡。同州觀察使。君始以父任爲將作監主簿。累遷衛尉寺丞。乾興初。同領在京國子監。時觀察以春秋高。願罷三司使。出守陳州。君懇勸侍行。後十餘年。終觀察之養。始載調官。得延州酒稅。以大理寺丞監陳州西華階州酒稅。遷太子中舍。知京兆府櫟陽縣。遷殿中丞。知隴州汧源縣。遷國子博士。丁母平原郡太君憂。服除。用明堂恩。遷虞部員外郎。求監鳳翔府太平宮。皇祐四年五月二十二日。遘疾。終于署寢。享年四十九。君爲人。倜儻有奇節。喜學古兵法。方寶元用兵關中。君數條邊事。且求對殿中書奏。天子不報。階州並邊諸羌。歲數爲患。本道經略使屬君精兵數千。計以破羌。羌人且乞盟。君謂得其地。與人不。足以守。因罷兵還。未幾。羌人復入寇。君聞之。一夕單騎馳至區落。責諸酋豪背約。衆俛首泣謝。其後無一人犯邊。階人德之。爲立君生祠。涇原一道廣川平原。議者欲城要害之地。以宿重兵。初建德順軍。經略使又移君權通判事。君日夜經畫。所以佐邊之具甚備。會用薦得櫟陽。櫟陽民素猾。喜鬪辯。吏寢以不治。君至。擿里閭姦豪。收按致法。莫不畏服。旁近郡數起大獄。久不決。轉運使俾君覆按之。前後多所平反。先是。歲比大旱。百姓屢苦之。君乘農休。築埭治谷河上。引溉民田數百千頃。民今享其利。迨君之去。櫟陽也。吏民遮

泣不得。迺候夜變服馳去。晚至大平。職不預民事。而自肆于山水之間。常從使者以朔望朝原廟。仲夏既望。君已被疾。雖不克往。猶飭衣冠具几案拜于堂下。或止之。君曰。雖死敢忘恭耶。又數日。疾革。謂家人曰。死生之分。固無以易之者。吾何恨焉。遂恬然而逝。其知命也歟。君天資敏幹。洽通經史。尤曉陰陽百家術數之學。辯論衮衮。闡劘古今。多屈其坐人。在西華日。會友人死。貧不得葬。君乃爲之葬。又賙其孤。嘗客過涇。遇人有喪不得歸。亟解所乘馬遺之。其趨人之急如此。自君之官也。孤立一意。與世少合。特爲鄭公戩。韓公琦。范公仲淹所深知。屢薦君。朝廷雖不至于用。顧其材可知矣。初。觀察緣襄悼曹公之累。左遷龍武大將軍。後君詣闕上疏追訟其事。天子惻然爲哀。卽日詔還舊官。君及諸昆後咸登朝。更贈禮部尙書。李氏族大且貴。方太夫人無恙時。與故集賢丕諒。今湖南司門丕緒。博士丕遠並在膝下。每歲時讌集。捧觴前後。內外戚疎。恩意相與。衍衍和易。茲一時之榮。君娶王氏。贊善大夫世及之女。婦順母嚴。有賢德之輔。子七人。曰經。奉禮郎。曰朴。右侍禁。曰棣。左殿班直。曰材。右殿班直。曰楫。曰柄。曰榘。舉進士。皆襲慶令門。濯濯其秀。朴尤力學有文。經棣早卒。女五人。長適前進士王琬。餘未適。諸孫九人。其年八月二十四日葬于萬年縣白鹿鄉之原。從先塋也。予接君姻好。又嘗聞其平生之言。且諸孤乞銘。宜爲之銘。銘曰。自昔賢豪材智之士。生而困于世者衆矣。方君少時。上書天子。視其志慷慨。使其後且見用。顧所施果後人耶。然卒于不得志。嗚呼。命夫。

祕書省著作佐郎鄭君民彝墓誌銘

太尉鄭文肅公生子五人。君其長君也。少而爽悟好學。與羣士角試於有司。而名常在選中。于是藉藉有稱于士大夫間。初以父任爲將作監主簿。監在京進奏院。歲餘簽署鎮江軍節度判官公事。方西邊用兵。文肅總帥關中軍。求從膝下。間或先事陳畫。文肅嘗奇之。文肅斂族人之喪。將葬吳中。以撫邊不得行。乃命君晝夜東還。君盡力以襄厥事。親疎咸多其誼。知常州宜興縣。浙西諸縣獨宜興爲富繁。而其田素汗下。屬甚雨。溪流暴溢。浸沒室廬。舟行田中。郡從事按田。且貸賦租之半。君喟然曰。民罹水患。至于艱食。將仰給公上。吾長百里。乃重民困耶。卽以狀白轉運使。轉運使奏悉蠲之。是歲穀價翔起。邑無流庸。今猶見思。縣有學處卑制陋。講肄無所容。君爲度高明地。易而新之。像嚴以尊。堂邃以隆。又列齋舍于其旁。于是春秋釋奠。簋籩篚彝燦然。靡不適禮之中。邑人之爲學者。驩然相趨。朝夕講劇其間。其後以文學中科者不絕。丁外艱。服除。召試學士院。當是時。朝廷患貴勢之人數姦試以希恩。于是遣中貴人鎖學士院。又命右正言直集賢院賈黯封彌謄錄。如禮部攷格。旣而被黜者踰半。而署君文優等。君旣賜科。自太常寺太祝除光祿寺丞。知杭州錢塘縣。縣之西湖環三十里。其下溉民田數千頃。旁爲富人規廣亭園。歲以塞淤。先是文肅當郡時。按唐舊記發境內夫。闢復故隄。以導湖利。文肅旣去且久。事寢弛。嚮所占地。又或廣之。君始至。召竝湖富人立庭下。一旦還沒其所侵。民今享其利焉。遷祕書省著作佐郎。代還。通判瀛州。以母

憂不赴。君執喪哀戚甚。因而得疾。嘉祐五年正月二十四日。遂卒于毘陵。年四十。君諱民彝。字德常。家世吳郡人。天性純篤。外和內介。接朋友以誠。故久而人益親之。其趨人之急。惟恐其不逮。安節蹈中。靡追時好。丞相夏英公留守州都。首辟君府下。君曰。我大臣子。奮不由事業。將緣諸公之門。以苟進耶。還其書。平居窮味經史。反復不倦。所爲文詞。溫麗殊可愛。方太夫人無恙時。與諸弟奉觴堂上。和樂申申。終日不相舍去。惟是孝友以承其家。吳人弛放夸浮。而薄骨肉之恩。聞鄭氏之風。亦可以少勸矣。予與君有姻舊。嘗嘉其夷雅自達。有君子之尚。以爲資厚者。其享遠。不幸卒不得發。所蘊于時。雖然。豈不裕厥後乎。曾祖延紹。太理評事。贈太子太傅。祖文遂。婺州節度巡官。贈太師中書令。考戡。宣徽北院使。奉國軍節度使。判并州。贈太尉。諡文肅。妣李氏。封丹陽郡夫人。娶葉氏。翰林學士清臣之女。先君二年以亡。子曰估。曰侑。曰侗。並太常寺太祝。曰倚。曰傅。曰恬。一女幼。其年四月二十六日甲申。葬于蘇州吳縣太平鄉橫仙源文肅大墓之南。銘曰。

蹶也御靡調兮。墮也築靡完兮。嗟嗟子之至然兮。其誰與咎之歸兮。

華陽集卷三十九

誌銘附墓記

宗室金紫光祿大夫檢校國子祭酒行太子右清道率府率兼御史大夫上輕車都尉贈右領軍衛將軍墓誌銘

皇祐元年四月九日。皇姪孫太子右清道率府率世邁終于睦親之邸。享年二十四。天子聞訃憫惻。遣中貴人護喪加賻。而寵以右領軍衛將軍之紱。越嘉祐五年冬。將從漢王葬于河南永安之原。申詔詞臣條次其行而鑱于石。領軍字仲遠。系出太祖皇帝。其曾祖諱德芳。潭康惠王。祖諱惟能。集慶軍節度觀察留後。南康郡公。父從古。右衛大將軍。蘄州防禦使。安國公。母京兆郡君宋氏。領軍生而警秀。方髻齟時。已自嶄然。不復與羣兒戲。甫九歲。纔勝衣。入預晨謁。綵纓縈佩。輝如也。自右班殿直累遷太子右清道率府率。娶劉氏。內殿承旨閣門祇候永寧之女。二男。曰令昶。太子右監門率府副率。蚤卒。曰令諼。太子右內率府副率。三女。一已夭。餘尙幼。領軍處貴游間。夷雅畏飭。能自傾下。後房無竽瑟之音。平居宴坐。以諷詠自適。雅善筆札。遒勁精婉。包虞永興之法。蓋嘗以所書奏御于上。深被獎嘆。至性孝謹。凡獲賚予。必歸之親庭。未嘗敢私。比疾且革。父母往視之。感泣辭訣。初無他語。第以養親之日短爲恨。斯可哀也已。其葬十月乙

西之吉銘曰。

天室之系。德茂源遠。懿哉領軍。幼鍾惠警。九歲奉朝。進退恂然。獻書于前。帝爲改觀。胡祐不遐。而遘淪闕。勒銘垂休。其載勿絕。

宗室金紫光祿大夫檢校太子賓客左監門衛大將軍使持節昭州諸軍事昭州刺史兼御史大夫上護軍天水郡開國公食邑二千二百戶贈金州觀察使安康侯墓誌銘

太宗皇帝之曾孫諱宗默。字潛真。于上爲諸姪。恭憲潞王諱元佐之孫。恭懿平陽郡王諱允升之子。初命爲右侍禁。歷東頭供奉官。景祐中。上以宗屬名秩未稱。遂改左千牛衛將軍。又遷左監門衛大將軍。明堂禮成。加昭州刺史。丁母夫人喪。創鉅毀深。因而遘疾。遽以不起聞。實皇祐六年二月三十日也。天子恤然不視朝。禮賻踰等。以金州觀察使安康侯章紱告其第。勅內侍典喪。權厝于國門普濟之佛舍。享年三十有七。侯爲人性謙靖。未嘗忤于人。雖生富貴。而樂善好古。意泊如也。間因退朝。率羣從子弟陳詩書以爲戒。其事父母。孝謹發于天資。宗族稱其賢。母崇國夫人王氏。娶錢氏。吳興郡君。柔明知禮。以宜其家。子男二人。仲倅。右千牛衛將軍。敏而嚮文。次早亡。女一人。適內殿崇班閣門祇候郭士逸。孫男一人。士阮。右內率府副率。嘉祐五年十月乙酉。葬于河南永安之原。臣職預詞禁。承詔以銘。銘曰。

煜煜皇宗。福流者遐。宜爾賢子。而祚而家。才也不淑。茫昧孰質。篆此銘章。以告幽室。

宗室金紫光祿大夫檢校太子賓客左屯衛大將軍使持節温州諸軍事温州刺史充本州團練使兼御史大夫上柱國天水郡開國公食邑二千五百戶食實封二百戶贈鄧州觀察使南陽侯墓誌銘

臣謹按宗籍。藝祖皇帝之曾孫諱從贇者。潭康惠王諱德芳之孫。集慶軍節度觀察留後南康郡公諱惟能之第三子也。天禧中。初命爲右侍禁。凡七遷至左屯衛大將軍温州團練使。贈鄧州觀察使南陽侯。其將葬也。臣奉詔以銘。又其子齋閔以來。于是序其行爲詳。惟侯溫豫清簡。好學善屬文。丁母太原郡夫人武氏喪。年尙幼。哀毀踰甚。十三奉朝請。進處有常節。通左氏春秋。第中大治齋館。揭思賢、味道、怡神、澄心四室。聚古今書萬餘卷。時王宮講官皆朝廷所選宿儒。相與規勵道義于其間。景祐初。上大燕太清樓。侯能賦詩以奏。天子覽之稱善。遂賜以御飛白書。復出內府金繒以寵異之。旣歸。因語人曰。夫飾輿馬之玩。與悉貿以市書。顧所尙如何。繇是侯得書益蕃。每未明俟朝。退伏家廟。惕然有所思。自以國朝之制。不屬以吏事。無以施銖髮之補。惟奉君親之事。未始一日敢懈也。皇祐二年正月十四日。召內外姻屬陳燕席于堂上。酒酣。援琴甚哀。俄而泣下。謂康夫人及諸子曰。比夢異人告我以數。豈遂止此乎。果然。其送終也。毋重費珠玉以爲累。左右駭所聞。因而罷去。後四日。果暴疾終于邸第。天子聞而震悼。禮賻加等。勅中貴人典喪事。其年二月二十二日。寓殯于普濟佛寺。享年四十四。字子儀。所著詩賦一卷藏于家。娶康氏。封

會稽縣君左侍禁閣門祇候八元之女。婦德之淑，流于壺彝。子十二人，世經、世復、世居、世澤，皆諸衛將軍、世豪。太子右內率府率世獎、右內副率世略、世名，終於右內副率。餘蚤卒。女四人，長適供奉官方中正，次適右班殿直劉兌，並啓邑封。二女未笄，孫九人，令穰、令匹、令松、令少、令戛，並右內副率。餘未賜名。侯頃嘗出上所予飛白書、薰被、端朝弁，以授諸子，曰：「皇帝天縱多能，勢若飛動，雖唐太宗之灑翰，無以遠過。爾曹可不勉以爲學！」其後諸子競好善力文，因摹帝書于石，并述其先子之訓以聞。天子爲降璽書，嘉其所以成父之志。嘉祐五年十月癸酉，引紼國門。乙酉，窆于河南永安縣之原。銘曰：「勢之高華，矜驕匪期。君子處之，百福是宜。嶷嶷維侯，樂乎善道。天子所錫，靡事奇好。達命之游，聞者嗟驚。其後多賢，益多厥聲。」

宗室金紫光祿大夫檢校太子賓客使持節復州諸軍事復州刺史充本州防禦使兼御史大夫上柱國開國侯食邑三千戶食實封五百戶贈寧國軍節度觀察留後追封宣城郡公墓誌銘

皇姪贈寧國軍節度觀察留後追封宣城郡公諱從審字叔度太祖皇帝之曾孫吳懿王諱德昭之孫贈永清軍節度觀察留後安定郡公諱惟和之子初命爲右班殿直歷左右侍禁東西頭供奉官上初纂服改內殿崇班累遷東染院副使景祐中朝廷推屬籍之寵並實環衛遂改千牛衛大將軍尋領賀州刺史又遷筠州團練使歷左領軍大將軍祀明堂恩拜復州防禦使皇祐三年五月十八日以疾終于宮邸上

初聞疾亟。遣太醫診視。賜以御奩之藥。又命中貴人臨撫者相望于道。訃聞。天子震嗟不已。爲輟視朝。刻以留印。苴以公土。櫨于柩前。享年四十六。公姿性端毅。喜怒靡形于色。下雖輿隸之屬。咸以時進退。肅然如官庭。日內朝。衣冠雍容。未始以風雨輟廢也。每退處燕閒。延禮髦俊。授禮記左氏春秋。反復不倦。由是頗識聖人大趣。又通陰陽方技之學。晚尤喜釋氏書。晨起趺坐。諷念精進。以性理爲適。公奉身清約。嘗自以荷天家之蔭。享貴盛日久。念無以報國。一日。悉陳家所藏瓌奇之玩。輸之內府。上問所欲。公頓首謝。初無所覬。上嘉其忠篤之至。亦寵答之。娶吳氏。贈宿州觀察使守禮之女。燕國大長公主之孫。德儀柔嘉。休有壺範。子十人。世英。右監門衛將軍。世堅。世及。皆蚤卒。皆贈左武衛大將軍。世卿亦蚤卒。贈右監門衛將軍。世肱。右千牛衛將軍。世禕。世總。並太子右監門率府率。世仍。太子右內率府副率。戚藩之英。咸師教義。餘二子不育。女五人。長適右班殿直李彥伯。蚤卒。次適右侍禁武振。封永康縣君。次適左侍禁鄭士寧。封永康縣君。二女尙幼。孫五人。令纘。令驛。令琇。令課。令簽。並太子右內率府副率。嘉祐五年庚子十月丙辰朔三十日乙酉。葬于河南永安縣之原。申命禁林。以識不朽。銘曰。顯允宣城。邦之英戚。不矜于盈。義訓是迪。驛車以朝。有煒振振。器抑于用。美懷莫申。皇帝仁恩。燦乎九族。宜熾而艾。胡奪之速。山之隆高。水之環紆。歸將安之。以寧茲墟。

宗室金紫光祿大夫檢校太子賓客左屯衛大將軍使持節信州諸軍事信州刺史充本州團練使

兼御史大夫上柱國開國公食邑三千戶食實封二百戶贈定州觀察使博陵侯墓誌銘

皇祐四年秋八月甲午。上之再從姪左屯衛大將軍信州團練使諱從質疾且革。先令諸子曰。我幸得託肺腑。未始有過失。卒有不可諱。毋傷生重費。以累其後人。言訖而逝。上聞惻然加憫。以定州觀察使博陵侯之祿告其第。侯字子野。太祖皇帝之曾孫。祥符初。以屬籍補四頭供奉官。上初纂極。累遷入作副使。景祐中。朝廷以本支之隆。名秩未稱。遂改千牛衛大將軍。久之。領蜀州刺史。又遷左屯衛大將軍。宗祀明堂。汎澤天下。遂有信州之拜。侯志行修潔。內和而外介。其天性孝友。伯氏睦州團練使從謹被病。日寢劇鍼砭所不可及。侯遽入臥內。刲股肉以進。翼日疾迺瘳。上嘉其篤愛。中出金繒以撫之。侯席貴盛日久。奉己簡儉。以廩賜之餘。累獻器御府。無慮以萬計。上遣問所欲。對使者言。蒙國厚恩。豈復以微寵。必不得已。願朝廷擇儒碩之臣。以訓勅子弟。使得親名教之樂。不勝幸甚。上亟命有司從所請。侯清淨少欲。涉于經史。入侍禁闥。幾三十年。出處無泰色。有若寒素之起家者。上亦知其樂善無厭。賞錫以御閑之駿。他日。又賜飛白書以旌寵之。其治家有規檢。後堂無箎絃之音。輕財好施。賙族人之急。不問有無。惟恐其不至。故啓手之夕。邸中無老幼爲之扶服泣下。享年四十三。祖德昭、吳王、諡曰懿。父惟忠、贈彰化軍節度使舒國公。夫人吳氏、供備副使守嚴之女。燕國大長公主之孫。封懷安郡君。德度幽閒。儀于夫族。子十人。世哲、世京、世頹、世表、世鎮、世蒙、世疆、並屯衛將軍。世敵、右監門率府率。世灼、世系、並右內率府副率。皆端厚之器。以

承高華女十二人。長適潘孝安。次適王昉。次適王正卿。次適吳師民。次適李可益。皆啓封縣君。餘未行。嘉祐五年十月乙酉。葬于河南之永安縣。有詔禁林按閱以銘。銘曰。

博陵溫溫。學幾于原。士見窮戚。乃志乎勤。侯雖富貴。匪佚之間。獻珍內府。人則有勲。侯拜稽首。以感以歆。痾纏于哀。行者爲涕。天子盡然。朝亦輟眎。賢者多後。以大以延。勒銘紀休。於萬斯年。

宗室金紫光祿大夫檢校國子祭酒右屯衛大將軍兼御史大夫輕車都尉天水郡開國伯食邑九百戶贈洛州防禦使廣平侯墓誌銘

皇姪孫諱世崇。字德卿。吳懿王諱德昭之曾孫。彰化軍節度使舒國公諱惟忠之孫。宣州觀察使宣城侯諱從謹之長子也。景祐初。以右侍禁改遷太子右衛率府率。累遷右屯衛大將軍。皇祐四年冬十二月感疾。再夕而亡。是月二十有八日也。天子聞之。嗟悼。贈洛州防禦使廣平侯。享年三十有二。侯少聰悟。多知逮成人。卓犖有奇節。其氣尙介直。每會議邸中。立辯其是非。不爲貴倨所屈。頗涉經史。百家之學。嘗詰宮僚孫復。按襄公十二年魯有周廟。然諸侯不敢祖天子。大夫不敢祖諸侯。魯安得祖文王乎。左丘明親接聖人之迹。而禮記夫子所修。顧有異指耶。復雅有經術。退而深奇其言。宣城知其喜學。日延侍講。楊中和講受其師說。由是通左氏春秋最爲深。又善爲詞賦。溫麗殊可觀。乘暇則率賓族命射。其發必中。人莫能及。宣城之寢疾也。每嘗藥以進。晝夜不解帶者。蓋累月矣。其執喪哀瘠甚。宗宣稱其孝。晚尤嘉禪悅。其終

也。中固靡辭。豈達死生之理耶。娶錢氏無子。其側室生一男令曠。太子右衛率府率。一女尙幼。嘉祐五年十月乙酉葬于河南永安縣之原。銘曰。

不流乎紛。迺帥以履。敏而好文。賢于宗子。天胡奪年。弗永厥休。法應有銘。以詔于幽。

宗室金紫光祿大夫檢校太子賓客左屯衛大將軍使持節雄州諸軍事雄州刺史充本州防禦使兼御史大夫上柱國榮國公食邑三千八百戶食實封七百戶贈保寧軍節度使追封楚國公墓誌銘

彰化軍節度使舒國公惟忠之子七人。爲左屯衛大將軍雄州防禦使者。其幼子也。藝祖皇帝之曾孫。吳懿王德昭之孫。母曰任國夫人田氏。生甫踰年。卽賜名曰從信。除左班殿直。明道元年。積遷內殿承制。尋徙東入作使。景祐二年。朝廷以環衛之秩。大更宗子官。遂改右千牛衛大將軍。歷簡州刺史。皇祐二年。進左屯衛大將軍。秀州團練使。初。燕恭肅王旣薨。其後。宗室稍寢封建之制。天子念骨肉之深。至是。太宗正濮安懿王始王汝南。而諸王邸又使世有公爵之封。久之。公伯氏韓國公且薨。嘉祐二年。遂進爵榮國公。已而又進以所終之官。後五年十二月十四日。以疾薨于寢。享年五十有一。上撫几而悼之。輟眎朝一日。遣入內都知李允恭典護喪事。以太常鹵簿鼓吹導殯于國南奉先佛寺。納書以保寧軍節度使楚國公印綬告其靈。公于屬籍。蓋今上之從兄。字君瑞。少而警悟如成人。舒國公之捐館。纔四歲。哀慟不息。見者

爲之感歎。太夫人鍾愛特深。撫教之未始去左右。及侍母疾。蚤夜不解帶。而卜祠藥膳之無不至重。離內
難頓踊叫號。幾不能生。于是宗族以孝聞。公覽六經百氏之書。至于御射音律之學。所通靡不精。一日。謂
諸宗子曰。天子擇行義經術之士入教于宮。今倚席不講。豈稱所以獎育之意耶。于是延學官堂上。終日
敷經授義。靡然嚮風。因復勅之曰。吾幸生盛時。蒙祖宗之休。出入禁闥四十餘年。雖不見用。然未嘗有過
失。觀宗室中壽罔克以長。豈膏粱玉帛。非所以輔養性命者歟。若曹當勉志于學。毋自靡于驕華也。公又
謂唐十院置維城庫。約諸王稟入。而上下均其用。今雖奉養之費。一出縣官。然屬大者猶或不給。且諸王
邸多殖產井市。日以取其資。惟懿王院初無餘財。因令治一庫。帥諸宗子月視祿之厚薄。而十輸之一。不
得輒私以費。于是車馬賓客冠昏喪祭之禮。無不獲其助。今其法不廢。公風度偉特。外嚴而中夷。治家肅
然。如官庭。頗恬于聲利。位出公下者。或以曲恩遷去。視之泊如。不以介介其中也。方朝廷以藝祖之後。名
禮未稱。公于懿王之裔。且爲長。有司議將進位。而會公薨。故飾終之典。非前後所侔。夫人孫氏。贈太子太
師承祐之孫女。輔佐有賢德。子男三十七人。曰世顥。曰世淵。皆右領軍衛大將軍。曰世爽。曰世逢。曰世燮。
曰世鴻。皆右監門衛大將軍。曰世登。曰世耀。曰世福。曰世穹。皆右千牛衛將軍。曰世榮。曰世掌。曰世闡。曰
世重。曰世職。曰世根。曰世引。曰世拙。曰世親。曰世玗。曰世資。曰世劬。曰世造。曰世藩。皆右監門率府率。餘
蚤亡。女十九人。適武亢者封秀容縣君。適徐璋者封河間縣君。適徐保恩者封萬年縣君。繇亢而下皆供

奉官適張從權者封樂壽縣君。適王立者封福昌縣君。繇從權而下皆侍禁。六未筭。餘早亡。孫男十七人。曰令典。右監門衛大將軍。曰令扁。曰令戚。曰令躋。曰令穆。曰令志。曰令攄。曰令羣。曰令攝。曰令優。曰令貫。曰令駝。皆右監門衛府率。餘未賜名。明年十月甲午。從仁宗皇帝西葬河南永安之原。其將葬也。宮寮臣恂上公之行于太常。而博士臣夏卿作諡曰安僖。有詔銘其墓。中太史臣珪實爲之銘曰。

於赫皇祖。有烈自先。神明其祚。本支萬年。顯允楚公。實大土宇。乘馬路車。來燕來譽。華堂隆隆。公子之娛。公勅公子。以詩以書。天子念公。名禮未報。其贈伊何。高幢副纛。公喪既西。三川逶迤。有臣太史。作爲銘詩。

宗室金紫光祿大夫檢校國子祭酒右屯衛大將軍使持節達州諸軍事達州刺史兼御史大夫上護軍天水郡開國公食邑二千一百戶贈洋州觀察使洋州侯墓誌銘

皇姪贈洋州觀察使洋州侯諱世昌。字保之。曾祖德昭。吳懿王祖惟忠。彰化軍節度使舒國公。父從恪。萊州防禦使東萊侯。母曰平原郡夫人米氏。生十年。天聖七年始頒名於朝。補右班殿直。累遷左侍禁。改太子右衛率府率。歷右領軍衛將軍。皇祐二年。宗祀明堂。進右屯衛大將軍。嘉祐五年。加達州刺史。明年六月二十有八日。以疾終于寢。享年四十有二。天子惻然。所以賻綵之禮甚厚。寓殯國南奉先佛寺。侯風度秀整。雖平居不妄笑言。尤敏悟好學。方爲兒童時。日誦書數百言。既而反復無所遺。及長。博通五經。嘗學春秋于孫復。又學易于王獵。積餘十年。益究聖人之淵源。或有以治春秋易數家之書進。以廣侯之學。侯

謂曰。衆子澆澆。徒使後學者見惑爾。皆不足取。由是知侯學春秋易爲深。頗工于歌詩。慕唐李長吉之格。初侯寢疾日劇。諸仲請益訪良醫。侯曰。氣索矣。顧生不有數耶。雖愈跗何益也。言訖而逝。于是聞者以侯爲知命。娶錢氏。繼室以高氏。封文安縣君子男二人。長曰令襄。右監門衛大將軍。次曰令樾。率府副率。蚤亡。女三人。長適侍禁高士敦。二尙幼。令襄亦力學爲善。以承其家。八年十月甲午。從仁宗皇帝葬河南永安之原。銘曰。

懿王之後。世多有聲。循循維侯。不矜虛盈。從二先生。學春秋易。衆子紛員。維聖之蹟。侯有美業。藩莫見施。又奄不淑。孰天訊之。

宗室金紫光祿大夫檢校國子祭酒右監門衛將軍兼御史大夫上柱國天水郡開國侯食邑一千二百戶贈右武衛大將軍墓誌銘

嘉祐八年二月四日丙子。右監門衛將軍諱世英。以疾卒于睦親之第。天子念宗子之傷。憫然加惠。以右武衛大將軍之祿寵其匱前。春秋三十六。曾祖德昭。吳懿王祖惟和。永清軍節度觀察留後安定郡公。父從審。寧國軍節度觀察留後宣城郡公。母渤海郡君吳氏。燕王延祚之後。將軍于屬籍。蓋上兄弟之子。明道二年。初賜名。爲右班殿直。改太子右監門率府副率。歷太子右清道率府率。皇祐二年。宗祀明堂。遷右監門衛將軍。累階金紫光祿大夫。檢校國子祭酒。兼御史大夫。勳上柱國。爵天水郡侯。食邑一千二百戶。

將軍字務實。孝愛謙靖。喜愠未嘗見于色。每夙興退朝。必陳詩書于前。終日究覽。而不知勤。樂近賓友。間以觴詠自娛。遭父母喪。尤哀瘠過人。娶張氏。封南陽縣君。繼室以錢氏。封福昌縣君。子男七人。長令駟。次令纘。並右監門率府率。次皆蚤亡。女三人。長許嫁侍禁錢營緒。次尙幼。葬河南永安之原。銘曰。歲癸卯。月癸亥。日甲午。葬安之。從昭陵。永以固。

宗室金紫光祿大夫檢校太子賓客右武衛大將軍使持節舒州軍事充本州防禦使兼御史大夫上柱國清源郡公食邑二千一百戶食實封三百戶贈安化軍節度觀察留後高密郡公墓誌銘

惟皇從兄高密郡公諱宗望字子國。太宗皇帝之曾孫。潞恭憲王元佐之孫。安遠軍節度使密國公允言之第七子。初命爲供奉官。先帝念邢王之後。不可以無祀。命公以內殿承制。實嗣邢國。是爲文惠王元傑之孫。景祐中。朝廷始用衛府之秩。寵加同姓。改右監門衛將軍。慶歷中。詔封諸王之裔。遂爵清源郡。皇祐二年秋。祠合宮。除右領衛大將軍。積遷右武衛大將軍。舒州防禦使。公少聰警。力學善屬文。其進止方重。馭內外嚴而有法。然不以富貴加人。喜親師友。每陳書于前。觀自昔忠義之士。未嘗不掩卷而歎。作戒子文刻石齋楹下。其大略以世祿驕華爲戒。初先帝嘗勅宗室子弟學虞永興之書。公退閱字法。亟書千字文一卷以進。上嘉其筆翰精婉。特寵以刺史之拜。後復于延和殿試宗室子弟所學書。令宗正第其高下。以公書第一。比獻所爲文。上問所欲。願盡賜國子監書以勉詒子孫之學。遽從其請。先帝好飛白書。侍從

蒙賜者以爲榮。公前後所得殊多。又嘗以金泥紋羅書宗望好學樂善。及爲善最樂字以賜之。非他儼也。公因請建閣第中。貯帝所賜書。旣成。上又爲親書閣名。其見寵遇若此。公所被賜予。多賙人之急。外姻之貧未葬者。公爲出金繒斂而葬之。聞者高其誼。今年春。聞先帝寢疾甚。因謂族人曰。雖託肺腑。而不得進侍左右。吾積沈憂。恐先犬馬。不能以報厚恩。未幾。果發疽。太醫馳視。已不及。其終。嘉祐八年三月十七日也。啓手之夕。召諸子牀下受遺令。其言如戒子文。享年四十四。上聞惻然爲哀。命入內供奉官梁從政典護喪事。所以賻襚之禮甚厚。贈安化軍節度觀察留後高密郡公。其年十月甲午。仁宗皇帝葬昭陵。遂舉公之喪。西祔于文惠之園。夫人張氏。封永嘉郡夫人。贈太師兼中書令徐國公耆之女。先公亡。子男七人。長仲郃。次仲嘉。皆右監門衛大將軍。次仲炎。仲峭。皆右千牛衛將軍。次二子蚤亡。次尙幼。女五人。長適侍禁李天益。封南陽縣君。次適侍禁李庠。封華容縣君。次二女蚤仁。次尙幼。銘曰。天子仁恩。閔族弗緒。有賢維公。實大邢宇。其來有儀。組鞬鏤膺。以烝以嘗。孝孫是承。夙志于學。德日俊茂。鉏首金葩。賜書盈構。訃聞幾何。忽出綴衣。素車之從。萬祉無期。

宗室推誠保順守正翊戴功臣寧國軍節度宣州管內觀察處置等使開府儀同三司檢校司空同中書門下平章事使持節宣州諸軍事行宣州刺史上柱國天水郡開國公食邑七千六百戶食實封二千二百戶贈中書令追封博平郡王諡安恭墓誌銘

治平元年七月戊辰。博平郡王諱允初薨于其第。初上聞王被疾。亟遣中使候問。又飭太醫日夜侍王疾。及訃至。乘輿卽臨其喪。爲哀涕之不勝。上還止輦。以王後事屬于其兄襄陽郡王允良。泣拜曰。不幸仲氏無子。願擇所以宜爲嗣者。于是詔魏恭憲王之後右監門率府率仲速出繼。爲王之孫。以奉其祀焉。方是時。天子在諒闇中。不得爲王成服。輟視朝三日。贈中書令。追封博平郡王。其賻恤之物甚厚。以天章閣侍講傅卞攝鴻臚卿入內侍省。都知鄧保吉同護喪事。于是宮僚狀王之行上于有司。而諡曰安恭。其年十一月丙寅。具鹵簿儀物葬于河南之永安縣。祔先恭肅王之園。有詔禁林誌王之系出官封。與夫始終之大節。納其墓中。臣珪實爲之。謹按王字累之。初名允宗。更賜今名。其于屬籍蓋上之諸父也。宣祖之曾孫。太宗之孫。吳恭肅王之子。母曰魏國夫人張氏。甫五歲。授右千牛衛將軍。三遷爲和州刺史。歷汝州團練使。齊州防禦使。華州觀察使。定國軍節度觀察留後。威德軍節度使。上卽位。以寧國軍節度使拜同中書門下平章事。明年。詔五日一奉朝。王固辭。上寵答之。不許。居無何。王薨。夫人榮國夫人慕容氏。王爲人靜慎謙慤。其八朝恂恂有常節。未始以風雨輒廢也。家居。慍喜不見其色。凡奉入有無一不問。惟樂賙于人。天性寡欲。終身不近聲色。少好釋氏。至誦其書數十萬言。亦有其絕見者歟。銘曰。帝親同宗。雖遠猶篤。矧如近籍。長而加淑。懿懿惟王。太宗之子孫。不以富貴。而流世紛。天子念之。曰予叔父。其朝五日。猶謂予顧。天不畀予以殄藩英。何以飾終。追王博平。巍巍三陵。山河左右。王從下游。其宅則

厚。

宗室金紫光祿大夫檢校太子賓客左驍衛大將軍使持節淄州諸軍事淄州刺史充本州防禦使兼御史大夫上護軍天水郡開國公食邑二千七百戶食實封二百戶贈武甯軍節度觀察留後追封彭城郡公墓誌銘

臣謹按僊源之圖。太宗皇帝之曾孫。韓恭懿王元偓之孫。東平郡王允弼之第二子。今上之再從伯也。生五歲。在仁宗朝爲右侍禁。景祐三年。朝廷以環衛之秩。大更宗子官。遂除太子右司禦率府率。積遷左領軍衛大將軍化州刺史。又領慈州團練使。英宗卽位。遷左驍衛大將軍淄州防禦使。治平二年六月乙丑。以疾卒。享年三十七。母李氏。崇國夫人。娶沈氏。封遂甯縣君。生男二人。曰仲瑩。右監門衛大將軍。曰仲頤。右監門率府率。女二人。其將葬也。臣又得宮寮所上狀。言君爲人端重。素好學。通尙書禮記。尤長于篇詠。喜音律。方十餘歲時。嘗從東平王朝三陵下。旣歸。能道所過山川形勢之處。略無所遺。王愛之絕深。及得疾。而醫診禱祈之術。徧索于京師。然而卒不起。天子聞訃。憫然。一不視垂拱朝。贈武甯軍節度觀察留後。彭城郡公。後二年八月癸酉。葬河南之永安縣。其諱宗藝。字用之。云。銘曰。東平好善。匪獨舊聞。能勅諸子。卓卓不羣。誰不富貴。之子務學。今雖云亡。亦後之覺。

宗室金紫光祿大夫檢校右散騎常侍右武衛大將軍使持節絳州諸軍事絳州刺史充本州防禦

使兼御史大夫上柱國天水郡開國公食邑二千七百戶食實封四百戶贈武甯軍節度觀察留後

追封彭城郡公墓誌銘

今天子之三從兄彭城郡公諱世延字叔僖吳懿王德昭之曾孫冀康孝王惟吉之孫丹陽僖穆王守節之第五子母彭城縣太君劉氏公方爲兒童時嘗入見章獻太后于禁中仁宗因謂太后曰渠父好讀書試令念詩于是念唐名賢詩數十篇仁宗嘉其敏雋遂賜名以爲右侍禁稍遷西頭供奉官景祐二年朝廷以環衛之祿寵諸宗室乃換右千牛衛將軍歷右監門衛大將軍領欽州刺史又領寧州團練使遷右武衛大將軍領絳州防禦使治平二年七月癸酉以疾卒享年四十四贈武寧軍節度觀察留後追封彭城郡公公天資端厚篤于好學通王氏易及孟子至于星歷攷驗之書無所不究尤喜爲詩每與諸公子唱酬而風思獨爲精慶歷中上方嚮文學公進所著詩賦賜書褒諭仁宗又嘗親書世延字以賜之晚尤喜釋老之書其視富貴蓋泊如也夫人崇仁縣君李氏天雄軍節度使隴西郡王繼勳之孫子男四人令續右武衛大將軍梧州刺史令擢太子右監門率府率其孟季蚤卒女八人無在者後二年八月癸酉葬先帝于永厚陵而宗室之喪皆從窆原下其窆公亦用癸酉之良銘曰

習富易墮習貴易荒返裕以學孰匪爲良受祉旣多維皇之睦奄其不存猶有後躅

宗室金紫光祿大夫檢校右散騎常侍右羽林軍大將軍使持節慶州諸軍事慶州刺史充本州防

禦使兼御史大夫上柱國天水郡開國公食邑三千戶食實封六百戶贈武寧軍節度觀察留後追封彭城郡公墓誌銘

惟彭城郡公諱宗嚴字子莊太宗皇帝之曾孫魏恭憲王諱元佐之孫中書令郇國公諱允成之第五子母曰霍國夫人康氏初命右侍禁歷東頭供奉官內殿承制換右屯衛將軍遷右武衛大將軍領簡州刺史又領鳳州團練使先帝卽位以爲右羽林軍大將軍慶州防禦使階至金紫光祿大夫檢校右散騎常侍兼御史大夫勳上柱國爵開國公食邑三千戶實封六百戶治平二年十二月戊申以疾卒天子念傷之輟視朝一日遣中貴人視喪事賜賻物加等贈武寧軍節度觀察留後追封彭城郡公公性謙靖貴而能下人家無車服珍奇之玩惟聚古聖賢之書每退朝日陳于前不以寒暑輒廢觀也仁宗屢賜以太清之書初霍國夫人春秋高忽一日得疾公憂悸至不食霍國薨公亦不復起云享年五十三四年八月癸酉葬河南永安縣三陵旁公先夫人韓氏後夫人潘氏封河南郡君子男十六人仲虞仲新皆太子右內率府副率蚤亡仲防右武衛大將軍施州刺史仲商仲儋皆右監門率府率餘不及名女十七人其歸左侍禁傅其璪封長壽縣君歸左侍禁李文紀封仁和縣君二尙幼餘皆蚤卒孫男一人士綏右監門率府率銘曰

大林多材而工度之英英公族乃抑弗施維其有聞止曰好善展也彭城亦允以顯其顯伊何天子賜書

日陳于前。以燕以虞。三陵之旁。行者皆畏。公從萬年。其靈未昧。

宗室推誠保順同德亮節守正佐運翊戴功臣鳳翔雄武等軍節度管內觀察處置等使開府儀同三司檢校太傅守太保兼中書令行鳳翔尹使持節泰州諸軍事泰州刺史上柱國東平郡王食邑一萬七千一百戶食實封四千八百戶贈太師尚書令兼中書令追封相王諡孝定墓誌銘

惟相孝定王。蓋宣祖昭武睿聖皇帝之曾孫。太宗文武睿烈皇帝之孫。韓恭懿王元偓之子。諱允弼。字公輔。于今天子爲從祖父也。母楚國太夫人耿氏。以大中祥符元年生于大內之東宮。眞宗親書小字命之。八歲爲右千牛衛將軍。遷右監門衛將軍。眞宗每召入禁中。令仁宗兄事之。是時王年尙幼。能自跣踏不敢當。眞宗頗愛奇之。及御樓賜大酺。嘗與仁宗並席以觀。間又從至資善堂。以金筆格及金鑄祥龜賜之。仁宗爲太子時。除英州刺史。及卽位。除蔡州團練使。歷單州齊州防禦使。貝州觀察使。安化軍節度觀察留後。寶元二年。同知大宗正事。自燕恭肅王薨後。吳、潭、潞、許、邢、潤、蘇、華諸王。無一在者。天子念祖宗之後。封建稍不立。無以藩助王室。慶歷四年。始以濮安懿王王汝南。以王爲北海王。旣而拜武康軍節度使。初祠明堂。加同中書門下平章事。換節寧國軍。更同判大宗正。嘉祐五年。除兼侍中。爲徐州大都督府長史。換節武寧軍。遂判大宗正。英宗初。兼中書令。行河中尹。換節護國軍。仍徙封東平。詔五日一奉朝。上登極。拜太保。行鳳翔尹。領節鳳翔雄武軍。聽朝朔望。王辭者再三。優詔不從。其秋。從英宗靈駕至厚陵。聞楚國

薨。王哀毀不勝。及出殯。徒跣輿匱而行。起復冠軍大將軍左金吾衛上將軍。王方辭未許。會上來奠。王子宗述之喪。就幸王館。上命王坐。王以衰服不敢坐。上見王體甚羸。慰存者久之。因請願得終母喪。上曰。克繼以下。皆列章請王起治事。王毋得辭也。其後又累辭。乃許之。王性至孝。其事几筵如事生。楚國之葬有日矣。王忽得疾不能起。乃召諸子謂曰。我疾日益劇。恐不得襄大事。以盡人子之孝。奈何。遂泣下不復言。是夕昏霧下庭中。若南方有風雨聲。久之乃散。夜漏上二鼓。王薨。實熙寧三年七月癸酉也。享年六十二。訃聞。上撫几震悼。明日趣駕臨哭之。慟所以賻予之甚厚。上以邸中不常告王疾。官吏以下皆令有司劾奏之。輟視朝三日。丁亥行服于苑中。宰相率百官慰崇政殿門下。贈太師尚書令兼中書令相王。命龍圖閣直學士尚書刑部郎中陳薦、羅鴻臚卿皇城使昭州團練使入內內侍省押班藍元震入內東頭供奉官勾當御藥院劉有方同護葬事。又遣尚書內省掌簿夫人宋氏以周恤其家。于是宮僚李實狀王之遺懿上于太常。而博士劉攽攷諡法。五宗安之曰孝。純行不差曰定。諡王曰孝定。十月丁卯啓殯于西階。上復臨慟之。加面撫其孤嫠。賜物又數千。爲制挽詞三章。勅使者採石以錮其方中。十一月癸酉葬河南之永安兆。在恭懿王園之西。鹵簿儀物皆從至原下。王儀質英邁。行端而識遠。自六經諸史百家之言。無所不讀。雖生富貴而臨事且戒慎。未始妄笑言。其奉朝廷進止有法度。雖服帶不易其常。仁宗嘗解所服通犀帶賜王。然而終不敢服。初朝廷以諸王邸第散在京師。非歲時不得相見。因大建睦親宅。合其族以居。

之。乃置大宗正司。王凡總領三十年。尤與濮安懿王共事久。而篤友愛之情。其教導宗子。使各親親不失其誼。而自趨于爲善。故上下無骨肉之怨。慶歷中。嘗因冬至曲燕崇政殿。日暮。帝歡甚。勸王飲。至于霑醉。賜以玉盤。龍腦山。白玉杯。仍詔王至殿門。乘銀飾肩輿而歸。故事。大燕無宗室與坐者。皇祐至和間。王以名重而位尊。數命坐以寵之。王善射。凡從游幸。賜射。發必中。帝常解以御箭。累賜襲衣金帶。英宗爲皇子。王卽日入賀禁中。英宗深懷謙固。久不受命。王又請率屬敦勸。入內博平郡王允初薨。無嗣。爲擇族子仲速爲之嗣。王素好筆札。間以吟詠自娛。而無車馬珍奇之玩。治平初。增諸王宮大小學官。王猶日就習。旣又延伴讀。姜潛論孟子。令諸子北嚮而立聽之。前後累賜褒詔。以爲王有二獻之風。楚國嘗盛夏遇疾。王晝夜不解帶者一月。又以香灼臂而祈于庭。楚國薨時。八十三歲矣。善積慶流。內無緦麻之服。一紀之餘。自明道以來。行郊祀。藉田。明堂。恭謝。祫饗之事者十一。王爲三獻者五。爲亞獻者五。奉九推之禮者一。功臣累十四字。積階開府儀同三司。勳上柱國。邑一萬七千一百戶。實四千八百戶。夫人李氏。封崇國夫人。昭德軍節度使同中書門下平章事。贈中書令。昭亮之女。淑明有賢譽。上承下接。以宜其族人。子男六人。長宗述。奉國軍節度使。祁國公。次宗藝。武寧軍節度觀察。留後。彭城郡公。次宗績。左龍武軍大將軍。寧州防禦使。次宗景。左龍武軍大將軍。筠州防禦使。次宗喬。左龍武軍大將軍。澤州防禦使。次宗孺。右龍武軍大將軍。沂州團練使。皆孝謹承家。女八人。長靜安郡主。適皇城使端州團練使李綬。次泰興縣主。適西京。

左藏庫副使王世良。次新樂縣主。適文思副使李餘慶。次永安縣主。適供備庫使郭若虛。次南陽縣主。適內殿承制康昇。次宜春縣主。適內殿承制李宗說。次德安縣主。適內殿承制李宗迪。次未適。孫男二十人。長仲俶。右武衛大將軍眉州刺史。次仲誘。右武衛大將軍茂州刺史。次仲虺。右武衛大將軍春州刺史。次仲瑩。右監門衛大將軍。次仲沃。仲芮。仲雪。仲敵。仲靡。並右千牛衛將軍。次仲頎。仲靈。仲吟。仲疇。仲逢。並太子右監門率府率。次仲誥。仲諲。仲慥。並太子右內率府率。餘未命。臣伏觀自昔同姓諸侯王。多溺于驕奢之志。甚者又或至于禍敗而不可揅。豈其勢使然耶。若孝定王爲四朝近屬。而溫仁恭儉。行足以高一時。名足以動後世。顧雖河間。沛國。恐未能以遠過也。使其去京師。就土宇。則利民澤物之迹。豈少哉。銘曰。有宗神靈。系本天發。太宗入王。恭懿維哲。叢光合釐。其發有原。有來軒軒。皇室是藩。旣王北海。又荒東平。衰衣凝旂。寵莫與京。在貴靡流。在盈靡缺。有賢維王。孰能之遏。帝日萬幾。罔不在民。王治王族。麟題振振。內親外化。如堯之時。天星皇祉。與王同娛。王位四朝。豈不駕馭。其處深宮。雖遠亦慮。仁曰仲兄。英曰叔父。天子曰於。豈予敢侮。名施彷彿。善則多積。胡不萬年。喪我元戚。磐石之虧。勢將安援。矧其族人。孰攷孰憲。五陵之旁。表封墓門。冠劍下從。雖沒猶存。

宗室左武衛大將軍均州防禦使殤子墓記

皇從姪左武衛大將軍均州防禦使世靜之子十六人。小名慶慶。小字善源。其第十四子也。系出太祖皇

帝冀康孝王惟吉之曾孫。陳州觀察使淮陽侯守約之孫。母曰安福縣君劉氏。嘉祐四年五月丁酉。生于嘉慶院。風骨峻異。尤悟不類常兒。始能行。見月。輒自能展拜庭下。授孝經。既誦之不復忘。或有以籠禽獻邸中。初使厚謝之。已而趣發籠縱去。又喜信佛。凡芳珍之物。必令篇之佛筵。均州之病瘍。衆子侍旁。乃獨取所傳藥自傳之。欲以移疾其身。左右咸異之。均州曰。吾家奇童也。八年秋。忽得疾。均州夜不安寢。比劇。猶能泣言曰。不幸貽親之憂奈何。均州益訪醫祝。至于老子浮圖仙科梵法。所以救治之無不至。炷香于臂。叫號神明。祈以延其須臾之命。然而卒無及其卒。七月甲子也。甫五歲。權厝國南水陸佛祠。以未賜名。故爵命弗及焉。其年十月甲午。葬河南永安縣。惜乎生而有奇志。使少賦以年。其雋碩之望。孰與較哉。方秀而摧。命矣夫。天子之厚同姓。雖殤子其葬亦有文禮之如成人。矧從仁宗皇帝靈輿西引。且祔于先王之園。顧于哀榮不亦至歟。謹記。

宗室右監門率府率墓記

皇姪孫士弇。嘉祐五年五月十九日生。明年以宗室長子。既賜名。遂除太子內率府副率。後二年。今天子卽位。遷右監門率府率。其年九月二十三日以疾卒。甫四歲。火而寓骨于都城之西大慈佛祠。曾祖允成。贈鎮江軍節度使兼侍中郇國公。祖宗鼎。贈華州觀察使華陰侯。父仲嬰。右武衛大將軍彭州刺史。母日金華縣君陳氏。十月甲午。從仁宗皇帝葬河南永安縣。雖不幸而夭也。亦詔史臣刻文于其墓。蓋國家篤

親親之分。不以長幼異云。謹記。

華陽集卷四十

誌銘附墓記

望都縣太君倪氏墓誌銘

夫人姓倪氏。南唐主爵郎中弼之女。贈大理評事高陽許規之妻。高陽君死。池陽官下。夫人攜三子尚幼。寓宣城。日夜戒諸子期有所樹立。次子府君。逖時爲兒童。秀警。已能作詩。嘗憩大溪旁。方據石微吟。潮幾沒石。府君揮灑自若。詩成頃。迺去。夫人嘗奇之。一日從膝下。乃曰。家世微。若不少激昂。何以大先君之後。遂從學中茅山。窮左氏春秋。觀戰國危亡之際。未嘗不慷慨太息。條二十事。皆切當世務。持見江南李煜。煜器其少年有詩學。拜祕書郎。卽日懷其綬歸。夫人感泣曰。姑望吾子至是耶。明年。天兵下秣陵。朝廷江東諸材望臣。府君以監察御史歸。復獻書天子。補衛州汲縣尉。居亡何。夫人寢疾。終于官第。享年八十有五。夫人治家肅然。諸子候顏色。以時出入。居宣城。歲時與諸子食貧勞苦。意益自安。後府君來京師。取朝廷顯用。以材識稱。蓋母氏之教然。諸子亦承其家。咸平中。故府君遷太常丞。守武陵。會郊報恩霈。追封夫人望都太君。慶歷四年十月丙辰。孫通州司戶恂。太子中舍恢。海州司理怡。江淮制置判官某。太廟齋郎平。進士會奉望都。匱于廣陵。壬甲。塋于眞州揚子縣甘露鄉之原。諱某銘曰。

池陽之終。諸孤實幼。吁嗟夫人。介然其守。訓子有立。果振于後。夫人之賢。宜識不朽。

丹陽郡夫人李氏墓誌銘

太尉鄭文肅公夫人李氏。以嘉祐三年七月己卯。終于常州之官第。越八月庚申。歸祔于吳郡薦福山。文肅之封。其孤以余嘗被文肅之知。又有姻好之舊。泣以請銘。義不得辭。按夫人其先歧人。曾祖譚。贈太子少傅。祖運。贈吏部尚書。父昌言。贈職方郎中。方吳越錢氏歸其國本朝。尚書以郎官守杭州。是時人心反側。構亂一方。吏按得其狀。無遠近。欲以名捕之。尚書曰。二淵首嚮文邦。今遽誅數郡之衆。恐非天子所以仁拊之意。惟命戮主謀者十數人。于是蒙活者以萬衆。其後夫人之伯父昌齡。官至近輔。而其族以文學政事顯于時者。蓋奕奕不絕。夫人實平晉縣君聶氏第四女也。職方嘗戒其子曰。世祿子弟。汨于綺紈之好。凡擇女所配。必于寒素之門。夫人遂歸文肅。文肅方布衣。數遊學京輔。間夫人本貴勢而居平晏如。嘗念尊章之不及親。迺事夫之兄嫂。持帚無怠色。春秋佐祀。飭躬以虔。文肅既貴。筦樞密。提將鉞。夫人治家益有法。其衣服玩好不以侈。而後堂無管絃之音。文肅薨于井州。上聞震悼。遣中貴人護匱還吳。夫人還京師。入見上。謝流涕。詔令本道特借第。又錄內外親錫冠鑲者八人。夫人居毘陵。不以家事累諸子。惟蚤暮專于學。至或連籍預薦逮之官。則訓以奉公約己。愈擴前人緒業。罔或有墮。故咸以才令有聞。夫人端厚沈粹。有德量。左右媵侍。莫闕其喜愠。雖燕私必聞法度之言。天性仁孝。尊卑相好以愛。鄭氏李氏合大

族共恤孤振窮。歲時無疎戚與均。夫人疾且革。子婦咸執衣以請遺令。夫人中固不亂。而了無答。有若恬然而逝。亦其達歟。享年六十二。歷封贊皇縣君、長安郡君、文安、文定、隴西、丹陽郡夫人。子五。人民彝、著作佐郎、民初、民秀、大理評事、民度、太常寺太祝、民用、祕書省正字、女二人、長適翰林學士起居舍人王珪、次適三司判官祠部郎中呂公孺、孫十二人、佑、侑、佖、佑、億、皆太常太祝。伋、試將作監主簿、傑、傑、偉、倚、傅、偓、尙幼。孫女十人。銘曰。

山西名門。女德之淑。斥于華援。以歸文肅。文肅既貴。本兵當軸。夫人承祀。有儀允穆。四錫大邦。翟衣是服。壺事之專。仁深慶全。今其亡矣。孰迹其賢。吳山隆隆。土豐而堅。納銘幽墟。以永于傳。

宗室丹陽郡王夫人任城郡夫人魏氏墓誌銘

夫人姓魏氏。始晉畢萬封于魏。其後或徙任城者。世爲任城人。曾祖諱仁浦。贈尙書令中書令。封秦王。祖諱咸美。左神武大將軍。父諱昭吉。左班殿直。母曰晉寧縣君李氏。夫人少最孤。從祖駙馬都尉咸信撫育之。甚愛。都尉爲戚里之冠。夫人既長。又有淑德。遂歸于丹陽郡王。王諱守節。蓋上之諸姪也。夫人賢而知禮。承上遇下。無間言。春秋奉祀。必躬籩簋之事。先是。諸王夫人誕日。賞賜燕第中。至夫人。上特命中使。以將其寵。族人榮之。丹陽之捐館舍。殆二十年。夫人退尙簡素。其服玩無纖靡之飾。區處閭事。無不有條理。諸子亦承其母訓以立。嘉祐三年冬。王邸災。詔徙別第。明年三月一日。暴感疾。遂終于寢。享年五十七。封

任城郡夫人。上聞加惻。卹賻殊厚。敕八內供奉官鄧惟濟典治喪事。寓殯于法濟佛寺。又明年十月乙酉。舉夫人之喪歸。祔于河南永安縣丹陽王之塋。子七人。世永、左屯衛大將軍、光州團練使邢國公。世延、右監門衛大將軍、欽州刺史。世符、右領軍衛大將軍。世寵、終太子右司籙率府副率。餘蚤亡。女七人。長適閣門宣事舍人郭士遜。次適東頭供奉官魏堯卿。次適西頭供奉官吳舜卿。次適左侍禁王誨。次適西頭供奉官鄭价孫。皆啓縣封。餘蚤亡。孫男十二人。令圖、令瑤、令樞、令穀、令續、諸衛將軍。令緯、令朔、令擢、令躅、令羽。令拜、太子右內率府副率。一未賜名。孫女八人。長適左班殿直時觀。次適右班殿直吳眞卿。六尙幼。曾孫二人。子張率府率。子野副率。銘曰。

燕婉夫人。王邸之從。不矜于貴。迺迪婦功。象服紆餘。沒猶有紀。誰如夫人。見曾孫子。

壽安縣太君呂氏墓誌銘

夫人姓呂氏。其先并州人。曾大父諱夢奇。贈太師尙書令。大父諱龜祥。贈太師中書令。父諱蒙巽。尙書虞部員外郎。知海州。贈太常少卿。夫人。實第三女也。海州之從兄宮師文穆公。太平興國中策進士第一。未幾。致位宰相。被兩朝顧遇。固隆貴矣。與海州素相友愛。故久畱轂下。不得補官于外。夫人旣生相家。文穆見每奇之。以謂殊非諸女之儔。太尉文靖公。海州之兄子也。少時嘗親帥諸子弟厲志于學。夫人方幼。見文字輒喜。于是汎通詩書百家之學。文靖嘆曰。信矣。諸父之言。吾祖尙書有重名天下。爲兩浙轉運使。方

是時海州宰蘇之吳縣。夫人遂歸我伯父少卿。少卿諱覃，字慶之，尚書次子也。潛心經術，嘗疾世之詭隨，故持論方介，不爲勢少屈。海州之壻共五人，有過郡者，率陳以鐘鼓觴豆之娛。及遇少卿，則肅其衣冠，終日語不及私。少卿天性孝篤，侍尚書左右二十餘年，未始一日違去。而夫人佐烝嘗之事，春秋益虔。少卿臨事素嚴，夫人治家亦有法，閨內肅然如官廷。不幸少卿暴疾早世，夫人方年三十餘，躬治喪于廣陵。旣而攜諸孤往依廬江伯父侍郎之官下。一日泣謂諸子曰：「汝父病且革，猶語我且善勉汝等。」汝鍾罰不天，何以奉遺言？諸子號頓，咸自言願夙夜勉力，不敢墜先人之緒業。夫人于是盡屏珠玉之飾，市書環室，親授經義。日月漸劇，卒至于有成。其後昆弟仕稍進，夫人或歲過諸子，始至必進壽于堂，子婦拜于庭。諸孫誥誥于前，夫人喜甚，因曰：「其益思盡忠于迺事，若夫極嘉旨之奉，殆匪親意也。」夫人素貴，能謙下其德，舉得宗族之歡心。晚尤愛京洛之風，長子因請畿之太康，未幾夫人感疾，終于官第。實嘉祐四年三月某日也。享年七十，封壽安縣太君。明年卜葬少卿于揚州某縣某鄉之原，以夫人祔焉。其用十月壬申之吉。子三人：璣，尚書比部員外郎；珣，尚書職方員外郎；璩，杭州南新縣令。孫男十五人：仲均、舉進士，仲猷、太廟齋郎，次仲鄰、仲說、仲蒙、仲威，餘尚幼。孫女三人：珪，昔之髡兩髦，蒙夫人器獎之甚異。逮珪之塵二禁，猶見夫人無恙時。今將葬矣，而不得引車綍于墓下，追惟平昔之知音，徽永已，痛孰甚哉！泣以銘曰：

嫗彼夫人，文穆賢之。歸我伯父，佐祀以時。山陽之終，其節介介。誰勉諸子，話言猶在。仕旣及親，安輿屢適。

匪樂嘉旨。又飭以職。晚愛京師。顧懷逶迤。卒隕于畿。如達之歸。靈龜食郊。塋則同穴。其後以延。德芬勿絕。

趙宗旦妻賈氏墓誌銘

夫人。皇姪密州觀察宗旦之夫人。其姑曰延安郡太君。初上在儲宮。章聖皇帝擇宗子之謹良者。無如觀察。于是命觀察從上就學資善堂。凡與上起居飲食。靡有所間。久之。章獻皇太后召延安郡太君謂曰。宗旦且有立矣。宜得名門之配。于是出訪衣冠舊族。聞夫人淑茂有女德。太后召至禁中。問其家世。其大父昭州團練使賈宗者。元從先帝邸中。雅有勳勞。太后喜甚。賜以御所之衣。其嫁。天聖十年正月十一日也。尋封河內郡君。夫人柔明德量。撫內外姻族。恩意燦然。治家尤有法。喜讀書。通論語孝經大義。夫人初爲太后所知。觀察又嘗輔今上有舊恩。然而終不自言。茲亦內助之賢者已。嗚呼。賦命弗融。以慶歷八年正月十二日。終于睦親之第。享年三十五。上聞。爲輟視朝一日。禮賻加厚。特贈永嘉郡夫人。非常比也。又詔中使領喪事。寓殯于奉先佛寺。父德滋。左班殿直。以疾休于家。故弗之顯。生七男。仲玘。右監門衛大將軍。仲寅。贈右屯衛大將軍。仲淹。右千牛衛將軍。仲浹。仲通。並太子右監門率府率。餘蚤亡。三女。一適左班殿直曹希文者。封仁和縣君。餘蚤亡。孫男三人。士伋。士歸。並太子右內率府副率。一未賜名。孫女六人。在室。嘉祐五年十月乙酉。塋于河南永安縣之原。銘曰。

熟聞夫人。曰言曰容。獻后母臨。入見禁中。訪其氏族。舊邸之功。以歸戚藩。豈不謂賢。維子維孫。誥誥于前。

其塋嘉阡。其後以延。

安陸侯妻賈氏墓誌銘

郡君姓賈氏。曾祖廷環。累贈左神武大將軍。祖某。官至四方館使。昭州團練使。父德滋。前左班殿直。夫人以選歸于安陸侯宗訥。至和元年五月乙卯。以疾卒。享年三十有六。權厝于薦嚴佛寺。以嘉祐五年十月乙酉。祔安陸侯以塋。銘曰。

德配惟諧。卜藏斯吉。其固其安。同于此室。

宗室延州觀察使夫人京兆郡宋氏墓誌銘

延州觀察使同判大宗正事安國公從古之夫人宋氏。其曾祖廷浩。尙後唐莊宗義寧公主。爲房州刺史。是生偓。偓尙漢祖永寧公主。入朝。歷忠武軍節度使。同中書門下平章事。追封廣平郡王。是生元載。元載爲東頭供奉官。閣門祇候。夫人其長女也。母曰西華縣君錢氏。初。藝祖皇帝納孝章皇后。蓋偓女也。夫人以世族選爲安國公之配。安國公。今天子之從兄也。夫人生十年。母教之剪製之事。音律之法。詩書之言。其性聰悟。所學輒過人。後五年。乃嫁。嫁四十六年。乃卒。夫人端靜謙恭。能以禮下人。故閨門之中。長幼之序。莫不法式。喜觀浮圖書。其奉度儉節。無珠玉纂組之玩。先帝知安國公之賢。使以主太宗之事。而夫人實左右之。夫人病且革。召其子孫牀下。謂之曰。吾奉宗祀有年矣。老而益不敢懈。夫富貴易靡于人。汝曹

勉近于學。亡以鼓鐘狗馬而自溺其志也。治平元年六月五日卒。嗚呼。可謂賢也矣。上遣內司賓來弔祠。又命內侍羅允和以視喪事。藁殯于國南之承天院。明年十一月庚寅。葬河南永安縣。夫人名道柔。字仲和。封京兆郡君。男十二人。曰世邁。故右領軍衛將軍。曰世瑞。曰世儔。皆右監門衛大將軍。曰世法。曰世闊。曰世設。皆太子右監門率府率。一未賜名。餘蚤卒。女十三人。一適西頭供奉官康德修。封晉寧縣君。一尙幼。餘蚤卒。孫二人。曰令諼。曰令騶。皆太子左監門率府率。其將葬也。有詔史臣考夫人之淑行以爲之銘。銘曰。

有齊孝章。儷德皇祖。有婉夫人。自其華緒。夫人有行。宜于而室。春秋奉祠。其薦嘉吉。勉其子孫。信厚是履。臨終之言。一何亶亶。鬱彼新封。以永于藏。其固萬年。徽音不亡。

永壽郡太君朱氏墓誌銘

永壽郡太君沛國朱氏。贈給事中始平馮公諱式之夫人。其先家京兆之萬年。遭唐季之亂。關中舊族。多散適荆湖間。夫人皇祖亦挈其家至潭之衡山。後又徙江陵。遂爲江陵人。皇曾祖諱祕。唐夏州安撫判官。檢校尙書比部員外郎。皇祖諱葆光。贈尙書兵部郎中。皇考諱昂。尙書工部侍郎。致仕。贈刑部尙書。始尙書爲翰林學士。請老江陵。方是時。夫人年十四。端重寡言。尙書愛賢夫人。擇所宜歸。及見給事所爲文。大器之。遂以歸。夫人之歸。其治家有法。自冠婚喪祭。牲帛菹醢。莫不有禮意。接內外姻族。尊者恭之。下者拊

之而恩勤一也。又自薄奉養。雖尺帛不妄費。一有嫁婚。視篋中所積。蓋十具八九。故馮氏雖甚貧。而嫁婚能不失其時。凡嫁姑二人。女五人。子若孫娶婦者八人。凡受諸女婦之事甚衆。若顰刻組繪之工。其學皆精巧過人。至今荆襄間。稱馮氏家法。往給事爲左侍禁。自以負所學而不得志。幾欲易一簿尉。夫人輒謂曰。窮達顧不有命。寧介而踣。將屈而遂之乎。給事爲止。給事旣捐館舍。夫人攜諸孤居鄂州。自教讀書。賓客之過門者。夫人知其賢。嘗躬爲飲食之。故其子雖少。而名動京師。皇祐元年。天子親試進士。而其子遂以文章爲天下第一。及其歸。里巷皆歡呼動色。而夫人獨不爲之動。迨其子爲翰林學士。題名之日。夫人復自爲具。令盡會兩制玉堂上。已而翰林君卽尙書名下。題曰外甥馮某。歸以告夫人。于是夫人喜不自勝矣。夫人方困約時。惟知教子之爲樂。不以不自給爲憂。後其家日愈顯。夫人猶衣故時之衣。蓋終身不以貧富易其節。其性素嚴。若不可犯。故雖幼穉。過夫人前。必斂手。無敢戲侮。至子出爲官。然未始不以寬恕爲言也。治平二年。翰林君知貢舉。聞夫人被疾。數請歸。上報曰。朕自敕太醫日夜視夫人疾。毋深念也。又嘗賜御膳者再。間遣使者至夫人臥內。所以撫存之甚厚。夫人春秋高。稍間輒復病。翰林君致四方名醫。又叫號神明禱禳之。無不至。明年八月丙午。夫人卒不起。享年七十有二。其年十月庚寅。祔于河南府密縣義臺鄉南朱村給事之墓。夫人初封仁壽縣太君。嘉祐祫饗。翰林君時爲龍圖閣待制。願上所遷官。封長安郡太君。後累封永壽郡四男子。襄定州原武縣主簿。袁大理評事。京翰林學士尙書禮部郎中羣。

牧使奕將作監主簿五女子以歸尙書屯田員外郎周傳北部郎中康衛國子博士張湜進士劉誥大理寺丞宋稱孫男十一人誥諮誼諍訢詰許證認孫女二人曾孫男四人銑鎬鋤鉞曾孫女四人銘曰諄諄尙書知女所從不擇高華而擇于馮馮公有聞仕非其志夫人勉之毋屈而遂有節夫人而又知子能爲尙書實始以喜亦旣受祉以莫不增帝出玉饌夫子是承奄其不存尙有遺則維子維孫其服無斁

魏國夫人陳氏墓誌銘

故觀文殿大學士尙書右僕射魏國公贈司空兼侍中賈文元公諱昌朝之夫人姓陳氏其先閬州人也夫人曾祖諱昭汝祖諱省華考諱堯咨諡康肅皆太師中書令兼尙書令母仁壽郡太夫人朱氏康肅公與其弟兄富貴暴天下而賈氏出于孤寒世莫知有魏公者夫人旣笄康肅公不它擇其歸魏公人或以爲疑夫人之歸事其姑甚孝凡奉飲食衣裳莫不利公而時節之遇內外親疎皆主于恩人不見其有驕矜倨慢之色于是夫人嫁時車馬與夫珠玉珍奇之玩不數年間費率盡一日仁壽夫人入獻天子千萬歲壽故事外命婦皆有鎮服之賜仁壽欲予夫人夫人辭曰姑未賜何敢先也未幾魏公入預政事遂與其姑皆受賜禁中魏公罷宰相判大名仁宗召夫人問所欲夫人曰妾夫以布衣致位公相念無以報國家不敢以私謁累上德帝爲嗟賞者久之嗚呼婦人無外事其能勤儉以正家柔愛以睦族固已謂賢況持節義若此然則魏公之興匪繫夫人之助乎夫人自安福縣君累封至魏國夫人治平四年十一月甲

辰薨于開封府春明坊之第。後魏公二年，享年六十三。慈壽太后遣中人賻弔之良厚，遺奏以其孫公靖爲太廟齋郎。明年八月庚申，同魏公塋于許州陽翼縣大儒鄉元老里。生夫人彭城縣太君劉氏，六男子：章、太常博士集賢校理主、尚書比部員外郎田、尚書駕部員外郎青、尚書司門員外郎齊、太子右贊善大夫炎、太常寺太祝三女子。其嫁尚書比部員外郎程嗣弼、太子右贊善大夫宋惠國、尚書都官員外郎龐元英。孫男子十八人。銘曰：

陳氏世家，一門將相，偉其聲名，天下所鄉。康肅知女，亦夫人賢，以歸魏公。或莫我然，夫人旣歸，其從如雲。祇厥婦事，以富易貧。魏公大顯，敢爲矜驕。而又食魏象服以朝，天子問之，以聽所斬。念無報君，何及我私。魏公云亡，邦國是瘁。誰謂夫人，迺至弗惠。玉靈食阡，從公下遊。尙有來問，如川之流。

同安郡君狄氏墓誌銘

夫人姓狄氏，其先家河東。本唐梁公之後。五代時，避亂于長沙，曾祖諱文蔚，全州清湘縣令；祖諱希顏，徐州錄事參軍，累贈兵部尚書、父諱棐，樞密直學士、尚書工部侍郎。母曰武城縣君路氏。三世皆不返河東，而爲長沙人。夫人性柔順，父母愛賢之，擇名士宜歸我叔父之室。甫年十七，能自朝夕飭婦事，方侍吾祖司空之疾。夫人念不及姑之養，惟恐奉承之不能，居其喪如事存之不少怠。始叔父犇走小官，嘗游江淮，以蕲於五嶺之南。夫人衣敝衣，食糲食，積十餘年，未嘗以聲利動于中。其後叔父爲廣東轉運使，當是時，

廣源州蠻儂智高舉兵圍廣州。城中之人憂將陷，爭持寶賂欲散走山林。獨夫人以先世畫像自隨，既而城卒不陷，出視故所居官舍，無一物存者，甚矣夫人之貧也。又九年，叔父入爲三司度支副使，家猶不能以自給。夫人御骨肉有恩，善收孤遺而撫養之。又樂賙人之急，故終身無珠翠之玩。珪也少孤，蒙夫人撫養之甚厚，以至今日之成就，念夫人之恩，未始一日忘也。去年以叔父以衛尉卿守四明，別夫人，尙笑語如平時。纔數月，訃來京師，于是內外之恩，無長少戚疎，皆失聲大慟。視珪之心，其痛可勝陳哉。今將塋也，屬在翰林，不得挽車原下，以申欲報之情，沒固有恨矣。夫人以熙寧二年四月庚戌卒，明年十一月丙申塋潤州丹徒縣崇德鄉永安里。享年六十九。初封長壽縣君，累封同安郡君，四男子：瑑、太常博士瑒、昭州平樂縣主簿璿、衛尉寺丞璋、台州黃巖縣主簿璐。先夫人而亡三女子，以適尙書水部郎中晁仲蔚、尙書都官員外郎趙唐、殿中丞監察御史裏行唐淑問。孫男八人，曰仲聰、試將作監主簿曰仲求、太廟齋郎六幼未名、孫女七人。長適贊善大夫鄭祐，餘未嫁。南望泣涕而銘曰：

自闈而居，治弗預外，與饋禴嘗，願不在內。夫人來嬪，外言不聞，內事是飭，罔弗以力。仁心愉愉，靡戚靡疎，人莫有怨，一情終切。念我少孤，我撫我育，而又誨我，克俾以續。我位于朝，名韞之縻，二紀之渝，或合或睽。我送夫人，國門之東，奄不見呼，呼天孰窮。〔案〕此下四字恩則不謝，刻石墓中，黃金可化。

辜氏墓誌銘

著作佐郎知司農寺丞事俞充既喪其母。予往弔之。泣以謂予曰。我家世四明人也。先妣姓辜氏。年十五以歸我先人。能自承舅姑。不失其婦事。先人舉進士。志不就以沒。先妣日夜教諸子讀書。使毋墮先人之志。後十餘年。充始行間得一第。歸拜于堂上。而先妣無動色。且謂充曰。學所以求仕。仕矣。必求名譽于其身。使人知汝父之有子。夫然後吾以爲樂也。方先妣在鄉里時。治家最爲有法。四明去朝廷遠。其俗吉凶祭祀冠婚聚會皆無法。先妣獨爲法不苟。又其事皆躬親之。無有怠。子婦雖欲往助之。然亦不能有所爲也。充祖蚤世。而祖妣陳氏再從人。及聞其喪。置几筵其家而哭之。爲持喪三年。其家嫁族人之孤女。不異己所出。外家素有產。既絕無後。先妣以法當得之。其後族人有欲分產者。以法不當得。先妣曰。吾有子。祿足以爲養矣。乃援法而弗予之乎。卒分子之人。有素不足于己者。未嘗蓄恚其心。見其貧且死。反佐恤之。惟恐有不至。以故數至不自贍。蓋亦未嘗爲戚戚。晚喜讀釋氏書。其于性命之理。頗自以爲得。若乃世俗之玩。皆非其所好也。熙寧三年九月己亥。終于司農寺。享年五十四。明年十月庚午。塋明之鄞縣清道鄉小江里。子男四人。長卽充也。襲襲皆未仕。其一人早卒。女三人。以適進士睦州青溪縣任中孚。進士虞肩孟。張案。孫男四人。長稷。次契。次臯。次夔。今塋既有日矣。生無以爲養。沒無以爲禮。不求當世之能文以銘。以圖長存。是充重不孝。不足以見我鄉之人。敢告以先妣姓。壽卒塋。與夫平生之所爲銘之。銘曰。明海之濱。人則屢晦。矧曰婦德。職自治內。顯矣夫人。有子之良。名動朝廷。以大于鄉。晨昏奄違。予適往弔。

作詩同藏。是其永耀。

泗州盱眙縣尉向君夫人李氏墓記

泗州盱眙縣尉向君宗諤之夫人姓李氏。父曰就。供備庫副使。母馮氏。始平縣君。夫人性質淑柔。事舅姑。婦道甚備。于女工尤巧慧。又喜書史。工音律之樂。向氏盛族也。稱夫人爲賢。降年不永。其嫁之明年以疾卒。享年十有九。治平二年。塋開封府開封縣汴陽鄉豐臺里。十一月甲申之吉。謹記。

王雲五主編

叢書集成初編

華陽集

五冊

中華民國二十四年十二月初版

撰者 王 珪

發行人 王 雲 五
上海河南路

印刷所 商務印書館
上海河南路

發行所 商務印書館
上海及各埠

